

**SEVENTH LEGISLATIVE ASSEMBLY OF MIZORAM
(THIRD SESSION)**

LIST OF BUSINESS

FOR THIRD SITTING ON THURSDAY, THE 10th JULY, 2014

(Time 10:30 A.M. to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

LAYING OF PAPERS

2. **Pu LALSAWTA**, Minister to lay on the Table of the House the following :
 - 1) The Mizoram Audit Manual, 2014.
 - 2) The Mizoram Chit Funds Rules, 2014.
 - 3) The Mizoram State Government Employees Group Insurance Scheme, 2014.
 - 4) The Mizoram Local Funds (Accounts & Audit) (Amendment) Rules, 2014.
 - 5) The Mizoram Lotteries (Regulation) (First Amendment) Rules, 2014.

3. **Pu K. SANGTHUAMA** to lay on the Table of the House the following :
 - 1) Statement of Action Taken on the Further Recommendations of Public Accounts Committee contained in the 17th Report, 2011 relating to Transport Department.
 - 2) Statement of Action Taken on the Further Recommendations of Public Accounts Committee contained in the 26th Report, 2013 relating to Food, Civil Supplies & Consumer Affairs Department.
 - 3) Statement of Action Taken on the Further Recommendations of Public Accounts Committee contained in the 27th Report, 2013 relating to Health & Family Welfare Department.

- 4) Statement of Action Taken on the Further Recommendations of Public Accounts Committee contained in the 28th Report, 2013 relating to Taxation Department.
- 5) Statement of Action Taken on the Further Recommendations of Public Accounts Committee contained in the 29th Report, 2013 relating to Health & Family Welfare Department.
- 6) Statement of Action Taken on the Further Recommendations of Public Accounts Committee contained in the 30th Report, 2013 relating to Horticulture Department.

PRESENTATION OF REPORTS

4. **Pu LALRINLIANA SAILO** to present to the House the First Report of Committee on Estimates on Action taken by the Government on the recommendations contained in the First Report of Committee on Estimates of the Sixth Legislative Assembly relating to Public Works Department on Pradhan Mantri Gram Sadak Yojana (PMGSY).
5. **Pu R.L. PIANMAWIA** to present to the House the First Report of Committee on Government Assurances.

LEGISLATIVE BUSINESS

Bills for introduction, consideration and passing

6. **Pu R.LALZIRLIANA**, Minister to beg leave of the House to introduce "The Mizoram Liquor (Prohibition & Control) Bill, 2014.

ALSO

to introduce the Bill

to move that the Bill be taken into consideration

AND

to move that the Bill be passed.

NGURTHANZUALA
Secretary

....

SPEAKER : Dik lo takin ro in rel tur a ni lo; tumah duhsak bik in nei tur a ni lo; thil pek in la tur a ni hek lo; thil pek chuan mifingte mit a tihdelsak a, mi felte thu a tihkhawlohsak si thin a. Lalpa in Pathianin a pek che u ram chu nung dama in luah theih nan a fel chauhva chu in zawm tur a ni.

Deuteronomy 16 : 19-20.

Zawhna kan lak hmain Pu Lalrinliana Sailo a damloh avangin leave of the House a rawn dil a, phalsak a ni a. Vawiina ama thil tih tur awm ang ang ti turin Dr. Ngurdingliana a authorized a ni tih House ka hriattir e.

Tunah zawhna kan la ang a, Starred Question No. 31-na zawt turin Pu Lalruatkima i lo ko ang.

Pu LALRUATKIMA : Pu Speaker, Starred Question No 31-na, SAD Minister zahawm tak chhan atan :-

- a) Tun ministry-ah hian Minister leh Parliamentary Secretary-te motor hman tur lei tum a ni em?
- b) Eng motor nge lei a tum a, engzat mante nge lei a tum? tih ka zawt e.

SPEAKER : Kan Chief Minister zahawm tak, Pu Lal Thanhawla chhang turin i lo sawm ang.

Pu LAL THANHAWLA, CHIEF MINISTER : Pu Speaker, tuna member zahawm tak zawhna chhanna chu:-

- a) Tun Ministry-ah hian Minister leh Parliamentary Secretary motor thalo neite tan tun Ministry-ah hian motor thar lei a ni.
- b) Tun Ministry-ah hian Minister leh Parliamentary Secretary motor tha nei lote tan Verna 1.6 VTVT SX 'O' leh support vehicle atan Bolero lei a ni. Verna man hi ₹ 9.60 a ni a, Bolero hi ₹ 7.96 lakh a ni.

*Speech not corrected

SPEAKER : Zawhbelhna, Pu Lalruatkima.

Pu LALRUATKIMA : A lawmawm khawp mai Pu Speaker. Hei tun lai chu sum kan indaih lohna avangin harsatna nasa tak kan tawk mek a. Mipui ngaihdan sorkar motor lei chungchangah hei chanchinbu-ah pawh kan hmu tam viau a. Zawhbelhna ka'n neih duh chu, Verna hi eng zat nge lei a nih a, Bolero hi engzatnge lei a nih tih ka zawt a. Tin, a dawt lelah chuan Pu Speaker, a zat a sawi lo va, a zata kha, engzatnge lei an tum, kha kha min chhang lo a ni. A leina man kha kan hria a, a zat, a number-a kha. Chuanin, SAD motor, MZ-01 C-5891 hi khawiah nge a awm tih ka zawt e.

SPEAKER : Chief Minister zahawm tak kan sawm ang e.

Pu LAL THANHAWLA, CHIEF MINISTER : Pu Speaker, Motor hi tul leh mamawh zawngin kan lei a, kan lei zel dawn bawk a, pawisa awm lo chung chung erawh chuan lei kan tum lo va, lei kan phal lo bawk a. Amaherawhchu, earmark sa te a awm a nih chuan, a leina tur a awm a nih chuan, a tul angin kan lei zel a, tunah hian Verna car 7 leh Bolero 10 lei ta ila, a tul chuan kan la lei zel ang.

Tin, kha laia Motor sawi kha a zawhna nen a inmil loh avangin ka sawi lo vang a. Hei Pu Speaker, Member zahawm takte hriat atan, Mizoram sorkar chuan Minister leh Parliamentary Secretary Motor tha neilote tan Motor thar leina turin ₹ 341.50 lakhs a ruahman a. Tunah hian Minister leh Parliamentary Secretary Motor tha nei lote tan Verna 1.6 VTVT SX'O' pasarih leh a Support Vehicle atan Bolero sawm lei a ni. Chutiang chu a ni a, tunah hian kum 2007-a sorkarin order a lo siam tawh hi Chief Minister leh ministerte kawl theih zat turte, tin Adviser to CM; Political Adviser to CM; Adviser to CM Finance; Adviser to CM Legal Affairs, Adviser to CM Technical Affairs etc. etc. hengte hi kan la pha lo nasa a, tunah hian. Chuvangin, tunah hian heng deh duah kan nei lo bawk a, a tul angin kan la lei belh zel ang.

*Speech not corrected

Dr. K. BEICHHUA : Kan Chief Minister ka zawhbelh duh chu, term hmasa khan motor indaih khan in nei a, tun kum 5 hnu-ah hian engti zia nge tunah hian kan indaih tak loh thut, Minister/Parliamentary Secretary an pun belh bawk si lova, engvanga indaihlo thut nge kan nih tih kha ka zawhna a ni e.

Pu LAL THANHAWLA, CHIEF MINISTER : Pu Speaker, a hlui kha kei ngei pawhin ka chhawm a. A then pheih chu eng eng emaw parts/music system lakbo tawhte an ni

hlawma, tichuan over the years ah khan kan sum neih ang ang leh a tul angin kan thlak zeuh zeuh a. Tunah pawh hian motor hlui tawh te condemnation board ina a condem tawh te leh a tul angin kan lei a ni, kan la lei zel dawn. *Speech not corrected

SPEAKER : Pu Pianmawia member zahawm tak i lo ko ang.

Pu R.L.PIANMAWIA : Pu Speaker, ka zawhbelh ve duh chu, State kan nih tawh hnuah hian engtik laiin nge pawisa kan indaih tawh? Indaih hun kan nei em? tih ka hre duh a. Tin, MNF sorkar laia motor an lei khan an annual plan outlay kha engzah nge anih a, tuna sorkarina motor thar a lei hunah hian annual plan outlay kha engzah nge? tih ka zawt bawk e.

SPEAKER : Aw le, Pu Zothangliana'n zawt mai sela, nakin ah a chhang mai dawn nia.

Pu H. ZOTHANGLIANA : Pu Speaker, ka lawm e. Kum 2005-2006 MNF Ministry hunah khan Baleno Car engemaw zat an lei a, khami kumah khan kan State liability leibat zawng zawng chu kan GSDP atanga chhutin za zel a 108.9 niin ka hria a, tunah hian kan state liability hi GSDP atanga chhutin za zel a 49.81 niin ka hre bawk a, hei hi a dik em? Chung figure te ngaihtuah chuan MNF in Baleno Car an lei kha nge awma, tun tuma Ministry-ina heng car a lei leh hi tih hi ka'n zawt a ni.

Pu LALRUATKIMA : Pu Speaker, khawngaih takin zawhbelhna. Hei, zawhna neitu nih manah, ka'n sawi belh duh chu, sum harsatna kan tawh mek laiin hetiang hi kan dinhmun a ni a. Tunah hianin nimin DTO office ah te kan han ena, sorkar motor registration hi kumin chhungin 118 a awma, ka'n zawhna taka chu kan House Leader zahawm tak khan min lo enfiah sak se ka duh chu, MZ-01/C 5891 Baleno Motor kha tunah hian a kawl lo turin kum chanve aia tam a kawl tawh a ni. Enge a awmzia aw, ka ti a, a pension-na a rei tawha, chutah rawih nawn leh a ni a, rawih nawn leh a nihna Department atangin motor pahnih, Verna thar hlak mai kumin ni 26.2.14 khan lei sak a ni tawh bawka. Chuan Gypsy Hard Top MZ-01 B/4732 ala kawl bawka, Department atangin. Chuti anih laia SAD motor kan indaih loh em em laia Pu Speaker, hetia kum chanve chuang pension tawhina a kawl reng hi enge a chhan ka hre lova, a awmna veng te pawhin a zir a ni ang e, kan minister zahawm tak pakhat biala mi te a ni a, enge ni ? a kawl ta vang vang maia, a driver pawh Lalringheta a ni a, sorkarin hlawh a pe ngar ngar a, waviin thleng hianin. Chuvang chuanin, hei hi waviin ngei hian kan House Leader zahawm tak hianin a kawltu hnen atang hian min lak let sak thei mai lawm ni? a kawl lo turin a kawl avang

hian min lak let sak turin kan House Leader zahawm tak khan min assure sak thei lawm ni tiin ka rawn ngen a ni.

SPEAKER : I hre em mai, zawh belh tur i nei lo a nih kha a, House Leader i lo sawm ang.

Pu LAL THANHAWLA, CHIEF MINISTER : Assure leh sure lo lampang a ni hran lova, thil diklo chu tihdik dan tur ngaihtuah tur a ni maia. Sorkar hian hriat loh leh hriat hmaih palh te a nei ve fova, report sela chuan sorkar hian khatieng khan a dah reng ka ring lova. Tin, khawvelah hian mi thei fal bik hi an awm ve hrim hrim a, sorkarah pawh hian thei fal te hi an awm ve leh zel a. Tin, an tih theih laia mahni lo invulh vak vak te pawh hi an awm ve nual a. A ka pension dawn hnai tawh sia, ka'n invulh ve teh ang ti te hi an awm ve nual a, khang ang zawng zawng kha ven ngai te an awm ve bawk a, kan veng nual reng bawk a. Chutieng chuan an tih loh tur ti te an lo awm ve bawk a, an tihloh tur ti te chu thil dik takin kan kalpui ve zel a. Tuna mi ang te kha thil tenghneng tak a ni a, sorkar tan chuan lehlam hawisan mai chi a nilo, Pu Speaker, ka lawm e.

*Speech not corrected

Pu JOHN ROTLUANGLIANA, MINISTER : Pu Speaker, zawhna i lak leh hmian, zawhna, supplementary question a nih khan pathum emaw supplementary question ti hmasa sela, a concern minister-in a chhan mai turin, a nih loha hetia in din chhawk in din chhawk mai kha chuan tawpin tai pawh a nei thei dawn hlei nem.

SPEAKER : Tunah zawhna 32-na kan la anga. A zawt turin Dr. K. Beichhua i lo sawm ang.

Dr. K.BEICHHUA : Pu Speaker ka lawm e. Ka zawhna chu Power & Electricity Department Minister chhan atan:

- a) Ni 14.6.2014 a Pu S. Beirakhu, M.R. Skill-II labour, a hnahawhna hmuna current man avanga boral ta hnenah zangnadawmna pek a ni em?
- b) He thihnaah hian tunge mawhphur?
- c) Mawhphurtu chungah action lak a ni em? tih ka zawt e.

SPEAKER : Chief Minister zahawm tak chhang turin ka sawm e.

Pu LAL THANHAWLA, CHIEF MINISTER : Pu Speaker, Member zahawm tak Dr. K. Beichhua zawhna kha a chhanna chu hetiang hi a ni:

- a) Zangnadawmna pek a la ni lo.
- b) Mawhphurtu chhui mek a ni.
- c) Mawhphurtu chungah dan anga action lak a ni ang, mawhphurtu chhui chhuah hunah.

SPEAKER : Zawhbelhna

Dr. K. BEICHHUA : Pu Speaker, ka zawhbelhna chu, M.R Skill-II labourer - te hi electric ban lawn theihna Dan hian a phalsak em tih hi ka zawhna pakhatna a ni a. Tin, zawhna hriatthiam nan, 2011 term hmasa khan New Latawh bulah khian Bus-in electric hrui hniam lutuk a hrut a, current Bus-a a kal avangin mi 9 nunna chan an awm a ni. Khangho kha nupa te, pafa, unau, khatianga chhungkua kua a thi kha tam tak an awm a, pakua an thi a. Khatah khan he House zahawm takah hian Tuipang bialtu Pu Thawla khan hengho tan hian tanpuina pek dan tur a awm em? ti khan a zawt a. Chutah chuan kan Chief Minister zahawm tak hian chutianga a awmlo tiin a chhang a ni. Chu mi hnu lawkah Tlungvel bula quarry chimah khan unau pahnih vanduai thlak takin a delh hlum a. Kan lainatin kan tuarpui a. (Speaker : I zawhna hmana a tihloh chuan tuna i zawhnaah khan zawt mai la) Ka zawhna point vek a ni. Khang mi pahnih kha ralna pek nghal an ni a nuai 2 ve ve, kan tuar puiin kan lawmpui a ni. Chulovah chuan Maubawh Bungkawnah khan inkang a awm leh a ni. Khata thi te pawh kha a tukah ralna pek leh nghal an ni ta a.

Tin, Ramhlun North kan hria a, in chimah mi tam tak an thi a, ralna te pawh pek nghal an ni a, kan tuarpuiin kan lawmpui a ni. Chutianga zelin Mamit District-ah pawh rulchuk te pawh ral an ni a, kan tuarpuiin kan lawmpui ani. Chung chu sawi loh, nimin kan Minister zahawm tak khan NLUP bawng thi te pawh an ral a ni tih a sawi, engatinge chhim lama kan thihna te, hetiangka kan thih hian min ral loh tih hi zawhna ka siam a. Fahrawnah min ngai ami tih ka zawhna a ni.

SPEAKER : Chief Minister zahawm tak sawm ang.

Pu LAL THANHAWLA, CHIEF MINISTER : Pu Speaker, NLUP bawng raltute kha MNF an ni a, amah hian a hrechiang zawkin ka ring a ngatinge an ral ve loh vanduinaw tawkte kha. NLUP bawng thi elsen taka raltute kha MNF an ni e. Ngatinge an ral loh

chhiatna tawktute hi tih kha chu amah hian a hriat chian zawk ka ring. Tin, khang midang dang ral an sawite kha natural calamity an tih a an classified ve a ni a, accident naran a ni lova. A pangngai a ni lova, natural calamity a ni a. Natural Disaster Management Central atangin a awm a, helaiah pawh a Department kan nei a, khamite nena inberawn a hei chu natural disaster a nih hi an tih ang chi kha tanpuina an pe thei a. Helaia kan hotuten theihpatawp min chhuah sak a, chutiang chu a ni.

Hei, Electric Department-ah hian Pu Speaker, a bik takin hetiang a an mite vanduaia tawkte ralna emaw zangnadawmna emaw Dan hi an nei lova. Hei hi thil dik lo tak niin a lang a. State dangin an nei nge nei lo ka ngaihtuah lova. An hna hi current in a man a, chhiat tawktute thei mai zel an nih avangin ngaihtuah tur a ni kan ti a. An hna hi a risky a. Tin, anmahni leh anmahni pawh an inhriat loh avangte pawhin an intipalh thei a, hna an thawh laiin. Chutiang chu a nih avangin a Department hian Dan an neih ve hi a thain ka ring. Dan kalphung pangngai an kal leh kal loh ka hre lova, ka ngaihtuah lova. Tin, State dangin an neih leh neih loh ka ngaihtuah lova. Keini state-ah chuan kan neih ngei thain ka hria a. Chutiang zawng chuan ka sawi ri tawh nghe nghe a ni. Chutiang chu a ni a.

Tin, chumi subject bikah chuan, hei, JNV School Complex-ah khan deposit work-in 250 KVA 11/0.4KV Sub-Station leh a kaihnhawih line te siam a ni a. He Sub-Station leh line siam hna hi thawh zawh thawkhat a ni. Electrical Inspectorate atanga line charge phalna dil turin Test report buaipui mek a ni a. Test report siam turin Test charge a ngai a. Test charge tih a nih theih nan Pu S. Beirakhu, M.R Skilled II kha endik a, mahse DAFO Office siam that ngaiin a hria a, siamthat tuma a bana a lawn chu vanduaia kha a thleng ta kha a ni a. Hei hi khatianga natural calamity ti a an classified hnuaihan kha a tel lo palh hlauh mai a, a pawh khawp mai. Pu Beirakhu hi mi taima leh tlawngai tak a ni. Saiha Power Division hnuaihan Electric lama hna hria, hna thiam a neih a ni a. Sorakar anga chawpchilh taka zangnadawmna inpek maina Dan hi ka sawi tawh ang kha a awm rih loh avangin chhawmdawl tanpuina awm thei ang angte dap a ni a. National Trade Union, Electric Branch atangin ₹ 41,500/- in an ral tawh a.

Tin, Saiha Power Sub Division Staff Welfare atangin ₹ 76,030/- in an ral tawh a. A vaiin ₹ 1,17,530/- lai a ni. Heng bakah hian buaipui tur awmte Department-in a buaipui a. ₹ 22,000/- sen a ni a. Mawhpurtu chungchang hian Department-in enquiry nei turin SE, Lunglei Power Circle hriattir a ni a. Hemi chungchang hi chhui mek a ni a, chuvangin wawih hian responsibility fix a la nih loh avangin action lak ngaihna a la awm rih lo a ni, Pu Speaker. (SPEAKER: A chiang tawktute viau a ni lo'm ni, in zawhna kha chu)

*Speech not corrected

Dr. K. BEICHHUA : A la chiang lo deuh hlek, Pu Speaker khawngaihni. NLUP bawng ral tih kha kan Chief minister zahawm tak kha niminah a awm lova. Minister zahawm tak Vety changtu niminah khan ka zawt ngei a, 'kan ral a ni' tiin min chhang a ni. Niminah khan RKVY sum atanga replace a ni tihin a chhang, ralna niin a sawi a ni. Chu chu a nia, chutah chuanin (interruption). Man made disaster a ni. Natural Disaster ah pawh kan inral chuan man made disaster a ni a. Department inthlahdah vang liau liaua kha thil kha thleng a ni. Engatinge kha mihring kha ban an lawntir lai khan power house atanga current an on thut? Kha kha department negligence vang a ni.

Chulovah 2011 a mi pawh kha NGO in he electric hrui hi a hniam lutuk ti a wawi tam department ah an thlen tawh a ni. Chu chu sorkar lam atanga response awm lovin MST Bus khan kha electric hrui kha a hrut ta a nih kha. Kha pawh kha man-made disaster a ni, Department inthlahdah vang a ni. Natural disaster ah pawh khatiang a nih chuan Department inthlahdah vanga disaster thleng kha chu Department thiam loh chu thudang ni ta se, khawngaihna ground ang pawhin chhawmdawlnate hi chu kan pek tur a ni lo'm ni? tih ka zawhna a ni.

Pu LAL THANHAWLA, CHIEF MINISTER : Pu Speaker, Pu Beirakhu pawh khan ₹ 1,17,530/- zet chu a lo dawng tawh a, mi thahnemngaite atangin. Tin, tuna a zawhna tak kha ngaihtuah atan a tha ka tih lai tak kha a ni, Pu Speaker. Dan a awm lova, tunah hian. State dangin an tih leh tih loh pawh ka ngaihtuah lova. Kan ramah hetiang hi a thlen zeuh zeuh avangin Department hian ralna Dan nei se a tha ang a, Department dang ang a ni ve lova,

Tin, NLUP Bawng nen khan a inang lova NLUP Bawng thi kha chu a kha a ral duh chuan an ral mai a, a tha a, tukan hnial lova, tunhnuah pawh ral zel se, a neitute tan a lawmawm ngawt ang. Khang Bawng te kha insured an ni a insurance atangin an dawng tur a ni a. Tin sawrkar mawh a nihna chen a awm a, NLUP a Bawng vulh Trade thlangtuten vanduaiana an tawk a, a rawn kalna a hla tham a, chuvangin a thlakna pek leh an ni hlawm a. Tin mipakhatin a ser a, sorkar bawng hi ei ruk thianga ni lova, chuvangin chawi tir a ni.

*Speech not corrected

SPEAKER : Zawhna 33-na kal ila, Er.Lalrinawma'n zawt se.

Er. LALRINAWMA : Pu Speaker ka lawm e, Food Civil Supplies & Consumers Affairs Department changtu Minister chhan atan:-

- a) Gas a pangaia a van viau lai hian Black a lei tur a awm reng a hei hi Sorkarin a hria em ?
- b) Engtia hma lak nge a tum tih ka zawt e.

SPEAKER : Pu John Rotluangliana, Minister zahawm takin chhang se.

Pu JOHN ROTLUANGLIANA, MINISTER : Pu Speaker kan Member zahawm tak Er. Lalrinawma zawhna starred Question 33-na (a) chhanna chu – ‘Hria e’, tih ani a (b) chhanna chu - CYMA te nen tang tlanga dap chhuah hna thawk turin Department chuan hma a la mek tih a ni e.

Er. LALRINAWMA : Pu Speaker, zawh belh ka duh a. Tunah Gas kan harsa a, a black-in ₹ 1500 ten kan hmu thei mai a, helai hi ngaihtuah that ngai ka ti a. A chhan chu Gas hi thil dang anga Bazara zawrh ni lovin felfai taka kal phung bik nei a ni a. Blackers te leh a pangai a kan hmuhna hi a in ang reng a ni. Chuvangin a market kha a rawn chhuahna lam pang khan a control thei tlat a ni. Chuvang chuan a market tivangin black a lei turin mipuite pawh min siam thei a. Helai hi chhui chian ran a, chumi piah lamah mipui sum rawkna niin ka hria a. Helai hi kan Minister zahawm takin tun aia chak zawkin hma min lo lak sak thei em, mipui kan mangang tawh a ni tih kha kan zawt e.

Pu LALRUATKIMA : Pu Speaker, zawhbelhna. Kan Minister zahawm takin a rawtna ang khan a hlawma chhan a that ka’n ring deuh a. Nimin lamah kan sawi tawh a Gas hi a harsa mai ni lovin a vang a ni, theih tawpa kan tan tlan a ngai a ni. Tukin chanchinbuah kan hmu a Central YMA in LPG harsatnaah hma lak a tum a rawn ti a. Central YMA concern chu a ni miah lo, mahse public interest a nih avangin Central YMA hian hma a rawn la ta a ni a. Chutah chuan sorkar mawhphurtute pawh hi a timualpho ka ti a, mahse an thahnemngaihna vang liau liau a ni. Chutah chuan LPG control order angin heng black market ami hi tibo turin sorkar hian hma nasa takin a lak a tul a. Niminpiahah LPG dealer leh IOC hotute ka kawm a, chuta an sawi chu, Kawnpui bulah khuan a black-na dawr pakhat a awm a, kan Minister hian a rang lamin min enfiah sak sela.

Tin heng ang chi hi Explosive License ngai vek a ni a, khatianga zawrh/ stock teuh kha Danin a phal lova. Chuvang chuan IOC hotute pawhin black a an zawrhna in awmna an hriat avangin kan Minister in min enfiah sak se tih kha rawtna angin ka sawi duh a ni.

SPEAKER : Minister-in sawi tur a nei em?

Pu JOHN ROTLUANGLIANA, MINISTER : Pu Speaker, kan Member zahawm tak Pu Lalruatkima rawn sawi chhuah Central YMA chungchang kha a sorkar lam leh keini a Department lam atanga tlawmgaih thlak lam pang ni loin, kan thawhhona vang zawk a ni a. Central YMA leh Consumer Union te leh Department hotute nen joint meeting kan nei a, joint meeting thutluknaah chuan Central YMA te leh Consumer Union ten highway lampang hi chang sela, tichuan black-a Gas an tihchingpen zawng zawng hi anni hian chang sela chhu zui rawh se kan ti a. Kan thawhonaa kan thutlukna angin hma an la mai a ni tih House ka han hriattir duh a.

Tin, khuti laiah Kawnpui bulah black-na a awm an tih kha House-a an sawi tawh chuan zuk kal ilang chuan an awm tawh miahin ka ring lova. A tir khan a ruk tein min rawn hrih ni ulang chuan a that lehzual ka ring a. Tin, chutih rual chuan Pu Speaker, khiti laiah Tuikual an ti a Tuirial pawh khian an black an ti a, chutichuan zan hnih chuang an han chang a, an hmu leh chuang lova. Tunah hian hmun hrang hrangah khatiang ti tur khan kan staff te leh kan CYMA lampangten tan an la mek a ni.

Engpawhnisela Pu Speaker, Gas chungchang hi kan buaipui nasa em em a. Ka sawi tawh thin a, Amahereawhchu, kan hrethiam hlei thei thin lovin ka hria a. Gas Dealer te leh Gas Company te hi an inzawm a, keini sorkar-ah hian engmah min hriattir lova. Gas Dealer an appoint dawnin emaw, Gas Dealer an thlan dawnin emaw engmah min hriattir lova. Company ten an Agent te, an Dealer te an rawn thlang mai a ni. Tichuan an Agent ten Company-ah an lei a, comsumer ho hnenah an rawn hralh mai a ni a. Nimahsela, Gas a van tak tak chuan a tawpah chuan a bik takin sorkarte leh a Minister changtute pawh min puh thin a. A nihna takah chuan keini direct-a kan zuk involve loh avangin thiltih a harsa em em a. Amaherawhchu, chuti chung chung chuan Consumer Affairs kan nihna angin theihtawp kan chhuah a, tunah hian Union Petroleum & Natural Gas changtu Minister hnenah pawh lehkha kan ziaak a.

Tin, heti laiah North East changtu leh Mizoram changtu bik Manager te pawh an lo kal a. Gas tam zawk min pe turin kan phut a, kan ngen bawk a. Chutiang chuan theihtawp kan chhuah a. Central YMA te nen pawh kan tang ho a ni tih Pu Speaker, ka sawi duh a ni. Pu Speaker, ka lawm e.

Pu LAL THANHAWLA, CHIEF MINISTER : Gas kan tih mai hi Iraq ta, Iran ram kaltlanga kan lak a ni. Kan mamawh 75% atanga 80% hi India ram in kan lalut a. Iraq ta kha an ram a buai avangin Iran atanga kan lak a ni a. Arawn luh that hian kan hnianghnar a, arawn luh that loh hian India ram pum puiah kan buai a ni.

Tin, State dangah Sorkar an puh luai luai ngai lo. Hmanni lawkah Guwahati-ah Cooking Gas a harsa a, Nu ho chuan IOC Company an hual daih. Kan Minister zahawm takin direct-in keini hi kan telve lova Gas Agent te leh Company te inkar a ni tih hi thu dik awm sa reng, mahse Sorkar ertu tena an hriat that duh loh, tun hma atanga lo awm tawh thin a ni. Tichuan thu dik chu hemi Cooking Gas chungchangah hian Company te leh Agents te, distributor te inkar thil a ni a. Ram changkang deuhah te chuan India ramah pawh Gas chungchanga harsatna an neihin Sorkar pisa an hual lova, Supply department an hual lova, IOC te leh khatiang Company te kha an hual zawk thin, Nu ho mangangin.

*Speech not corrected

SPEAKER : Awle, Starred Question No. 34-na Dr K. Beichhua-in han zawt se.

Dr. K. BEICHHUA : Pu Speaker, ka lawm e. Ka zawhna chu Health & Family Welfare Department changtuin a chhan tur a ni a.

- a) Civil Hospital Saiha a Gynaecologist leh Peadiatrician dah theih loh chhan engnge ni?
- (b) Saiha District-a IMR sang lutuk ti hniam turin sorkar-in engtin nge hma a lak? tih a ni e.

SPEAKER : Pu Lal Thanzara, Member zahawm tak chhang turin sawm ila.

Pu LAL THANZARA, MINISTER : Pu Speaker ka lawm e. Saiha bialtu MLA zahawm tak Dr K. Beichhua zawhna chhanna

(a) Civil Hospital, Saiha-ah hian Gynaecologist leh Paediatrician dah an la nih lohna chhan chu Docotor indaih lohna nasat em vang a ni e. Remchang hmasa berah Gynaecologist Doctor hi dah a ni ang a. Tin, tunah hian Paediatrician MD dah pheina turin order sign tawh a ni. Tin, Saiha damdawiinah hian Doctor 9 an awm a chung zinga 2 te chu MOC trained an ni a, Gynae Doctor-ina a tih theih ang ti thei an ni.

b) Saiha District-a IMR sang lutuk tihnam turin sorkarin engtin nge hma a lak? tih chhanna chu Saiha District-ah hian nausen kum 1 leh a hnuai lam thi nikumah report kan hmuh zat chu 133 a ni. Nausen thi titem tura Sorkar hmalakna te chu :-

- 1) Naupang zawng zawng Health Sub-Centre-ah check up nei thei tura register vek.
- 2) Nau nei zawng zawng damdawiin a mithiamte kut ngeia nau neih tir vek tum a ni. Hemi atan hian nau nei tanpuina Janani Sishu Karyakram (JSY) leh Janani Sishu Suraksha Karyakram (JSSK) te hi Saiha District-ah te hian chak taka kalpui mek a ni.
- 3) Tin, Health Department hnuai Ambulance service te hi Nu nau nei tur leh raipuar leh nausen damlo phurh nan chuan free service pek an ni.
- 4) Nausen zawng zawng kum 1 an tlin hma ngeia natna ven theih chi, chi 7 laka vaccine pek vekna tura hmalak a ni bawk.
- 5) Health service quality a lo chak zawkna tur atan Doctor, Nurse leh Health Worker te a bik takin nau chhar leh enkawl chungchangah training pek vek an ni bawk.
- 6) IMR tihnam tur hian Health Department chauh tih theih a ni lova, public awareness leh support nasa tak a ngaih avangin hemi chungchangah hianin hmalakna kalpui mek a ni.

7) Inter-sectorial co-ordination ni 26.6.14 ah pawh khan neih a ni.

8) UNICEF partnership nena thawhho a ni bawk. Main power lamah phuisuina turin hmalak mek a ni bawk a. Tin, 13th Finance Commission atanga pawisa kan hmuh khan a tam zawk chu Chhim lampangah Health Sub-Centre te, Unit Centre te sakna tura hmalak a ni a, a hmunah kal chilhin heng ang sak dan tur hi enfel vek tawh a ni a, sakna hna hi order chhuah mai tum mek a ni. Pu Speaker, ka lawm e.

SPEAKER : Awle, Dr. K. Beichhua.

Dr. K. BEICHHUA : Pu Speaker, kan Minister zahawm takin felfai takin min chhang a, Friday ni 7.2.14 khan kan Gynaecologist leh Paediatrician dah turin ziak ngeiin dah turin lehkha ka thehltut a, tahchuan a nin tha deuhin min lo dawngsawng a, ‘kan lo dah ngei dawn nia’ a tia kan lawm viau a. Amaherawhchu, waviin thlengin kan la nei lo erawh chu ka rawn sawi ve duh a. Imoc (?) kan tih hi chu thla thum vel lek Obs and Gynae a emergency a lo enkawltu tura zuk trained mai an ni a. Chuvang chuan Gynaecologist te nena thehkhin rual an ni love tih kha ka sawi duh a.

Tunhma zawngin Saiha Civil Hospital-ah hian kum 16 ka lo thawk tawh a, Gynaecologist leh Paediatrician hi kan nei deuh char char a ni, tun kum 5 vel kaltaah hian nausen thihna hi a nasa ta em em mai a, khawvelah hianin nausen IMR sanna ber chu Somalia a ni a, 100 a ni, Central Africa, Southern Republic-ah hian 92 a ni a, Saiha hi 7-na kan ni khawvel pumpui ngaihtuahin. Chuvang chuan hetiang a nausen thih tamna hmunah hian tihdan kalphung pangngai JSY te, JSSK vaccine pek tih te, NGO awareness tih te hi chu dik tak chuan District dangah pawh kan ti vek hei hi a kalphung a ni. Chuvang chuan hetiang a harsatna a awm tawh chuan hei hi kan statistic chu a ni a. 2009-2010 inkarah khan 97 daih a ni. Khawvelah pakhatna kan ni 2011 ah 75, 2012 ah 81, 2013 ah 46 kan tlahniam deuh a, nikum atanga kumin hi 79 kan ni.

Tunah hian April atanga June thleng hi 48 kan thi leh tawh, chutianga kan thih lai chuan thuawih takin lo thi hle hle rih rawh u min ti dawn em ni? Paediatrician? new born care unit pawh kan nei tawh a, khum pali kan nei tawh a, chungte pawh chu Paediatrician tun thlengin kan la awm lova, gynaecologist awm loh a pawi zia chu hmanni, Pu Speaker, ka lo ang deuh pawn min lo hre thiam deuh la, ka vei tlat a ni.

SPEAKER : Nakinah i la ang dawn nia, hun a awm dawn alawm.

Dr. K. BEICHHUA : Thih leh dam inkar thil a ni tlat mai a. Ni 24 2 : 30 AM khan Pi Lalrinngheti kum 27 w/o John William chu Civil Hospital-ah raichehin a thi a ni. Tunlai khawvelah raicheh a thihna hi a vang tawh lutuk, sawi tur a vang tawh lutuk. Hetah pawn IMR kan ti leh ta a.

SPEAKER : Aw i zawh dawn loh chuan zawhna dangah kan kal mai ang. Zawt rawh le.

Dr. K. BEICHHUA : Aw... ka zawt nghal ange. Chuvang chuan, engvangin nge ni Sub-centre te, PHC angah te hian nausen thih reduce nan leh nau thih, nu thihna reduce nan hian hma an lak that loh? chu chu ka zawhna a ni a. Evidence ka nei vek a, sub – centre hmalak dante, Health worker ho hmalak dan te ka nei vek a, hma an la tha lo a ni. Engvangin nge preventive lamah hian chak zawka hma an lak loh?

Pu LALRUATKIMA : Pu Speaker, ka'n Supplement lawk anga. IMR chungchang kan sawi lang a, infant mortality rate chungchangah khanin a lawmawm khawpin ka hria a, khatianga min tibengvartu MLA zahawm tak kan nei kha. Hmanni lawkah infant mortality rate chungchangah kan tihthat avangin lawmman kan dawng a....

SPEAKER : Ngawi rawh, khalam a ni tawh lo, zawh belhna in neih lo chuan zawhna dangah kan kal ang....

Pu LALRUATKIMA :chuanin motor engzatnge infant mortality rate atanga lei anih tih ka zawt nghal e.

Pu LAL THANZARA, MINISTER : Zawhna neitu chhanna kha Saiha lamah sawn infant mortality rate hi a sang a ni tih chu sawrkarin a hria a, theihtawp chhuahin tihtlakhniam tumin hma kan la a. Tin, a hnathawktuten an thawh that lohna a hria anih chuan ziakin min pe selangin, tih theih kan neih ang ang kan lo ti ang. Tichuan, tunah hianin ka sawi tawh ang khanin Paediatrician, MD awm turin order sign tawh a ni, order a la chhuak lo anih pawhin tun atanga reiloteah kan dah ang. Gynaecologist pawh hi

dah kan duh, kan indaihlo a ni. Sawrkar-in kan mamawh angin doctor kan nei miao loh avangin, kan duh anga dah thei lo kan ni. Helai a awm ten tuna dah lo kan ni lo a ni tih House ka hriattir duh a. Pu Speaker, chutih rual chuan, saw lampanga infant mortality rate a tamna chhan ni a kan hriat pakhat chu, a ramri lehlampang atang hian engemaw zat hi kan hmui tel niin kan hria, chungte chuan kan IMR hi min tisang niin kan hre baw a.

Tin, Pi Lalrinngheti kha thi put tawh hnu a Damdawiin rawn thlen pui a ni, a nau neih dawnah khanin sawrkar hmalakna angin damdawi inah chuan awm selangin khatiang kha a thleng lo mai thei .

Dr. K. BEICHHUA : Ka va kal chiang a, keimah ngei ka kal a, thi put a kal a ni lo, haemoglobin hniam lutuk vanga thi a ni, chu chu preventive lam thawktuten hma an lak loh vang a ni. Sub-centre tinah hian haemoglobin test-na awm loh vang a ni.

SPEAKER : Zawhna No. 35 - na Pu Lalruatkima'n zawt se.

Pu LAL THANHAWLA, CHIEF MINISTER : Pu Speaker, ngawi rawh lawk, khawngaih takin IMR hi mizote kan hmingchhiatna ber pakhat a ni. Chuvangin central sawrkar pawhin min ngaih pawimawhpui a, plan discussion apiangin raise ziah a, chuvangin keini sawrkar pawhin theihpatawpin kan ngaihtuah a ni. Literacy rate a sang hle si, IMR-a chhe tak kan ni hi Central lam pawn min beihpui a, theihpatawpin kan bei a. Sawi leh sawi hnu mihring kan indaih loh bakah, tunah hian Damdawiin a nau neih tir turin nasataka tan lak a ni a, chumi anih loh pawhin ASHA kan nei a, chungte chu an ruai tur a ni tih a ni a, chutiang rawihna chang hre lo leh ruailote hi an tam a. Tin, keimahni ram chhung mi nilo, kan ram leilung fa nilo pawnlam a mi Damdawi tiana lo kal tam tak an awm a, chungte avang chuan tunah hian kan la chhe deuh a. Tunah hian ASHA te tal hi ruai ngat ngat sela Sorkarin a duh ang hian, tin, nau nei tur te hian Damdawiin pan hram hram theih sela a harsat deuh pawhin tun aia kan that a rinawm a. Tin, chu lo lehah chuan Zuk leh Hmuam ei leh inah kan fimkhur a ngai baw a.

*Speech not corrected

Pu LALRUATKIMA : I bial te a ni baw a, thahnem kan han ngaihpui baw che mawle, awle, ka lawm e.

Ka Starred Question No. 35-na Land Revenue & Settlement Minister zahawmtak chhan atan -

- (a) Leiman/In hmun lo ram chhiah atangin kum 2010-2011, 2011-2012, 2012-2013, 2013-2014 ah te engzatnge sum hmuh a nih?
- (b) Leiman/In hmun lo ram chhiah tunhnaiah tihpun tum a ni em?
- (c) Engvanga tihpun tum nge a nih ? tih ka zawt e.

SPEAKER : Minister zahawm tak Pu R. Romawia chhhang turin i lo sawm ang.

Pu R. ROMAWIA, MINISTER : Pu Speaker, ka lawm e. Zawhna Starred Question No. 35-na kan MLA zahawmtak Pu Lalruatkima zawhna :-

(a) Lei man/In hmun lo ram chhiah atangin kum 2010-2011, 2011-2012,2012-2013,2013-2014 ah te engzatnge sum hmuh a nih? tih chu - 2010-2011 ah hian ₹ 5,30,80,888; 2011-2012 ah hian ₹ 3,67,95,587; 2012-2013 ah hian ₹ 4,30,95,682; 2013-2014 ah hian ₹ 5,86,27,916 hmuh a ni.

(b) Lei man/In hmun lo ram chhiah tunhnaiah tihpun tum a ni em? tih chu Aw ni e. Lei man tihpun hi tum khata sang taka tihpun aiin, tlem tlema tihpun zin deuh hi sorkarin tha a ti.

(c) Engvanga tihpun tum nge a ni tih chu, tihpun tumna chhhante :

1) Land Revenue & Settlement Department-in kum khata pawisa a hmuh theih zat hi a la tlem em avangin a rate hi tihsan a, sawrkar-a pawisa tam zawk chhun luh a nih thei nan. Hei hi mipuite phurrit nasa tak thlen chuang si lovin.

2) Thil man pung zelah ram leilung hlutna a lo san zel avangin. Ram leilung hlutna a lo sang zel a, chuvangin hengah te pawh hian sorkar tan pawh han tihpun hi thiamawm hlein a lang a. Tunah hian compensation lam te a nih phei chuan a rate hi a sang vaih vaih thin khawp a, chuvang chuan Lei man pung zelah ram leilung hlutna sang zelah hian tihpun hi a tul a ni.

Pu LALRUATKIMA : Pu Speaker, Zawhbelhna. Hei, kum 2006 MNF sorkar tawp lam khan leiman hi tihpun a ni a. Khatih laia opposition member-te khan nasa takin an dodal a, Department Office Director dawhkan te kha nasa takin a chum chhia a, Gate-ah bomb te a puak a, tu tih nge tih phei chu kan hre hauh lova. Tunah

2011 ah tihpun ani leh a, chuan tun hunah tihpun turin ruahmanna kha kan Minister zahawmtak hnen atangin kan ngaithla a. A tihpunna tur rate han en vang vang hian Gazette vek tawh a ni a, a sang viau mai a, chuvang chuan, helaiah hian thahnem kan ngai lutuk deuh a, mipuite Leimanah hian sawrfu leh chuang tur hi kan awm lo a sin mawle ka ti a.

Ka sawi duh chu kan Minister pawhin lo enfiah leh se ka duh chu Pu Speaker, zawhbelhna ka neih hmian hmannah ram pakhat hming kan thlak a, 1,80,000 value a ni a, a rawn chhuak a 23,00,000 ah a rawn kal ta daih mai a, Leiman kha a let engemaw zat kha a lo ni ta a ni. A awmna lah chu a pil ril em em mai si a. Lei man/tax kan duh avang khan khatiang kha a lo ni ta reng em tih te kha ka ngaihtuahnaah chuan a awm a. Chuvang chuan, Property Tax te kuminah lak turin ruahmanna a siam a. Chutiangte kan nih lai chuan tun dinhmuna chhiah, lei man tam tak lak hi mipuite tan phurrit a ni a. Hei hi en tha lehin a zualpui Grade-III ho, Middle Class ho awmna lei man hi a pung zual bik a, a percent a sang em em mai a. Chuvang chuanin, khawngaih takin en that leh theih a ni dawn lawm ni? Hei April ni 1 atanga hman tur kha a ni a, kan la pe lo va mipuiin, kan pek meuh chuan rin aiin a tam dawn a ni. Chulai te chu min en that sak leh thei em? Middle Class Grade-III bawr vel, Grade-II tih velah khan a tam zual a. Chuvang chuan khalai kha kan Minister zawhbelhna ni pahin chu chu ka ngen duh tel a ni.

SPEAKER : Minister khan chhang se.

Pu R. ROMAWIA, MINISTER : Pu Speaker, ni e, a sang deuh hlekin kan hria a, kan en tha mek e.

SPEAKER : Kan en tha mek a ti a nih chu. Zawhna 36-naah kal ila.

Pu LAL THANHAWLA, CHIEF MINISTER : Pu Speaker, helam i hawi thin lo va, saw lam chauh saw i duh sak a i hawi a, i hre thei thin lo va. Chuvangin hawi tawn thin la a that ka ring.

MNF hun lai khan chhiah tihpun tumna sang tak a awm a ni. Chu chu kan duh lo va, khatia dik lo taka lo dodaltute chu kan hriatpui lo va, kan party hming tihchhiat tumtute an ni ang tih ka ring a. Chuvangin sorkarah pawh kan hek a, an chhuichhuak ta lo nge, chhuichhuak ta nge, an hrem ta nge ka hre zui lo va. Chief Minister hnenah delegation kan tir a. Ani pawh kha a

lo fel khawp a, a lo hrethiam hle a. Kan hotute han hmutute kha a tihlem a, a rate siamdan tur rawtna siam turin a lo ti then a. Tichuan rawtna an siam ang deuh khan sorkar kha a kal ta a ni tih he House hi ka hriattir duh a.

Tin, tunah hian kan tihpun ve ngei ngei hi a hun tawh a, a chhan chu India ramah hian State rethei ber e ti lo chuan chhiah hi kan pe tlem ber niin ka hria a. Tin, hemi Land Revenue phe chu kan pe tlem khawp a. Khu Kolkata a Rajarhat an tihah khuan Communist sorkar lai khan ka thiante an tlak dawn lampangah khan ka thian Minister te ram ka dil ve a min pe a, hemi In pawh hi a tiat lovang, a chanve vel hi a ni ang. Chu chu kan neih dawn tak tak chuan Pisa pali pangaah keimah ngei ka kal a ngai a. Tin, registration chumi khami an han ti neuh neuh a, a tawpah chuan nuai 20 thelh ka seng a ni. Chuta tang chuan ka ngaihtuahna a thui khawp a, keini ram rethei berah engati nge vawiinah LSC kan la chhuak a, naktukah kan hralh leh a, Sorkarin hlawkna pakhatmah a nei lo va. Chutiang zel chuan In sak dawnah pawh chutiang chu a ni.

Tin, boundary-ah buaina a awm lohna turin In sak dawnah chuan hung hmasak zel a ngai Delhi-ah te pawh a ni. Chuvang chuan khatiang kha sorkar hian a ngaihtuah a hun ve tawh a, tunah kan Minister leh Department hotuten khatiang zawnga an ngaiha tihpun an rawn rawt te pawh hi a lutuk a awm anih chuan chu chu en that an tum mek a. Tih loah chuan mipuite hi kan zirtir a ngai a, Bible pawhin a remti a ni.

*Speech not corrected

SPEAKER : Awle, zawhna 36 - na Pu R.Vanlalvena'n zawt se.

Pu R.VANLALVENA : Pu Speaker, ka lawm e. Ka Starred Question No.36 na, Health & Family Welfare Department Minister zahawm tak chhan atan –

Damdawi tha leh tha lo enna (Laboratory) Mizoram sorkar hian a nei em ? Nei lo ta se, nei ve tura hmalakna a awm em ?

SPEAKER : Minister zahawm tak Pu Lal Thanzara chhang turin sawm ang.

Pu LAL THANZARA, MINISTER : Pu Speaker, Aizawl South-I bialtu zahawm tak Pu R.Vanlalvena Starred question No.36 chhanna chu – Nei lo, hmalak mek tih a ni. DoNER atangin hemi nei tur hian pawisa kan ngaihtuah mek a. RIPAN hovin an nei a, saw saw a tulah chuan kan hmang tangkai thin.

SPEAKER : Zawhbelhna a awm loh chuan zawhna 37-na MLA zahawm tak Dr.K.Beichhua'n zawt se.

Dr.K.BEICHHUA : Pu Speaker, ka lawm e. Ka zawhna chu GAD Minister zahawm tak hnenah a ni. Saiha hi ka ti deuh chhen mai a min lo hrethiam ula. A hla em bawk a, tin kan la hnufual a. Tin, ka bial hi ka vei ve em bawk a, a hmasain min hrethiam turin Pu Speaker, ka dil a che. Saiha D.C Office building sak that tumna a awm em? tih ka zawt e.

SPEAKER : Chief Minister zahawm tak sawm ila.

Pu LAL THANHAWLA, CHIEF MINISTER : Pu Speaker, MLA zahawm tak Dr.Beichhua zawhna chhanna chu - Kum 2011 atangin sak that tumna chu a awm a, sum lam harsatna avangin tun thlengin kan la tipuitling thei lo a ni.

*Speech not corrected

SPEAKER : Zawhbelhna a awm em?

Dr. K. BEICHHUA : Pu Speaker, zawhbelhna ni lovin, kan Chief Minister zahawmtak hnena ngenna – UT hun laia ram buaiin a nuai hrep tawh IAS thutna office saw a chhe tawh khawp mai a. A chung a chhe vek a, a chhuate pawh saw a tla bal deuh vek ti tih tawh a. Chuvang chuan, engpawh nise, DC Office chauh pawh ni lovin, Government building hrim hrim saw a hma-a kan sawi tawh angin a chhe viau tawh hlawm mai a. Engpawh nise, min duhsak se, theihtawp min lo chhuahsak a, a hma lama hma min lak sak turin ngenna ka siam e. Ka lawm e.

SPEAKER : A lawmawm e. Zawhna No. 38-na zawt turin Er. Lalrinawma, MLA zahawm tak i lo sawm ang.

Er. LALRINAWMA : Pu Speaker, ka lawm e.Food, Civil Supplies & Consumer Affairs Department changtu Minister zahawmtak chhan atana ka zawhna -

a) Food Security hi Mizoramah hman tumna a awm em ?

b) Hman nita se sum engzatnge sen belh ngai ang ?

SPEAKER : Minister zahawm tak Pu John Rotluangliana i lo sawm ang.

Pu JOHN ROTLUANGLIANA, MINISTER : Pu Speaker, Member zahawm tak Er. Lalrinawma Starred Question 38-na a)-na chhanna chu – Hman theih dawn leh dawn loh ngaihtuah mek a ni tih a ni a. Hei hi khulam Central Sorkar-in ti tura minrawn tih ang ang a ti tur kan ni a. An thu leh hla kan ngaichang mek a ni.

b)-na chhanna – Food Security Act hian Mizoram mipui zawng zawng a huam thei dawn lova, tuna minrawn tih ang chuan mihring 706000 chauh huam tura tih a ni a. Tuna kan kal danah hian Mizoram pumpui mihring zawng zawng a huam vekin ration kan sem a. Tichuan, tuna kan normal allocation ah hian kan indaihlo a, buhfai hi a man tlawm hmuh theih ang ang atangin 80,000 quintal vel thlatin lei belh thin a ni a. Tuna Food Security min tih tir hian Government of India-in additional allocation min pe dawn nge dawn lo tih kan la hre chiang lova. Tin, Retailer margin te, loading/unloading charges leh inter-state transportation cost te Central Sorkar-in a tum dawn em tih hi chian a la nih loh avangin a sen belh zat tur hi chhut chhuah fak hleih theih a la ni lo.

Pu Speaker, zawhbelhna pawh a la nei mai thei a, chumi hma-a ka han sawifiah duh chu kar hmasa Zirtawpni 4th July khan Food Minister Conference kan nei a. Chutah pawh chuan he Food Security Act hi sawi chhuah a ni a. Kan harsatna hlawm chu Food Security Act hian helaia loading charge te, Retailer margin te leh Inter-State transport cost te hi min pek dawn leh dawn loh tih hi kan buaina a la ni a. Engmah Central-in thutlukna a la siam loh avangin hei hi hma kan la la viau thei lo a ni tih ka'n sawi tel duh a ni e.

SPEAKER : Zawhbelhna.

Er. LALRINAWMA : Pu Speaker, ka lawm e. Kan Minister zahawmtak chhan atan ka'n zawh leh duh chu – Tunah hian buhfai chungchang bikah hian special permit kha

tihtawp a ni a. Thingtlang lamah te a bik takin kan buai khawp mai a. A chhan chu, special permit an pek chhuah thin kha tihtawp a nih tak avangin, inneih leh vantlang ruaitheh angha te hianin buh kham khawp kan thar baw si lova, mipui kan buai a ni ringawt mai a. Hei hi a thlah dul leh dan a awm em tih ka'n zawt a ni e.

SPEAKER : Aw le, a changtu Minister-in chhang se.

Pu JOHN ROTLUANGLIANA, MINISTER : Pu Speaker, tunah hian thlakhatah Zokhaw lamah mi pakhat tan 8kg pek an ni a. Tin, Food Security Act hi kan hmang dawn a nih pheih chuan 5kg chauh pek tur an ni. Chuvang chuan, Party thenkhatten Food Security Act hi hmang ve tur leh hmang ngei ngei tur anga an rawn demand hi an chian loh vang niin ka hria a. Mizoram tan chuan he Food Security Act hi a chhenfakawm viau dawn lo a ni tih ka'n sawi hmasa duh a.

Tin, special permit tihtawp chungchangah hian thingtlang lamah hian an buai viau tih pawh kan hria a. Amaherawhchu, ruai theh dawn te, mo neih dawn te, lungphun dawn te hi chuan buhfai hi chu a man a tlawm ber a, daihzai ber baw si a, Bazar atang pawhin lei ve mai awmah ka ngai a ni. Bawng te, vawng te a man a to tehlu nen an lei thei si a. Buhfai special a tih tum tlat hi a tha lo. Buhfai hi a man tlawmin a daih zai zawk si a, hengah hi chuan sorkar hi min pur lo hram se tih hi ka han ngen zawk a ni e.

SPEAKER : Zawhna pakhat kan la leh hram ang a. No. 39-na Pu Lalruatkima zawhna a ni a, han zawt sela.

Pu LALRUATKIMA : Pu Speaker, ka lawm e. Ka Starred Question No. 39-na Finance Minister zahawm tak chhan atan:-

- a) Kum 2011-2012, 2012-2013, 2013-2014 ah te khan Sorkar-in leiba engzatnge a neih?
- b) Tun dinhmunah Sorkarin leiba engzatnge a neih?
- c) Leiba tihnam turin sorkarin engtingnge hma a lak?

Pu LALSAWTA, MINISTER : Pu Speaker, ka lawm e. Pu Lalruatkima zawhna chhanna chu hetiang hi a ni:-

- (a) Kum 2011-2012 atanga 2013-2014 chhunga kumtina Sorkar leiba chu a hnuai mi hi a ni:-

- | | | |
|---------------|---|----------------|
| 2011-2012 | - | 4548.45 crore |
| 2012-2013 | - | 5114.20 crore |
| 2013-2014(RE) | - | 5334.81 crore. |
- (b) Tun dinhmun (2014-2015) a Sorkar leiba zat tura ruahman chu cheng 5651.27 crore a ni.
- (c) Sorkarin leiba tihnam turin hetiang hian hma a la mek:
- i) A tul tawpah lo chuan loan lak loh a tum thin.
 - ii) Tunhma lam atanga leiba lo tlingkhawm te hi rulh hun nei vek a ni a, hengte hi a hun taka rulh zel a ni.
 - iii) State-in kan thawhchhuah ve tur State's Own Tax leh Non- Tax Revenue te a theih ang anga tihpun zel tum thin a ni.
 - iv) State-in sum hnar thar Additional Resource Mobilisation (ARM) kan neih theih ang apiang zawn belh zel turin tak lak reng a ni.
 - v) Non-Plan Revenue Expenditure theih ang anga tihlem zel tum a ni.
 - vi) State sorkarin tunhma atangin loan chi hrang hrang kan lo lak thin zinga interest 9% chin leh a chunglam (High Cost Loan) GOI rulh sak kan dil a 216.73 crore lai ADB loan a grant portion atangin kum 2011-2012 thlengin rulh a ni.
 - vii) Kum 2009- 2013 chhung hian leiba neih belhna tur zawngin sorkarin School upgrade hi kum 5 chhung hian a nei lova, IR Battalion din belh pawh a nei lo chauh ni lovin, vacancies engemaw zat chu tihkhah lovin a insum ve ngar ngar a ni tih kha ka chhanna a ni e, Pu Speaker.

SPEAKER : Awle, zawhna hun a ral a. Business dangah kan kal tawh ang a. Kan Conduct Rules-in a neih lem loh Special Mention Pu Lalruatkima'n a dil a, kan ngaihpaawimawh sak a, ani hian special mention hi thil dang kan tih leh hmam lo la lawk sela. Zirlai college admission chang lo tam tak an awm chungchang sawi turin ilo sawm ang u.

Pu LALRUATKIMA : Ka lawm e. Pu Speaker, i remtihna leh he House zahawm tak remtihna Special Mention ka rawn dilna min tihhlawhtlin sak avangin ka lawm e.

Kan kalphungah a ziaak a kha kan Minister zahawm tak te leh Speaker te hnena thehluh tur a tih avangin a ziaak a chhiar mai tur a tih anih avangin ka'n chhiar mai ang e.

Mizoram chhunga class XII pass thar tam tak ten college admission an chan loh avangin nimin 9th July, 2014 atang khan MZP bul tumin Directorate of Higher & Technical Education kawtah tiam chin awm lovin admission an hmuh theihna turin sorkarah ngenna siamin

an lungawi lohna an lan tir mek a, tun dinhmunah hian zirlai college admission la hmu ve lo MZP in a chhinchhiah zat chu mi 409 zet an la awm a ni. Zirlaiten college admission an hmuh ngei theih nan MZP te hian theih tawp chhuaha hma lak sak zel an tum a ni.

Mizoramah zirnain hma nasa taka a sawn lai hian kumtin zirlai admission chang lo thahnem tak an awm ta fo mai a, zirlaite harsatna hriain sorkar pawhin theih tawp chhuahin ruahmanna a siam thin a, Mizoram chhunga college te hian 1st July, 2014 atang khan zirna an tan tawh a, tun thlenga hetiang zat zirlai admission chang lo an la awm avang hian MZP hruaitute leh Hon'ble Minister, Higher & Technical Education te, Secretary leh Director te nen zirlaite harsatna hi sutkian tumin hma an lo la tawh thin a. Amaherawhchu, vawiin thlengin zirlaite harsatna hi chin fel sak an la ni ta chuang lo a ni.

Tun dinhmunah college engemawzat chuan building an sa mek a, chuvang chuan, building, classroom leh zirtirtute hian an indaih zo lo tih chu sorkar ngaihdaan a ni a. Aizawl khawpuiah hian college pariat (8) awmin zirlai 3455 an nei mek a, Aizawl khawpui pawnah hian college 12 an awm bawka a ni. Zirlai tam tak hian Aizawl khawpuia college kal hi a environment avang leh khawsak awlsam zawk avangin an duh a, Aizawl khaw pawn college a kal tur hi chuan chenna in leh college hostel te a awm loh avangin harsatna tam tak a awm a ni. Mizoram college thenkhat hian UGC, DoNER leh NEC atangin building sakna tur sum an hmu a, PWD in sakna hna hi an thawk a, chak zawka in sak hna hi PWD te hian an thawh a tul hle a ni. A bik takin Government Zirtiri Residential Science College te chuan Durtlang Leitan-ah hmunhma tha tak neiin Administrative building leh Academic building sakna tur ram zau tak an nei a, Amaherawhchu, sum leh pai an neih mai loh avangin building sakna turin sorkarin priority pe a ngaihtuah ran ni thei se, zirlaite harsatna sutkian sak nan hian a pawimawh hle dawn a ni.

Govt. of India chuan hmalakna thar Rashtria Utchatar Shiksha Abhiyan 'RUSA' an tih chu Higher Education hmasawna turin a nei a. RUSA hian Higher Education Institution tihhmasawna tur leh tihchangtlunna turin ruahmanna tam tak a keng tel a ni. A bik takin, hnam hnufual leh Scheduled Caste, Scheduled Tribe te leh OBC te hamthatna tur a keng tel a. RUSA hian NE te tan funding State matching share 10% a ngai thung a, State matching share chhun hma hi chuan a dang hi hmuhtheih a ni lo a ni. Hetianga sorkar laipuiin zirna tihhmasawna tura ruahmanna a neih hi Mizoram sorkar hian bawhzui chak se, college hrang hrangte leh zirlaite harsatna sutkian nan hian RUSA hi hman tangkai thiam a tul tak zet a ni. Tun dinhmuna zirlai mangang taka awm mekte harsatna hi sorkarin rang taka sukiang tura hma a lak hi a tul tak meuh a ni. Zirna chhunzawm chak zirlaite nun beidawnga kan siam mai lohna turin sorkar hian college an kal ve theihna turin hma a lak hi a tul tak zet a ni e. Khati zawng kha ka sawi theih chu a ni e. Pu Speaker, ka lawm e.

SPEAKER : Sawiho chi pawh a ni lem lova. Tunah chuan kan tih tur dang Laying of Papers-ah kan kal tawh ang a.

Pu R. ROMAWIA, MINISTER : Pu Speaker, khawngaih takin Member zahawm takin a sawi kha Minister ka nih anga engemaw chen keima dawhkana ka hriat atanga han sawi ve kha House tan leh mipui tan a thain ka ringa, sawi min phalsak chuan ka lawm khawp ang.

Member zahawm tak thahnem ngaihna kha a lawmawm a. Kumin pawl 12 result kha percent a tha khawp mai a, a lawmawm em em rualin keini College lam enkawltu chu kan buai nghal a. Minister ka nih angin Principal zawng zawng Aizawl vela mi te leh Higher & Technical a kan Director te leh Secretariat lama kan Officer te kan inko khawm vek a.

Hetiang hi kan dinhmun a ni a, tunah hian UGC norms kan hmang tawh lehngal a, semester system in kan kal a, attendance hi a pawimawh em em tawh mai si a, classroom hi tawt taka inhnawh, a hnawh thei thei inhnawh mai mai hi a rem tawh lova, heti laiah hian engtin nge kan inpawhfan theih dan tur tih ngun takin kan sawiho va.

Member zahawm tak ten in hriat atan hetiang tamtaka inhnawh kha a tul rual rual khan a Torch bearer deuh hlekin Hrangbana College leh Aizawl College hi chu naupang pawhin an kal chakna ber leh a panna nuam ber a ni chungin quantity kan mamawh rual hian quality hi a tul si a. Kan ram education a Torch bearer, college education a Torch bearer ang deuh hlek tur pawh a zuah deuhah hian tang se, anni hi chu admission ah pawh lo duhtui thei ta se tiin kan ngaihtuah a. A dang erawh chu kan zirtirtuten thahnem an ngai khawp mai a naupang chuang an lo awm hian (drop out) an lo tam hian ram pumpui tan problem a lo ni a, fan theih tawpin kan fan ang an ti a. Tiang chuan fan theih tawpin han fan tang tang mahse a lo harsa khawp mai a. Member zahawm takin a sawi ang khan nikum lama kan number aiin Aizawl khawpui chung college 8 ah ringawt pawh 858 in admission kan inzauh tawh a ni.

Mahse chuti chung chuan a la leng lo ta zel a, zirlai hoten 406 te hi admission hmu lo an la awm a ni an rawn ti a. Tichuan Principal ho meeting Zoram pum huapah khan kan han ti leh a, chutah chuan Saiha an khat a, Lawngtlai an khat a, Lunglei-ah J.Buana College leh Lunglei Govt. College an khat a, Serchhip te, Champhai te, Kolasib te, Zawlnuam te, Mamit te college 10 emaw 8 emaw lai kha an lo la thawl a. Chutiang chuan a la thawlah hian kal mai hlawm sela, Mizoram chung a nih chuan a hla lutuk a awm hlei nem, ni khata ban phak loh lah a awm lova. Chutiang chuan naupangte pawh hi kan MZP hotute pawh hian seat la awm awmah hian lo ngaihtuahpui mai sela tih kha kan hotutena an appeal dan a ni a.

Mahse, Hrangbana College-ah kher Aizawl College-ah kher, Aizawl khawpui chhungah kher tih aw kha a lian riau mai a, khatiang kha chu khawvel education system a tih ngai loh a ni a. Kei hian Cambridge College-ah lut duh ringawt ila ka zuk lut pha lo hrim hrim a ni. Delhi University-ah pawh zuk luh tum ila University ka thlanah te khan ka lut thei lo hrim hrim a ni. Chu chu khawvela education institution kal phung a ni a. Chutiang a nih avang chuan Aizawl khawpui kan College 8 ah hian kan accommodate vek thei lo a ni, zep thu awm lo.

Amaherawhchu, kan hotuten an han lakhawm leh thin a, thingtlang lam (ti tawh mai ilangin) ah hian seat 544 kan la accommodate thei, zirlai kha 409 seat chang lo an tih lai khan, seat 544 kan la accommodate thei a ni. Chu chu kan dinhmun a ni a. Tin zirtirtu qualified tho kan dah a, tin building pawh a then phei chu Aizawla kan building thenkhat aia tha zawk te pawh a ni a.

Chutiang chu kan Aizawl khawpui chhunga kan zirlaite chuan an la take up ta ngar ngar a, Aizawlah kher an la ti ta ngar ngar hi enge mawni an motive aw, kan sorkar min tihmualpho hrim hrim tumna em ni? A nuapang hi lehkha zir turin an lo duhsak tak tak lo deuh em ni zawk, theih ang tawpin intanpui sela, khi lamah awmna a awm lo an tih pawhin khi lama an Principal te leh khi lai khawtlang hotu kan NGO te, tuna kan MZP branch ngei te pawh nuapang chuti zat accomodation turin lo buaipui teh u, lo inpeizawn teh u, ti tal te pawh hian Pu Speaker, 544 seat la awlah hian 409 hi chu accommodate theih dan hi chu a awm dawnin kan hria a. Mizo tlawmngaihna pawhin kum khat chhungte chu MZP, YMA hotute pawn lo mikhual ta sela tih te kha kan ngaihtuahnaah a awm a. Heti lai Aizawl baw maia inhnawh mup mup mai hi kan tih dan ber tur a ni angem? Duhna ber sikula luh kher hi sorkarin a tih theih siloah chuan ngaihtuahna thar an hman ve hi a tul a ni tih hi kan ngaihtuahnaah a awm a ni.

Tin, chutichungin seat 858 a kan inpawtfan tawh chung pawhin Aizawlah pawh ngaihtuahna kan la hmang ta zel a, Aizawl North College in Trade & Commerce building hi an la luah lo baw a, hetilai hi tih theih dan hram a awm lawm ni? tiin an lo inbia a. Trade & Commerce Minister zahawmtak khan kan harsatnate min hriatthiampuiin thu lawmawm tak mai a chhuah a, chutiang chu kan dinhmun a nih avangin hetilai Aizawlah pawh engemawzat chu kan accommodate theih kan ring a.

Tin, Aizawl College bikah chuan common room a la ruak a, common room-ah hian class room hawng rawh u, tiin min rawn nawr leh a, mahse an MSU te nena indawr turin kan ti a. Mahse, college ve reng ruang common room neih loh chu, tih vel kha kan boruak a ni a. Tun maiah pawh kan Commissioner hovin kan la sawiho zel a, kan ngaihtuahna pui ber zawkah chuan drop-out an lo tam hian law and order problem te, hetiang mi beidawng kan ramin a siam tam hi a paw em em dawn avang khan kan han inpawtfan ta zel a ni a. Hei hi kan dinhmun mek a ni a, kan member zahawm takin khatiang thahnem min rawn ngaihpu kha a lawmawm a.

Chumi rual chuan kan inpawhfan theih tawkin Higher & Technical chu kan inpawhfan dawn a ni tih min hriatpui ka duh a.

Tin, RUSA chungchang kha chu inthlan ten min rawn nang a, duh angin hma a lak chak theih lova, inthlang State ho chu kan hnufum deuh zel a. Khami RUSA a beisei ang khan State Higher Education Council kan siam a. Chutiang chuan Detail Project Report engkim ti turin Consultancy firm te pawh kan thlang fel tawh a. Chungte chuan an buaipui char char a, Consultancy firm ten an Detail Project te an rawn zawh hunah State Higher Education Council ten thlirin khuti lamah kan zuk pulut ang a. Khuti lama kan putluh a, pawm chin a awm atang khan pawisa chu a rawn haw thei turah kan ngai a. Tin, kan sorkar pawh hian education hi a ngaihpawimawh em avangin sorkar lam atanga lo do let hi chu harsa lo turah kan ngai baw k a. Tun maiah chuan khatianga han hmuh theih chu a awm lova mahse hmalam panin kan kal zel a.

Tin, Pu Speaker, ka bial Zirtiri Science College hmun tur Durtlang khi kei ber hi a nghakhlel ka ni a, kan sorkar hian Leitanah khian rawn sa thuai se, tan muah muah tawh ila tih hi ka duh dan a ni a. Mahse sum harsatna avangin Administrative block-te leh classroom ang kha kan la ti mai thei lova, hengah te pawh sorkarah kan la beisei zel a ni a. Chutiang chu tun kan dinhmun maiah chuan kan ram pumpui admission chungchanga kan harsatna a ni a. Kan beiseina, inngahna erawh chu member zahawm takin a sawi ang khan RUSA ah khan RMSA, SSA-in indaihlohna a rawn phuhruk angin kan college indaihlohna te min rawn phuhruk hunah chuan building tha zawkte leh changtlung zawk pawh neiin kumtin Zoram pawl 12 rawn pass chhuakte, Zoram pawn an duh lo a, Zoram chhung an duh a nih na na na chuan, tun atanga reilote nakum emaw, nakum kum leh lamah chuan lo accommodate vek thei turin kan inring a.

Tin, chubakah Pu Speaker, eizawna tinzawn hi kan sorkarin a ngaihpawimawh a, Polytechnic hi tunah Lunglei-ah leh Durtlang-ah kan nei a. Tin, District hrang hrang pariatah hian nei tura inpuahchah mek a ni a, Kolasib leh Champhai hi kan hawng thei tep tawh a, henga kan Polytechnic chhuak te hi placement lamah hian harsatna an taw k lo a, kan lawm khawp mai a. Zirna tluanga B.A emaw M.A emaw an niha hna awmlo ai mah hian kan fate ho, kan tute ho hian eizawna tinzawn lam hi an ngaihtuahnaah hian hmang tam sela, chutiangah chuan sorkar pawhin kan thahnemngaihna hi tilian belh zelin, chutiangchuan kan ram hi kan kal fuh ang em? tih thleng pawh hian kan ngaihtuahnaah a awm baw k a ni. Pu Speaker, ka lawm e.

SPEAKER : A bengvar thlak viau e. Tunah chuan Laying of Papers-ah kan kal anga, Pu Lalsawta Minister zahawm takin a ministry hnuuia paper panga Table of the House-ah hian rawn lay sela.

Pu LALSAWTA, MINISTER : Pu Speaker, i phalna leh House remtihain heng a hnuai a paper te hi he House zahawmtakah hian ka rawn lay e –

- 1) The Mizoram Audit Manual, 2014.
- 2) The Mizoram Chit Funds Rules, 2014.
- 3) The Mizoram State Government Employees Group Insurance Scheme, 2014.
- 4) The Mizoram Local Funds (Accounts & Audit) (Amendment) Rules, 2014.
- 5) The Mizoram Lotteries (Regulation) (First Amendment) Rules, 2014.

SPEAKER : A copy kha member zahawm takte hnenah sem ni se. Tunah MLA zahawm tak Pu K.Sangthuama lay turin sawm ve leh ila.

Pu K.SANGTHUAMA : Pu Speaker, i phalna leh he House zahawm tak remtihain heng a hnuai a statements te hi House ah hian ka rawn lay e –

- 1) Statement of Action Taken on the Further Recommendations of Public Accounts Committee contained in the 17th Report, 2011 relating to Transport Department.
- 2) Statement of Action Taken on the Further Recommendations of Public Accounts Committee contained in the 26th Report, 2013 relating to Food, Civil Supplies & Consumer Affairs Department.
- 3) Statement of Action Taken on the Further Recommendations of Public Accounts Committee contained in the 27th Report, 2013 relating to Health & Family Welfare Department.
- 4) Statement of Action Taken on the Further Recommendations of Public Accounts Committee contained in the 28th Report, 2013 relating to Taxation Department.
- 5) Statement of Action Taken on the Further Recommendations of Public Accounts Committee contained in the 29th Report, 2013 relating to Health & Family Welfare Department.
- 6) Statement of Action Taken on the Further Recommendations of Public Accounts Committee contained in the 30th Report, 2013 relating to Horticulture Department.

SPEAKER : A copy kha sem ni se. Tunah chuan Presentation of Reports kan nei ang a, a reports theh lut tur hian a neitu Pu Lalrinliana Sailo a damloh avangin Pu Ngurdingliana, MLA zahawm tak a authorized a, amah lo sawm ila.

Dr. NGURDINGLIANA : Pu Speaker Sir, with your permission and with the consent of the august House, I present the first Report of Committee on Estimates on the Action

taken by the Government against the recommendations contained in the Committees first Reports on the Table of the House. Thank you Sir.

SPEAKER : A copy kha sem ni se. Tunah report dang Pu R.L.Pianmawia, MLA zahawm tak thehltut turin i sawm ang.

Pu R.L.PIANMAWIA : Pu Speaker Sir, with your permission and with the consent of the august House, I present the first Report of the Committee on Government Assurances relating to the 13th and 14th Session of the Six Legislative Assembly of Mizoram on the Table of the House. Thank you.

SPEAKER : A copy kha member zahawm takte hnenah sem ni se. Tunah chuan Legislative Business-ah kan lut ang a. Kan Home Minister zahawm tak Pu R.Lalzirliana kan sawm ang a, aniin “The Mizoram Liquor (Prohibition & Control) Bill, 2014” hi introduce turin House phalna rawn dil phawt se.

Pu R.LALZIRLIANA, MINISTER : Pu Speaker, ka lawm e. ‘The Mizoram Liquor (Prohibition & Control) Bill, 2014’ hi he House zahawm takah introduce ka rawn dil e.

SPEAKER : Aw, introduce a rawn dil a, kan phalsak mai em? Aw, kan phalsak a, introduce turin tunah ilo sawm ang.

Pu R.LALZIRLIANA, MINISTER : Pu Speaker, “The Mizoram Liquor (Prohibition & Control) Bill, 2014” hi he House zahawm takah ka rawn introduce e.

SPEAKER : A copy kha sem nise. Kan nei vek tawh maw? Kan neih vek tawh chuan tunah chuan he House ngaihtuah atan rawn pulut se.

Pu R.LALZIRLIANA, MINISTER : Pu Speaker, The Mizoram Liquor (Prohibition & Control) Bill, 2014 hi vawiinah he House zahawm taka pulut thei a Pathianin hriselna te min pek avangin lawmawm ka ti a. Hmanniah tawngtai rual zan khan Pathian hnenah

ka tawngtaina Facebook-ah te leh khawi khawiah emaw fiamthu ti tak deuh a lo sawite pawh an awmin ka hria a. Kha kha ka fiamthu lova, Pathian hnenah keima fianrial pawha ka tawngtaina, khami hun pawha Biak in thianghlina Pathian ka pawlna a ni tih kha Zoram mipuiten min lo hriatsak turin ka ngen hmasa a. Tin, The Mizoram Liquor (Prohibition & Control) Bill, 2014 hi helai House-ah leh kan ramah hman ve a tulna han sawi tur hian tunhma lam thilte han sawi deuh rih a ngai dawnin ka hria a. Chuvangin, hunte pawh ren lova min pek ka beisei a.

January ni 21, 1972 a Mizoram U.T. a lo nih hnua Legislative Assembly hmasa berah chuan Mizoram Excise Act, 1973 chu siam a ni a. Chu Mizoram Excise Act, 1973 chu a rules te nen ni 10, October 1984-ah hman tan a ni ta a. He dan hnuaiah hian Aizawl-ah sorkar phalnain zu dawr 10 leh bar 4 a awm a, Lunglei ah zu dawr 4 a awm bawk a. Tin, Aizawl-ah zu wholeseller 2 an awm bawk a ni. Khang thil te kha a rei deuh hlek tawh avangin helai House a Member zahawm tak te hi han hrih nawn leh thain ka hria a. Tichuan Mizoram chu February 20, 1987 ah State puitling alo ni ta a, Mizoram Excise Act, 1973 chu tha tawh lova hria a nih avangin zu avanga harsatna lo awm te sukiang turin Legislative Assembly chuan dan khauh zawk, Mizoram Excise Act, 1992 chu a siam a, Amaherawhchu Mizoram Excise Act 1992 chu hman a ni ta lo a ni. Mizoram Excise Act, 1973 leh Mizoram Excise Rule, 1983 hnuaiah khan dan lova zu siam, zu kawh, zu zuar leh zu phur te chu kum 2 thleng tan leh pawisa chawi tir a hrem theih a ni a. Zu in leh rui te hremna erawh chu a awmlo a ni. Heti chung hian Aizawl leh khawpui lian deuh deuhah te phalna nei lova zuar leh sa an tam hle a, Excise department chuan indaih lo takin heng phalna nei lova zu sa leh zuar te man hna an thawk reng bawk a. Zu hman sualna do tula hriaatna alo zual zel a. Mizoram Excise Act, 1992 chu hmang ta lem lovin zu khap burna dan ‘The Mizoram Liquor Total Prohibition Act, 1995’ leh ‘The Mizoram Liquor Total Prohibition Rules, 1996’ chu Pu Lal Thanhawla sorkarin pass-in February ni 20, 1997 khan hman a ni ta zawk a. Hetiang anga thil lo chik tak te an awm avangin a lawmawm khawp mai.

Tichuan he dan hi Autonomous District Council pathumah te chuan hman ve a nilova, MLTP Act hnuaiah hian security force te hnenah Liquor Licence pek a ni a, tuna licence nei mek te chu Aizawl District-ah hian 457 Field Ambulance te, 39 AR te, Head Quarter CE Project Pushpak te, Headquarter, 24th BRTF, Seling, Tlangnuam te, DIG Headquarters, BSF, Durtlang te, 173 BSF Headquarters Mizoram Range, AR Khatla te, 40 AR te leh 96 BSF te leh 142 Battalion BSF te an ni a, Serchhip ah hian 4th AR leh Kolasib-ah hian CIJW School, Vairengte, avaiin tunah hian Mizoramah zu permit nei hi 12 an awm a ni. Tichuan MLTP Act hmangin doctor in damdawi atan zu a chawh thei a, chutiang prescription hmanga liquor permit nei te chu civilian 214 leh Ex-servicemen 2162 an ni a, civilian te hian confiscated liquor dahna Departmental store atangin an lei a, Ex-servicemen te hian sipai canteen store atangin an lei ve thung a ni.

Prohibition chu a tir lamah hlawhtling viauin lang mahse thawktu indaih loh avang te, mi man te an tan rei loh avang te leh jail indaih loh avang te in hun an rei deuh chuan zu chu alo tam ta hle a, tlawmngai pawl te pawhin dovin hma an la nasa a, Excise and Narcotics Department te leh Police Department-te zu man chu a pung tual tual a ni.

Champhai District hmun thenkhatah khian kum 2000 vel atang khan grape an ching nasa a. Heng an grape chin te hi wine atan an bilh mai a. Chung wine te chu man theih vek a ni a. Mahse a chingtuten an tawrh ai chuan haider a ni a. Dan anga license pek a that zawk dawn avangin Section II of MLTP Act chu siamthain ‘The Mizoram Excise & Narcotic Rules, 2008’ siam a ni a. Chumi hnuah chuan Champhai Grape Grower Society leh Hnahlan Grape Grower Society te chu winery license pek an ni a, 2010 atangin wine pawh an siam chhuak ta nghe nghe a ni.

Rules 16 of MLTP Rules 1996 hnuaiiah hian State Prohibition Council leh District Prohibition Committee te din a ni a. Council leh Committee te tih tur chu hengte hi a ni a. Prohibition dan kenkawh chungchanga sorkar thurawn pek te Total Prohibition rah chhuah chik taka zira state sorkar-a chak zawka hmalak dan tur thurawn pek te, thla thum dan zel a thukhawmin phalna neilova zu sa te, kawh, hralh leh in leh tawlhru te, zu rui tam leh tam loh te sawihovin sorkar lo en zui atan an theh lut leh thin bawh a ni. Prohibition Committee chu Prohibition Council hnuaiiah a thawh ang a, Council hian a tul chuan Committee tih tur a tuk thei ang tih te a ni a.

Tichuan kum 14 lai zo leh zo lova zu khapna dan hman a nih takah chuan sorkarin January, 2011 khan MLTP Act 95 kenkhawh hlawhtlin dan leh hlawhtlin loh dan te zirchiang turin Study Group of MLTP chu a din a. Pu H. Raltawna, IAS Rtd. Chu Chairman niin, Commissioner, Excise & Narcotics chu Member Secretary a ni a. Political Party aiawhte, NGO atangtein an aiawh he Study Group ah hian an tel bawh a ni. Khawlai titi leh engemaw mai maia ngaih dan siam nan hmang lovin he Study Group hian Department of Psychology, Mizoram University chu research nei a, zuin Mizo-te a nghawng dan lo zir turin a ngen a. Anni chuan khaw hrang hrang leh Aizawl veng hrang hrangah te zir chianna an nei a.

Tin, NGO hrang hrang, YMA te, MHIP te, MUP te, Mizoram Bar Association te, Mizoram Academy of Letters te, Mizoram College Teachers Association te, Mizoram Journalist Association te, Mizoram Driver’s Union te, Zoram Taxi Owner’s Association te pawhin an ngaih dan an rawn thawh a. NGO panga chuan MLTP Act hi a hlawhtlinglo an ti a, hlawhtling thawh at ti an awm bawh a. He dan hi hman zui zel tul tilo leh Dan fel tak hnuaiia zu hi zawrh

tha ti an awm a. Zu khap burna dan hi tihdanglam hrim hrim duh an awm bawk a. Chutihlai chuan he dan hi hman zuizel a nih dawn chuan hlawhtling leh khauh taka kenkawh theih Dan siam nise ti an awm bawk a. Law Department lam pawhin MLTP Act hi a khauh tha an ti a. Magistrate-in ngaihdam theihna a neih thin 360 CRPC hman a khap te phei hi chu uchuak an ti a, paih mai an duh a. Law Department vek hian minimum penalty Section 8, Clause I hnuuia thla thum pawh hi a sang tiin thlakhatah tihhnam nise tih rawtna an thlen bawk a ni.

Health Department, Aizawl Civil Hospital leh Kulikawn Hospital atanga zu in mi an lo enkawl, zu khap bur hma leh khap bur hnute dawn a ni bawk a. Hetiangin : No. of alcohol related liver diseases traces received from Medical Superintendent, Aizawl Civil Hospital. Helaiah hian kum 5 chhungin prohibition hmaa zu avanga thin lam that lohna neite chu 282 an ni a. Tin, Total Prohibition neih hnuah kum 5 chhung bawkin zu avanga thin lam natna neite chu 520 an ni thung a. Zu khap bur hnuah zu inte an tam zawk zia lantirna niin a lang a.

Tin, rilru lam dik lohna, natna, that lohna neite kum 9 chhunga Total prohibition hma ami chu Kulikawn hospital-a an lo enkawl zawng zawngte chu 482 an ni a. Tin, Prohibition neih hnuah chutiang ang alcohol, zu avanga natna nei, rilru buaite chu kum 9 chhung bawk khan Total prohibition hnuah mi 1686 an ni. A let thum leh a chanve zetin Total Prohibition hnuah hetiang ang natna nei hi an tam zawk a ni. Chuta tang chuan Total Prohibition hi kan hlawhtling em, hlawhtling lovm? tih chhut theih a ni. Record a a lan dan hian zu khap a nih hnuah zu avanga damlo an enkawl a pung sawt zawk tih a lang a. Hemi in a lantir chu khap avangin zu in an tlem phah lova, an zu in a chhiat avang nge ni, zu avanga hrisel lo an pung hle tihna a ni. Zu khap burna dan hman a nih hnuah zu chhia avanga thi pawh tam tak an awm bawk a ni.

Study Group of MLTP Act, 1995 in zirchianna a neih chu State Prohibition Council-ah thlenin State Prohibition Council chuan sorkarah rawtna hetiang hian a thlen a. Study Group-in study report a rawn pek hi ngun takin kan thlir ho a, he Dan, MLTP Act, 1995 hi a purpose anga a hlawhtlin loh avangin Dan tha zawk leh hlawhtling zawk sorkarin siam rawh se, tiin.

Kristian ram kan ni a, hmun dang ang lovin tlawmngai pawl chhuan tham tak takte pawh kan nei a. A hlawhtlin beisei tak chungin kan sorkar hmasak khan MLTP Act kha kan passed a. Ni 20, February, 1997 ah zu khap burna chu kan han hmang kha a ni a. Tlawmngai pawlte, a bikin YMA leh vengchhung hrang hranga VDP te pawhin tha an thawhin an tangkai hle a. Pu Speaker, chutia tlawmngai pawlte nena kan tang ho chung pawh chuan kan hriat theuh angin zu hian kiam lam a pan lo hle a, a intute pawh an tlem phah lo. Vairengte

thlang maiah pawh zu kan khap hnu hian zu dawr tam tak an rawn hawng tawh a. Chutiang bawkin Zokhawthar ralah pawh zu dawr, Myanmar-a kan Mizo puiten an rawn hawng teuh tawh bawh a. An sum hnar lian tak a nih avangin kan kohhran hruaitute leh tlawmngai pawlthe ai mah hian zu khapna kan hlih hi an hlau zawk hialin a rinawm a ni.

A hmaa kan han sawi tawhte avanga ngunthluk taka kan zir a, kan buk hian mimal ngaihdan tam zawk pawh a ni ang, he kan zu khap burna dan hi tihdanglama khauh taka zu in leh buaina siam thinte khuahkhirh zawnga he dan hi tihdanglam a lo tul ta niin a lang a. Tihdanglam a lo nih chuan 'zu tlanchhia', an tih mai, thianghlim lo taka an bilh a an thlawr te, hriselna atana tha lo tak takte a lo tlem hle ang a. Myanmar lam atang pawhin rakzu, 'Bi' kan tih maite pawh hi a lo tlem sawt zawk ang a. Zu in mite pawh naupang te tea thi lovin hrisel zawkin an lo awm thei tawh ang tih beiseina a ni.

Zu hi India state hrang hrangahte pawh khap hlawhchham a ni tawh a. Hmarchhak state dang Nagaland leh Manipur te pawhin an khap a, keini state ai mahin an hlawhchham niin a hriat a. A khap ve lo Assam state-ah sap zu siamna an hawng thar teuh a, an thenawm ram ten zu an khap hi an lo hlawkpui ve thung a. Silchar District-ah mai pawh khuan a sen chi tam tak siam chhuah a ni a. Mizoram-ah hian 'for sale in Assam only' tih te, 'for sale in Meghalaya only' tih te, 'for sale in Tripura only' tih tein min rawn run thung a. State Border Police leh Excise & Narcotic ten man hnem hle mah sela, an man loh motor chu tam tak a rawn lut tih a chiang a.

Kan state-a Airport panna awmchhun Rangvamual leh Phunchawng te chu Police leh Excise & Narcotic leh YMA ten theih tawpa an zu siamte an tichhe chungin a in tura kal lirthei tam tak traffic ti jam khawp te pawh an awm thin a. MLTP Act 1995 hi tihdanglam duhlo hle mah ila, tihngaihna dang a awm si lova, hreh tak chungin tihdanglam a lo tul ta a ni.

Pu Speaker, a dan chhunga mi hi tlema zawng kan sawi bawh ang a. He Bill hi zu kawh, zu siam, zu phurh, zu lak luh, zu thawnchhuah, zu hralh, zu in khap nan leh khuahkhirh nan leh a chungka kaihhnawih thilte atana siam a ni a. He Bill hi Mizoram puma hman tur a ni a. Lai, Mara leh Autonomous District Council te erawh chu a huamlo a ni.

Chapter 2-ah hian zu siam, zu kawl chungchang thu a ni a. Zu thlawrna te, Beer siamna te, wine siamna te leh a bura thunna te leh khuahkhirhna hnuaiia zu dah khawmna te, retail sale licence leh Bar licence chungchang leh heng atana licence pek dan leh licence tihtawp dan te a ni a. Hengte hi Commissioner-in a pe thei ang a, a titawp thei bawk ang.

Tin, Section 2-ah hian tualchhung zu a bik taka siam leh hralh phalna Commissioner-in licence a pe thei ang tih a ni a. Hetiang hian inziak mah se pek nghal zel tur tihna a ni lo. Section-11-ah hian Commissioner-in dry day a puan theih tur thu te sawi a ni a. Chapter 4 hian Section 15 atanga 23 thleng hian licence leh permit leh pass pek dan leh a kaihnawih hrang hrangte a ni a, chipchiarin kan sawi lovang a. Chapter 5 Section 24-27 thleng hian state chhunga siamchhuah leh state pawn atanga zu lak luh atanga chhiah lak Excise duty leh counter duty chungchang leh chhiah dang chungchang te a inziak a. Chapter 6-a Section 28 ah hian licence leh permit leh pass neitute chhuhsak theihna Commissioner-in a neih thu te a inziak a. Chapter 7-ah Section 29-ah he dan hnuaiia zu leh zu lam thil dang siamna hmun leh dahna hmun dang Bar te endik theitu leh a man theitute a inziak a. Tichuan Section 30-ah hian Excise & Narcotic emaw Police Officer, Asst. Sub-Inspector ten lirthei, lawng leh a hmun te an dap thei ang a, daltu awmte an tikiang thei ang a. Dan phalloh khap khuahkhirh thil an hmuh chuan an man thei bawk ang a. Lehkha leh bungrua leh hmanraw dangte pawh thilsual tihna nen a inzawm chuan an man thei ang a. Mihring pawh an man thei dawn bawk a ni.

Section 31-ah hian Section 30-in a sawi Excise & Narcotic leh Police Officer ten vantlang hmunah mihring bungrua leh thildang zu leh a kaihnawihte chu an man thei a, in leh lo, lirthei leh lawng thil phur chi dang te an dap thei a, an tiding thei bawk a ni. Section 36-ah hian mimal leh pawl hoten he dan hnuaiia dan bawhchhia te chu an man thei bawk a ni. Hei hi Dan tha tak a ni a. Tuna kan dan neih laiah hian, NGO-te'n thahnem an ngai a, Total Prohibition a lo hlawhtlin theih nan an man ve ringawt a; mahse, dan hnuaiiah nilovin volunteer a thawk mai an ni a, an mi man te hi Court-in a chhuah leh fo reng a ni. Tunah chuan Dan hnuaiia man thei turin mi tlawmngai te khung luh a lo ni ta a ni. Section 37 ah hian "In neituten an in leh lo Dan bawhchhiatna information Excise & Narcotic Police te hnenah an pe ngei tur a ni," tih a ni a, chutiang an pek loh chuan man theih an ni dawn a ni. Section 40-naah hian he dan hnuaiia offence te hi warrant tel lova man nghal theih cognizable/non-bailable an ni. A hremna hi a khauh viau dawn a ni.

Tin, a khapna lam pang hi han sawi leh ila. Chapter 8, Section 42-naah hian he Dan hnuai license/permit/pass nei lo te chuan zu phurh kual emaw, thawn chhuah emaw, lakluh emaw, kawl phal emaw a ni lova, lei/hralh/siam/hman/kawl/in khap a ni a, siam chhuahna hmun din phal a ni bawk lo. Vantlang hmuna zu in khap a ni a, zu in vanga buaina siam leh zu in hnu motor khalh khap a ni. Hengte hi strict taka kan police te, Excise sipaite kenkawh tur a ni tih hi mipuiten kan hriat a pawimawh khawp mai.

Tichuan, Section 42-na he dan hnuai license/permit/pass neilo va zu phurh kual, thawn chhuah, lei, lak luh, a siamtute, a hmangtu leh a kawl te, siam chhuahna hmun dintute chu thla 6 aia tlem lo, kum 5 thlenga lungin tan tir leh ₹ 5000 aia tlem lo ₹ 10000 thleng chawi tir a hrem theih a ni. Pu Speaker, a hremna dan hi khawngaihni min lo ngaihthlak ngun sak ka duh a. Hei hi a na khawp mai a, vawiina zu khap chung a zawrh/lawmtu tam takte hian jail bang an zut phah dawn a ni tih pawh hi an hriat tulin ka hria a ni.

Tichuan, phalna nei lova zu in, vantlang hmuna zu in; zu vanga buaina siam; rui chung a motor khalhtute chu thla 1 aia tlemlo kum 2 thlenga lungin tantir emaw, ₹ 1000 ai-a tlem lo, ₹ 5000 thlenga chawitira hrem theih a ni. Kan dan hmasa-ah kha chuan a tlem lam hi zia k a ni lova, tunah erawh chuan a tlem lam thlenga hremna Act-ah hian ziah a nih dawn tawh avangin, roreltute pawhin he dan hi an bawhchhiat theih dawn loh avangin, a in te leh man te, Dan pawisa lotute tan a khirh viau dawn a ni tih hi mipui-in kan hriat a pawimawh hle dawn a ni. Permit bawhchhiate chu an permit cancel theih a ni ang a, tihluhna-in Excise & Narcotic kaihruaina hnuai hantlang hnathawk turin mi hrem theih a ni bawk.

Hengte hi tute emaw kohhran leh Biak-in lama kan chhawr tak takte khatianga ang a vanduaia a man an lo ni hlauh a, an vengah emaw, bazar phiat fai turin emaw excise leh police officerte'n tihluhna a an chhawr chu a na viau ang; inchawitir ai pawhin a na zawk daih mai thei. Chutianga ang Dan tha chu vawiin ni-ah hian kan nei tawh dawn a ni. Dan anga in zia klut doctorte'n zu-in/inlo an fiah thei ang. Hei hi kan dan hmasa Total Prohibition-ah kha chuan Civil Hospital-a doctorte chauh-in an enfiah/endik thei a, tunah erawh chuan India Dan hnuai medical practitioner/doctor in zia klut zawng zawng te, Burma lam emaw, hmun danga mi nilo India ram-in a pawm hnuai inziaklut zawng zawng, private hospital doctor-te pawh khan an endik thei tawh dawn a ni, zu a in ngei em/a rui ngei em tih kha. Tin, zu in/inlo fiahna turin breathe analyser hman theih a ni. Hei hi dan hmasa-ah kha chuan pawm a ni lova, tunah erawh chuan kan Act hian a pawm tawh dawn a vangin kan police leh excise officer ten awlsamna tam tak an nei thei dawn ni.

Tichuan, zu siam danglam (de-natured alcohol) khapna hi miin an lo siam danglam anih chuan thla ruk aia tlem lo, kum 5 thlenga lung In tan tir leh ₹ 5000.00 aia tlem lo ₹ 10000.00 thleng chawi tira hrem theih a ni. Vawiinah hian total prohibition hnuaiah zu tam tak kan ramah a lo lut a, chu zu tha lo lut pawh chu khawi lai lai atang emaw hian tihdanglam a ni a, an hip chhuak a thildang dik lo tak an telh leh a ni tih hriat a ni a. Chutiang ang chu kan nau te, kan fate in lo thei lo ho hian an hmuh tawk a ni ve si a, an khawngaihthlak hle a ni.

Zu chhia avangin vawiinah mi tam tak kan thi a, chumi zu chhia siamtute chu thla thum aia tlem lo, kum thum thleng tan tir leh ₹ 5000.00 aia tlem lo, ₹ 10000.00 thlenga chawi tir a hrem theih an ni, a na viau zel a ni. Zu a thildang pawlh hrim hrim hi khap a ni a, chutiang pawlh an awm a nih chuan thla ruk aia tlem lo kum 5 thleng tan tir leh ₹ 5000.00 aia tlem lo ₹ 10000.00 thlenga chawi tir a hrem theih a ni.

Dan bawhchhiat nana in leh lo hman phaltu hremna :- Heng hi kan thenawmah zu an in avanga bengchheng report a awm chuan thla thum aia tlem lo kum 3 thlenga lungin tan tir emaw ₹ 2000.00 aia tlem lo ₹ 5000.00 thleng chawi tir emaw a pahniha hrem dun theih a ni.

Phalna nei dawr atanga lak nilo zu kawl khapna, vawiinah hian sorkarin khapna hnuaiah phalna pek a tum a, chutihlai chuan an hre tak tak tawh nang ti a Burma ram atangin emaw, Assam atangin emawa lo lalut ngawt te (tuna phal loh chungga lalut ang te hi) na taka hrem theih a ni a, thla khat aia tlem lo kum 1 thleng lungin tan tir emaw ₹ 2000.00 aia tlem lo ₹ 10000.00 thleng chawi tir emaw, a pahniha emaw a hrem theih a ni. Permit neitu pawh nise phalna nei dawr nilo hmun dang atanga a lak chuan a chungga mi anga hrem bakah a permit cancel theih a ni ang.

Dan bawhchhiat tum hremna - a bawhchhia pawh nilo a tum ringawt pawh kha awm theih a ni a, chumi pawh chu Section-52 hian hremna a la siam leh zel a section 52 ah hian. Dan hnuaia hrem theih dan bawhchhiat tumtu chu a bawhchhiat tum hremna bithliah zat anga hrem theih tur a ni. Tichuan, duty te pawh tibuai hremna a awm a, Rangvamual ah kan NGO te an duty a, an lo tibuai a, thi chhawngin an lo sawisa a, chutiang chu a taka hremna kan Dan hmasaah khan kan nei hran lo a ni. Tunah hi chuan section 53 ah hian Excise & Narcotics leh Police Department hnathawktu duty lai lo tibuai emaw, lo dang emaw, lo bei let emaw, chutiang tih tum

leh thuawih lo leh tan khawh te chu thla thum aia tlem lo kum 3 thlenga lungin tan tir leh ₹ 2000.00 aia tlem lo ₹ 5000.00 thlenga chawi tir a hrem theih a ni dawn a ni. Chutiang lo puitu, thil diklo taka ti lo puitute nen thleng khan hremna kan siam a. Section-54 ah hian he Dan hnuaia hrem theih bawhchhiatna lo puitu chu a bawhchhiat atana hremna bithliah zat anga hrem theih a ni dawn a ni.

Section 57 hi nichin ami nen inang khat lek lek, amaherawhchu dal deuhhleik, tlem deuh hlek a ni maithei a. Phalna nei pawlh daltu, phalna nei a nih kha, zu thildang a pawlh daltu hremna thla hnih aia tlem lo kum 2 thlenga lungin tan tir emaw ₹ 2000.00 aia tlem lo ₹ 5000.00 thlenga chawi tir a hrem theih emaw, a pahnih a hrem theih a ni. Tun emaw phalna a nei a, a va lei a, hralh lehchhawn a duh avanga a lo pawlh dal khan chutiang mi chu hetiang anga hrem theih tur a ni.

Zu zawrh phalna nei leh an mi chhawr Dan kalha che te hremna section 58-ah hian a awm a, thlakhat aia tlem lo kum 1 thlenga lungin tan tir emaw, ₹ 500.00 aia tlem lo ₹ 2000.00 thleng chawi tir emaw, a pahnih emawa hrem theih a ni a. Chutiang Dan bawhchhetu chu thuneituin phalna a tih tawp sak nghal thei a ni. Section 57-naah khan Dan lo anga zu lakluh, thawhchhuah, tawlh leh siam kawltu an awm a nih chuan man an nih a thiam loh chantir an nih chuan thla ruk aia tlem lo kum 5 thleng Lungin tan tir leh ₹ 5000.00 aia tlem lo ₹ 10000.00 thlenga chawi tir a hrem theih a ni bawh a ni. Phalna neitu mi chhawr emaw, phalna phawrh thei lo, hengte chen hian hrem theih an ni a, section 60-naah hian a chuang a ₹ 500.00 aia tlem lo ₹ 1000.00 thlenga chawi tir a hrem theih an ni.

Thiam loh chan tir tawh hrem belhna (Enhance punishment) section 66-naah hian a awm a, thiam loh chan tir a nih hmasak a hremna pek theih zat let hremna pek tur a ni ang. Tin, a hnu leh a awm a nih pawhin chutiang zelin. Mi an lo rui a, mi an lo tibuai a, khawlaiah Police te, Excise ten an man a hrem a ni tawh a, khatianga chhuah leh a a lo ti leha nih chuan a leta hrem zel tur kha a nih tawh avangin Dan kha a khirh viau dawn niin a lang a ni. Chutiang ang chu a dang tam tak a la awm a; Amaherawhchu khang kha a pawimawh zual deuh niin ka hria a, khang kha ka'n sawi theih tawh chu ni rih selangin. Pu Speaker, he Dan hi min ngaihtuahsaka kan Member-ten thahnemngai taka min sawipui turin kan ngen a ni. Ka lawm e.

SPEAKER : Aw le, kan minister zahawm takin a Dan putluh a rawn pho chhuak tawh a. Tin, a putluhna chhan chiang takin House-ah a hrilh tawh a, sawihona kan

tan dawn a. He bill hian sawi a hlawh em em a, mipui ngaihven a hlawh em avangin kan zavaiin kei tih loh chu sawihonaah hian tel vek tum ila a thain ka hria. House-in rem a tih chuan tlaivar thlengin sawi ila, chuvangin mi pakhat (1) tan minute engzat nge kan pek ang? Minute 5 a tawk em? Mi 1 in minute 10 theuh hman tum ila sawihonaah, tunah sawi tan tawh mai ang u.

Pu ZODINTLUANGA, MINISTER : Pu Speaker, ka lawm e. Kan Excise Minister zahawm takin “ The Mizoram Liquor (Prohibition & Control) Bill, 2014” vawiinah kan House zahawm takah a rawn pulut a, kan Speaker zahawm takin a rawn sawi ang khan vawiinah burning topic a ni a, sawiselna te, fakna te khatiang karah vawiinah huaisen takin kan House-ah a rawn pulut hi a lawmawm ka ti a. A rawn sawi hawnna atang khanin a hremna tur leh a ken dan tur tam tak a rawn sawi tawh a.

Kan hriat theuh angin MLTP Act hlip a khuahkhirh chung a in lova awm thei lo ten zu tha leh hrisel zawk an in theihna ngaihtuah a Mizoram Liquor (Prohibition & Control)Bill, 2014 hi duan a ni mai a. Kan hriatreng tur chu alcohol awmna reng reng hi khawi ramah mah hian thlah zal huau hi a ni ngai lo reng reng a, an regulate a, an control mai thin a ni. Alcohol content zat azirin a intu turte a tlem deuhah hmeichhia leh naupang deuh te in turte khatiang deuh khan an bituk mai thin a.

Kum 2005 khan Pu Speaker, vanneithlak takin American sawrkar Department chuan an ram fang turin min rawn thlang ve a India ram aiawhin, chumi kan zuk kal tum chuan ka hriat reng chu kan programme te kan zawh hnuah ka makpa te an awm ve a, ka zuk tlawh a, chumi chuanin min lo hrih chu khami hun lai khan zu a in ngam lo reng reng a ni. Tlai khat kha a fanu nen an thiante ina an chaw ei haw kha a motor khalh kha police-ten fimkhur tawkloah ngaiin an lo check a, zu rim a lo nam a, thla ruk (6) chhung motor a khalh thei lova, chumi hnuah motor a khalh dawn chuan zingah a motor a a ham tur an dah a, tlaiah a kal hnuah a ham tur an dah a, zu rim nam khan motor kha a khalh thiang lo reng reng a ni. Chutiangte chuan ram changkangah Pu Speaker, regulate-na hnuaiyah zu an zuar a. Vawiinah pawh kan ramah ngei pawh hei kan Excise minister zahawm takin Dan tha tak mai a rawn duang chhuak a, khuahkhirhna hnuaiyah Dan tha tak hnuaiyah zu in lo thei lo te zu tha zawkte an lo in theihna tur atan a rawn duang chhuak hi a lawmawm ka ti a ni.

Hei kan hriat theuh angin, MLTP Act hi kohhran hruaitute duh dan leh kan hotute pawhin a hun laia tha zawka ngaiin Congress sawrkar lai kum 1995 khan duan a ni a, Congress sawrkar lai vek 20th February, 1997 atang khan hman tan a ni. Kum 17 kan

lo hmang ta der mai a, kan han thlir kir chhung hian ngaihdan tam tak a awm a, he total prohibition kan neih chhunga kan ramin kan thatna leh that lohna te hi inhniaalna tam tak a awm a ni.

Kum 17 kan enchhin chhung hian mi tam tak ngaihdan chuan kan thalai tam tak ten an tuar a, drugs-te an tih phah a ni ti pawl te pawh an awm a ni. Chuvang chuan vawiinah hian Pu Speaker, kan sawrkarin kum 17 he dan hi kan lo enchhin tawhah hian a aia tha zawk leh a aia changkang zawk leh khuahkhirna tha zawkin vawiinah he Dan hi i siam teh ang u tih an rawn ngaihtuahna hi ngaihtuahna tha tak niin ka hria a. Chuvangin kum 17 kan enchhin tawh hi vawiinah he Dan thar hian kan thalaite leh kan ramin hma a sawn theihna tur a tan i enchhin ve mai teh ang u an rawn ti ni berin ka hria a. Kan thalai tam tak Drugs ah te kal a, an nun te tikhawlo a, a hun loa thi tam tak te chhanchhuah theihna tura tan a ruahmanna a ni a ni.

Tin Zu chhiah it chungchang hi sawirik a ni fo a, sorkar chuan sum laklurna hrang hrang dap hi chu a tih tur a ni ve reng a. Mahse, vawiina he MLPC Bill erawh hi chu Zu chhiah duh vanga siam a ni lova, thalai tam tak chhanchhuah theihna tur atana an siam anih avang hian a lawmawm lehzualin ka hria a. Pu Speaker, kum 17 zet mai total prohibition hmanga kan lo enchhin tawh hi Pu Speaker, vawiinah chuan in en let leh ila, a aia tha zawk kan tih hi a hun tawh lawm ni tiin kan Excise Minister khan Bill a rawn pulut a. Chuvang chuan Pu Speaker, kan hriat theuh angin Zu aia tha lo Drugs te pawh kan ramah a hluar em em a, hengte pawh hi tam tak chuan Zu kan thalaiten an in theih loh avangin an rawn tleirawl chhuahah loh theih lohna avangin an ti chhin a, an chhiat phah a ni ti te pawh an awm a ni. Chung ang kan enkawl te chu vawiinah Pu Speaker, veng hrang hrangah NGO ten Centre te kan siam a, a then chu Kohhran enkawl Centre te pawh an ni. Chungah te chuan Drugs an tih lohna tur ai mahin Drugs ti laklawh tawh te Drugs a inchiu ti laklawh tawh tena a thianghlim zawka an tih theihna atan Syringe te kan thlaksak hial a ni. Chungah chuan Kohhranin a enkawl Centre te pawh a tel hial a ni. Hmun hrang hrangah Drugs....

*Speech not corrected

SPEAKER : Warning warning

Pu ZODINTLUANGA, MINISTER : Pu Speaker, chutiang ang chu a ni a, a tha zawka an tih theihna tur atan kan enkawl mai a ni. Chuvang chuan Pu Speaker, vawiinah pawh kan rama pawl lian ber ber YMA te pawhin theitawp an chhuah a, Rangvamual-ah te pawh an tih a, a rem hlei thei lo hi vawiinah khuahkhirhna tha zawk nen hian kan ram hi kalpui ta ila tih hi ka rawn ngaihtuah dan a ni a, he Bill hi pass ve ngei turin kan member zawng zawngte pawh ka sawm a.

Tin a bik takin hei Pu Speaker, i vei lama thu te MNF party te hi sawm bik ka'n duhna chu, an founder president Pu Laldenga policy leh a philosophy te duh a party a awm duh an ni a, khatih hun laia kan hotupa min kalsan ta Pu Laldenga philosophy te, a ngaihdante hi vawiinah i phalna in tawite rawn quote chhuah ka duh a, Vanapa Hall hmuna July 25, 1988 a thusawi 'Zu hi kan ram hmelma a ni lo va, kan thian pawh a ni hek lo, zu hi thil tha pawh a ni lova, thil chhia pawh a ni hek lo. Ka hmaa tui sik hi la ila, zuah ngai ta ila kan ram hmelma chu a ni lo ti rawh u, kan thian pawh a ni hek lo, chuvangin, kan ngaihtuah danah hian fimkhur a ngai e, 'thil' a ni ri ngawt mai a ni" a ti a.

Tin, a sawi zelnaah chuan kohhran thuah leh thlarau thuah chuan sawrkar hian kam khat pawh kan sawi ve lo a, an thu hi kan ngaihthla tlawk tlawk mai a ni. Englaimahin kan hnial dawn lova, thlarau lam hruaitute an nih avangin an thuah kan dah vek a ni. Amaherawhchu, sawrkar policy-ah chuan tu sakhua mah rawn kan tum lo hei hi chiang takin hre rawh u, Hindu kan rawn dawn lo, Buddhist kan rawn dawn lo, Sikh kan rawn dawn lo, Kristian kan rawn dawn lo, pakhat rawnin pakhat kan hlamchhiah dawn lo, Secular sawrkar kan ni a ti mai a ni.

Chutiang bawk chuan entirna pakhat tha deuh a rawn sawi leh chu, ka sawi tawh ang khan thil a ni a, amahin a chhe lova, a tha bawk hek lo, Amaherawhchu, tehkhinnan Pu Zoramthanga khan tehkhinnan zu la tem hauh lo a ni a, rui ta ngat mai sela chu, zu kha a dik lo a ni lova, Pu Zoramthanga kha a dik lo a ni zawk a ni. A rui ve lo Pu Zamawia chuan engahmah a ngai lovang, tin a zu a kha a ni lo a ti a ni.

Chuvang chuan Pu Speaker, i veilama thute pawn an founder president-in a ngaihdan angte khatiang ang anih si chuan vawiina kan 'Mizoram Liquor (Prohibition & Control) Bill, 2014' kan Excise Minister zahawm takin a rawn putlul hi kan member zahawm tak takten min pass-pui turin ka rawn sawmpuiin ka rawn ngen pui a ni e. Ka lawm e.

*Speech not corrected

SPEAKER : Hun hmang thiam lutuk, khatiang vek khan hman tum ila. Pu K. Sangthuama.

Pu K. SANGTHUAMA : Pu Speaker, ka lawm e. Vawiinah hian kan zu khapna dan Total Prohibition thlakna tur Zu zawrhna kan sawiho dawn a ni a. A hmasaa ka sawi duh chu 1984 October ni 10 khan sorkarin zu zawrh permit hi pek a ni a. Ni 31.3.1988 khan hei hi tih tawp leh a ni a. Thenkhatin hrechiang loin Chanchinbuah nimin thleng khan an la rawn ziaak a. Hetih hunlai hi 1987 atang khan MNF sorkar a ni a, 1988 eng emaw

chen thleng khan. Thenkhatin zu permit hi MNF in pe leh niawma an sawi te kha chhuahna a awm a. Hei hi hriat chian loh vang a ni tih han sawi ka duh a. 1984 a sorkarin a pek kha ni 31.3.1988 a a tawp khan tuman zu permit hi an pek zawm tawh lo a ni e tih kha ka'n sawiduh bawka ni.

Vawiinah hian kan thil sawi tur hi a pawimawh viau a. MLTP Act hi a that leh that lohna te pawh tam tak sawi tur a awm ang a, kan sawiho thin tawh a. A dan hrim hrim hi chu mithiamten an rawn buatsaih a ni a, tha thawkhat turah han ngai phawt ila. Ka lo en ve a, kan zir ve chuan Chapter 10-na section 79 No.1&2 leh section 80 No.1&2 helaiah hian Legal Proceeding-in a huam loh tur a inziak a. Hetah hian he dan hnuai anga miin a ngaih a dik (good,faith) ni a hriat dan enkawlna lamah, a rorelna lama khin theih a ni lovang tih leh bungrua tihchhiat anihin rorelna an chungah lekkawh theih a ni lovang tih hi heti lai kan en dana kan hriatthiam theih dan mai a ni a. A aia chiang zawk hian kan mithiamte leh saptawng thiam zawkin min la rawn hrilhfiah leh zel turah kan ngai a.

Tin, section 80-na sub-section 1-ah khan dan kengkawhtu Excise leh Police te an nawm an maka an chet theih lohna tur dan ni awm tak tarlan a ni ve a. Hemi ang chuan dan kalh a heng Force mite an chetna hremna kawngah Prosecution lamin thla 3 chhunga hmalakna a neih loh chuan Magistrate-in dan kalha che a puhte chungah hian rorelna a lekkawh thei lovang tih ni awm tak a ni bawka. Tin, section 2-naah phei chuan sorkarin chhui phalna a pek loh Excise leh Police te chungah dan kalh a an chetna hekna chu rorelna chuan a pawm tur a ni lo tih a la chuang leh niin hetilaiah hian a rawn ziak a. Dan kengkawhtu tan chuan section 79-na leh 80-na te hi tha hlein lang mahse Excise leh Police te humhimna zau lutuk deuh niin a langin, hei hi Human Right buaipuitute phei chuan an mit a kham viau ang tih a rinawm a. Helai kha lo en chiang theuh ta ula, hemi section pahnih hi a tha tawka em? Keia lo ngaihdanah chuan hei hi chu a rum deuh a ni lawm ni ka ti deuh hlek a ni.

Tin, khami a dan chungchang chu a tha thawkhat turah ngai mai ila, a changtu Minister zahawm tak pawh khan a rawn sawi chho tawh a, kan sawi vek hman lovang a, tha thawkhat turah ngai mai ila. A hremna te khatiang zawng zawng pawh kha tha takin an rawn duang a, thain ngai ta mai ila. Amaherawhchu, MLTP Act hi pah lo va a ngai ang hian kal se, tuna kan awmdan ang hi khauh zawka kalpui ni ta se a tha lawm ni chu awka ti a.

Tin, Kohhran leh NGO te leh mi tam takin an ngen ngawih ngawih laia vawiina MLTP Act hi pah a, Dan thar siam a, zu zawrh phalna kan rama han ken mai hi a tha lo hle a. Chuvangin Kohhran te leh NGO ten an ngen ngawih ngawih lai hian kan sorkar hian zai han

dawh deuh hlek se. Tuna kan MLTP Act hi tidanglam lovin a ngai hi ring leh ta mai ila, thawktu tha zawk te, tun aia Force chak zawk te buatsaihin ti ta ila kan ram tan hian a tha zawk mai lo maw tih hi ka rilrua ka lo ngaihtuah dan leh ka rin dan nghet tak, a tha zawk ang tih hi a la ni fo a ni. Tin, MLTP Act hi paih ta ila, tuna kan Dan thar ang hian kal ta ila, thil lang Chiang sa reng chu tun aiin zu a tam ang. Pahnihna – tun aiin zu in an tam baw ang. Khawlaiah zu rui hmuh tur an tam ang a, buaina pawh tun aiin a tamin a rinawm baw a ni.

Tin, Mizote chu kan bawhna lam lam bawh huk chi kan ni a. Zu permit kan siam hian zu in hi a hluar hle ang a, chutah chuan kan kal ruih ruih ang tih a hlauhawm bawh niin ka'n ngai a. Tin, thenkhatin MLTP Act hi a hlawhtling lo e ti thin mahse langin a hlawhtlinna thui tak kan neiin kei chuan ka hria a. Kum 20 hma lam kan thlir chuan Aizawl khawpui-ah hian zu a tam em em a ni tih kan hre vek a. Tichuan, kan sorkar khan 1997 ah he Dan a han siam khan VDP, YMA leh khawtlang hruaituten theihtawp chhuahin an han bei a. Tunhma chuan tlak lamah te pawh khan zu a tam em em a.

Tin, Atta lane kan tih te leh Bawngkawn kan tihah te pawh a tam em em. Mahse, theihtawp chhuahin hemi Act a han awm atanga an han beih hian Aizawl khawpui-ah hian zu leh zu sak chawpte pawh chuti lutukin kan hmu ta lova. Khulai ka bial-ah kan zavaia kan hriat angin tunah khuan a tam a ni mai a. Khawpui chhungah hi chuan zu zawrhna hi khatiang khawpa tama hmuh kha a awm tawh lova. Chuvangin, kan MLTP Act hi a hlawhtling thawkhat hle-ah kei chuan ka ngai a ni.

Tin, zu sen chi tam tak awm hi a lo kalna, gate-ah hian duh angin kan check tha taw lo deuh te pawh niin a lang a. A lo kal zung zung a, hei hi chu tuman kan pha thei lova, a tam hle tih hi chu a Chiang a. Khung atan te pawh khuan Force tha zawk te, chak zawk te dah ta ila, tuna Act kan neih lai hi thiat lovin ti ta ila kan ram tan hian a la tha zawk fo lawm ni tih hi kei ka ngaihdan chu a ni a.

Tin, tuna kan kalphung zel pawh hi han ngaihtuah ila, khap a ni chung pawha kan tu leh fate heti khawpa kan khap theih loh lai hian zu zawrhna hi han phalrai ta ila a buaithlak hle lovang maw? Naupang tleirawl te te hian zu hi nasa takin in an tum ang a, an in chho ang a, kan ram tan hian a tha ber angem tih hi kan rilruah awm ta sela. Ngaihtuahna ril taka kan ngaihtuah hi a ngaiin kei chuan ka hria a. Chuvangin, thlah zalen lovin tuna kan awm dan ang hian ngaihtuahna hmang chhunzawm zel ta ila tih hi kan sorkar hian rilru takin ngaihtuahna han hmang se a tha awm mang e aw ka ti a.

Tin, zu chhe in ai hian zu tha in hi an thi tam zawk zel tih hi Chiang baw ta ila a that ka ring a. Tin, thil tam tak kan sawi hman dawn lova. Zu hian chungkua te, khawtlang te, ram te leh Kohhran thlengin a tibuai a, a tha lo a. Tin, chhungkaw tibuaite a ni a. Khawtlang nun tithalotu a ni a. Tin, khawtlanga inngirrhona siamtu a ni a. Nun tikhawlotu, nupa kara

inthenna thlen theitu a ni a. Tin, hmeithai tam tak siamtu a ni a. Tin, Jail bang min zut tirtu a ni bawk a ni. Tin, chhungkaw tlakranna a thlen a. Tualthahna-te leh accident tam tak lo thlenna te hi zu vanga ni fo thin a ni. Zu vang vek chu a ni lo na in, a tam ber hi chu zu vang a lo thleng thin niin a lang a ni. Chuvangin, hetiang kawngah hian zu kan thlah zalen chuan tuna kan awm dan ai hian harsatna Mizoram hian kan hmachhawn zawk ang tih hi kan ngaihtuah vang vang hian ka hlauthawng a ni.

Tin, Mizoram hian ni e, zu hi a that leh that loh kan han ngaihtuah ve thin bawk a, kan mithiamte hian duh aiin an zir chiang tam tawk lo niin ka hria a. Mi ram chuan zir chianna tam tak a awm a, an zir chiannaah pawh hian, Karnataka-ah chuan an zu manah hian cheng 10 zel hmu ta ila, cheng 16 zel a enkawlnan kan seng a ni an ti. London zir chianah chuan a senso ₹ vbc 286 lai zu enkawlnan hian an hmang bawk a. Tin, 2011 ah USA Minnesota Department Health in a zir chiannaah phei chuan zu avanga an senso, zu atanga lakluh aiin a let 17 in a tam nghe nghe a ni. Tin, Bangalore-ah bawk hian zir chianna hi a dik a nih phei chuan zu tha IMFL leh Beer Litre 10 hralh a nih apiangin local zu litre 12 zel hralh a ni a, hetiang hi a nih avangin Pu Speaker, zu zawrhna hi thlah dul lovin tun ami hi anihna ngai ang hian kan sorkar hian kalpui ta se, enforcement ti chak ila, kan ram tan hian a la tha zawk lo ang maw tih kha vawiina ka sawi chhuah chu a ni e.

SPEAKER : Minute 5 kan nei a, tupawn sawi se kan hunin min daih dawn lova, kan chawl rih ang a dar 2:00 ah kal khawm leh tum ang u.

2:00 PM

SPEAKER : Pahnih chauhin an la sawi a, kan tan leh ang. Tunah Pu K. Lalrinthanga i lo sawm ang.

Pu K. LALRINTHANGA : Pu Speaker, ka lawm e. Vawiinah hian Bill pawimawh tak sawihona a sawi ve thei a remchanna ka nei hi lawmawm ka ti a. Mizoram hi a lem hian kan kal rei tawh hle a. Zu chungchangah hian kumhnih kal tawhah khan vawiin ni hi a thlen beiseiin ka ngaihdan he House ah hian ka lo sawi tawh a. Chuvang chuan vawiinah hian ka ngaihdan sawi ve leh ngei hi a tulin ka hria a ni. Tunah pawh hian a sawi hmasa lama tan pawh hi a tha in ka hria a, ka rawn ding chhuak a ni. Zu hi Mizoramah hun rei tak kan lo khap tawh a, 'Total Prohibition' kan ti a. Chumi hmang chuan zu khapna dan kan hmang a ni a. Chutih rual chuan, chu Total Prohibition hmang chuan Excise Department a hnathawktuten hna an thawk a. NGO te pawh in chu Total Prohibition hmang chuan zu te an check ve thin bawk a. Chutianga

zu an check a sorkarin zu a man takah chuan, zu siamtute zu siam sa tam tak tak an leih bua a, a zem te an sah chhiat sak a, a baw hum hum a ni.

Amaherawhchu, thil mak deuh mai pakhat chu hetiang anga zu zuartute zu siam sa man sak an nih a, tih chhiat sak an nih hian kan hriat atana tha deuh chu zu zuartute hian an hlahu tawh kha hmuh let leh na tur atan tan an la a. A hma aia a leta tamin hma an la leh sauh thin a ni. Chutiang anih avang chuan sorkarin theih tawpin tangin, khapin hna thawk mahse, NGO te pawhin theihtawpin hna thawk mahse an eizawna a nih avangin an hloh tawh te hmu let leh turin tan an la a, kan khap rem thei tak tak chuang lo a ni tih kan hriat a tha in ka hria a. Chutih rual chuan ka han tarlan ve duh pakhat chu ka awm ve tawhna veng pakhat chuan YMA leh VDP ah Secretary ka ni thin a. Chunga an hmalaknaah chuan ka tel ve thin a.

Thil mak deuh mai piang chu zu zuar chhungkua a an fapa te zu in duh miah lo tam tak ka hmu a ni. An zu sak kha milian fa ten an tlan a, anni chuan eizawn nan an lo hmang hleuh a. Tangkai takin chhawr an lo la ve a. An chhungkua inenkawl nan te an lo hmang ve thin a ni. Sorkarin zu a khap hian harsatna chi hrang hrang kan hmu chho a. Zu chuan rim a lo nei a. Kan thalaiten zu an lo in khan a rim an lo nam a. An chhung ten in lo tura an duh laia an lo nam si kha chuan tha lovin an hria a drugs lamah te an tlan thin a ni. Mi tam tak ten zu in lovin mahni nawm chenna tur atan tlanna thin a ni a. Chutiang anih avang chuan drugs lamah nasa takin an inhmang a, chungte avang chuan chhungkaw thenkhat chuan an fapa ten an fanu ten zu ah tal hi chuanin lungawi ve thei sela aw, tia sawi tawngkam ka hriat hi a awm fo a ni. Chutiang chu mi thenkhat thil sawi thin dan a ni a.

Hei kumin atangin Aizawl-ah hian Sairang lam atangin (Phunchawng leh Rangvamual kawng te kal tlangin) ka rawn haw thin a, Phunchawng leh Rangvamual ah khuan bike te, car te, taxi te kawng sir, vei lampang kawng sirah a khat tlatin (in si thap in) a intlar chho vek zel a ni. Chu chu zu khapna kan hlawhtling loh zia tarlang tu a ni a.

Vawiinah hian kan hotuten ngaihtuahna tha tak mai an rawn siam a. “Zu khuahkhirhna dan tha zawk engtingge a awm theih ang”, tiin ngaihtuahna an rawn siam a. Bill an rawn pu lut ta hi lawmawm ka ti tak zet zet a ni. Lawmawm ka tih em em pakhat chu, hemi Bill Chapter 8-na Section 42-na kha a nia. 42 na ah khan hun kal leh tura kan awm dan tur thil tam tak a rawn hrilin ka hria.

Mi thenkhat chuan tunhma in zu an in a. Ti hian han sawi ta ila. Office chhungah te an in a; tin, vantlang hmunah te pawh an in a. Zu ngawlvei te pawh mahni vengah te kan hmu

a. Mi thenkhat tan chuan khatiang han buaipui te pawh kha a lo hrehawm a. Tin, mi thenkhatin kan ngaihsak lova kan en liam mai mai a, kan nuih vel mai mai a.

Amaherawhchu tun hunah chuan a khuahkhirhna dan tur kan hotuten ruahmanna an rawn siam ta a. Phalna nei lova zu in reng reng te chu a hremna dan a tlem berah thla khat vel lungin tang tur a ruahmanna te an rawn siam a. Thla khat lungin a an tan zel chuan khatiang zu in ho khan an sim duh ngawt ang ka ring. Khawtlangah, vantlangah hnawk saka zu ina khatia mi hmuha awm fo kha tuten emaw an han report ang a, an man fuh a jail a an tan chuan an tan a mualpho thlakna lai te pawh a awm ang a, zu in dan an thiam duh phah ngawtin ka ring.

Tin, chutih rual chuan zurui chung motor khalh te man a nih chuan a tlem berah thla khat lungin tan tih te a lo ni a. A vai khan kan sawi seng lo ang a. Chutiang a lo nih chuan zurui chung motor khalh te an vang viau tawhin ka ring. Mizorama motor khalha accident tam ber hi kei chuan nia ka hriat dan chuan, zu an in vang, zu an in a, motor an khalh a, an khalh fimkhur lova (kawng chhiat vanga accident hi chu an vang ngawtin ka hria a). Zu an ina khalh fimkhur lova accident chu an niin ka hria a, Mizoram a accident te pawh a tlem phah ngawt in ka ring. Chutiang chuan zu in mi te an fimkhur thei tawh dawn niin ka hria a.

Tin, a man theitu tur te a rawn ruahman leh ta a. A man theitu tur te chu registered medical practitioner tawh phawt kha chuan an man thei a. Tin khawtlang, vantlangin an man thei bawk a. Chutiangte anih chuan zurui a awm kha zu in mi te tan pawh a chakawm tawh lo viauin ka ring a.

Khawtlang ven thawnna te pawh a na tawhin ka ring a. Chutiang te a nih avang chuan khawtlangah engemaw chenah hlimna leh lawmna a rawn thlen thei dawnin ka hria. Breathe analyzer tih te pawh Department in an han hmang thei dawnin ka hria a. Thil tha deuh mai ka hmuh pakhat chu zu in te Pu Speaker, vantlang hna, a hremna hna, hna rim thawk tura ruahman a han siam te hi a ni. Zu in hrem nana hna rim tak an thawh fo mai chuan chhungkuaah te leh mipui vantlang hmaah te an in tha duh vak lovin ka ring. Chuti a nih avang chuan kan khawtlangah zak miah lova kan hmuh reng chung sia zu in a an awm fo ai chuanin a hremna Dan mumal zawkte sorkarin han siam hi a thain ka hria a. Hetianga a lema kan awm, zu khap sia zu tam em em bawk si ai kha chuan zu phalna nei chung leh a hremna pawh khawng zawka kan han kenkawh a kan kal hian kan ram hi a tha zawkin ka ring a. Chu chu ka han tarlang ve a ni e. Ka lawm e.

Pu K.S. THANGA : Pu Speaker, ka lawm e. Hei vawiinah kan ram rorel khawlin kan ngaihtuah tur pawimawh tak mai Mizoram Liquor Prohibition and Control Bill, 2014 ngaihtuhnaa sawi ve theia ka awm hi ka lawm hle a ni. Ka'n sawi deuh zung zung ang a.

A hmasa bera vawiina kan hriat tlan atana tha ka tih chu vawiinah hian thil tha, ram tana thil tha duh vekin helaia mite hi kan lo kal khawm a ni. Kan ram tan hian thil tha lo duh kan awm lo, Amaherawhchu, pawn lam atangte pawhin vawiina kan thu khel T.V. ah te pawh min lo en tur tam tak an lo awm ang a, ngaihdan hrang hrang kan nei a, khang ang ngaihdan kha khawvela kan awm chhung hian a inrual dawn lo, mahse kan duh chu thil tha a ni vek tih hi a pawimawhin ka hria a. Chumi thil tha kan siam dan kawngah chuan a kal dan, kan duh dan erawh chu a inang lo a ni. Vawiinniah hian heng hi kan hriata thil kan sawiah te leh lam pawl te duhna, thil tha duh lo ang hiala insawi emaw, khatiangte a awm thei kha kan inven fimkhur a thain ka hria a, ka'n sawi hmasa a ni.

Pu Speaker, a hre lo ber ni mah ila, Bible lam kan en chuan Genesis-a Pathianin lei leh van a siam a, mihring a siam khan Eden Huan a siam a, chutah chuan Adama leh Evi a dah a ni. Mak deuh mai chu Pathian khan kha Huanah khan chhia leh tha hriatna thing leh a rah te kha a duh chuan a dah lo thei a ni. Amaherawhchu, ama mihring siamte an chhia leh tha hriatna hi a zah avangte pawh a ni thei ang a, a mihring siamte a ngaihpawimawh vang te pawh a ni thei ang, a chhan chu theologian lam sawi turah ngai ila.

Engpawhnise, an ei a an finna vek tur, an nihna te an hriat turte kha a dah ve tlat a. Chu chu ei lo turin thu a pe a, a mihring siam hmasa berte pawh khan chu dan chu bawhchhiain vawin hi kan lo thleng ta a. Chutiang chuan Kross-a chhandam ngaiin kan lo awm ta a ni tih ringtute chuan kan pawm tlang a ni. Chuvangin vawiinniah hian heng kan Total Prohibition te, Control te kan han sawiho lai pawh hian a duh lo te tan chuan engtiklai pawha inthiarfihlim theih a nih laiin hetiang zu leh ruihtheih thil mamawhte tana himdam zawk leh tha zawk, hrisek zawk, mantlawm zawka an tih theihna tur sorkarin a ngaihtuah te hi kan hnial emaw, kan sawisel emaw hi mawhpurhna neitu tan chuan a tha ber em, tih kan ngaihtuah fo a tulin ka hria.

Khawvela tunlaia an buaipui tak mai, khawvela tawng lar tak pakhat chu Talibanism an ti a. Taliban te chuan mite an thuthlung leh rindan 'Doctrine' pawm lo chu tharumin an sawisa a, an ti a. Mahse Talibanism ah chuan mi va thah chillh a, mi va tihchhiat emaw kher ni lo khan, kha ngaihdana ngaihdan nei lo midangin ngaihdan a rawn siam, a zalenna hrim hrim va rahbeh duhna kha Talibanism an tih hi a ni. Chuvang chuan vawiinah hian tharum thawh duh lemlo mah ila, mimal zalenna India Constitution ina right a pekah te rah beh vek a tumna hi ringtuten kan enchian a, kan zir chian a, kan ngaihtuah chian pawh a hunin ka hria a. Heng hi thu hma angin kan sawi duh a ni.

Pu Speaker, zu khapna chungchang leh a control na chungchang kan sawi hian hei Mizoram ah tunah chuan zu hi kum 17 lai kan lo khap ta a. Marawhchu, vawiin a kan dinhmun hi kan in enchian a ngai a. Kha kan minister zahawm takin a rawn sawi tawh a, sawi nawn kan duh chu Champhai ah han kal ila, Tiau piahah khian Burma ramah zu hmun dawr ropui tak mai Burma thingtlang khua engmah tharchhuah lohna hmun a awm a ni. Chu chuan, a tum chu Burma rama zu zawrh a tum anih rualin zu hralhna erawh chu heti lama India, Mizoram a mipuiten a kan mamawh a tam lutuk a, chumi supply na tur chu a ni tih a chiang em em a ni.

Tin, khutah Kanhmun ah Mizoram ramri depah zu kal leh ila, Damchhora ah khuan lui ral lehlam mai bawkah khuan zu tha ber ber foreign liquor te, imported MFL a tih te, chutiang zu dawr hmunpui chu thingtlang khua ah te pawh khuan a awm bawk a. Chu chuan a tum chu Mizoram a zu supply a ni. Tin, tunah phei chuan Bagha ah te, Dholai te ni mai lovin hetah Lailapur ah te, helai Vairengte sir thlang lawkah te khuan zu dawr tha pui pui a awm tawh a. Khunglai Cachar vai phai ina an lei theih loh a ni a Mizoramah. Chung zawng zawng kan sawi te chu Mizoram a hralh vek a ni. Chuvang chuan, heng atang pawh hian vawiina control anga kan in ngaih hi a tak takah chuan control a ni lova. Amaherawhchu, kan economic in a tuar em em na nia lang zawk chu khuti laia zu ₹ 200 man tlinglo khu hetilalah hian ₹ 500/600 a lo ni a, miin chawlhkar 1-ah zu um khat lo in dawn ta sela, khuti lai control na hnuai a ₹ 200 chauh a chhungkua atanga a sen dawn lai khan heti laia chawlhkar 1-a ₹ 600 a seng hi economically pawn a family khan a tuar a ni tih kha khan a chiang a, ram sum leh pai tam tak khangah khan harsatna a tawh thei a ni. Hei USA ah pawh hian 1920-1933 chhung khan khawvela sorkar ropui ber kan tihte pawh hian zu khapna dan te hi an lo siam ve tawh thin a. Heng hunlai hian khawvel history a dai ngai tawh lo tur Al Capone te, khatiang smuggler ropui te pawh kha an lo awm phah a. Zu khapna hlawkpuitu an ni. Amaherawhchu, theihtawpa America sorkarin a chakna nena a beih pawha a hlawhchham chian zia a in hmuh khan a tawp a kha total prohibition a siam a hlawhchhamna a thu hmuhchhuah America rorel khawlin a pawm taka chu “You can not legislate moral and human behaviour” tih a ni tawp mai a ni.

Mihring rilru leh moral hi dan rorelna hmanga rel thata, siam theih a ni lo. Pathian thu atanga tihur a ni tiha kha America hian kum tam tak kum 100 dawn kal tawhah khan an lo hmuchhuak tawh zawk a ni. Chuvang chuan, vawiin niah hian henglai ang hi keini pawhin kan ngaihtuahnaa kan neih ve hi a hun tak zet zet in ka hria a.

Hei tunah hian kan ramah hi chuan Pathian thu kan concept a pawh hi sap ho min zirtir nge keimahni kan pawmchhoh ka hre lova, ramdangah Mizo missionary tur tam tak in harsatna tam tak an neih chu meizial zu chu Naga-ah chuan Kristian a ni thei miah lo, kuhva eisen hiam huam chu Kristian ani thei miah lo. Zu in chu Kristian-ah a pawm daih. Chutiang chuan, sahdah hmuam te, meizial zu chung ten Kristian kan in ti a. Zu kha kan tawngpawng sawichhiat lai khan Mizoram pawna missionary kan nih dawn chuan chung laka kan fihlim chu a ngai a ni. Chutiang chuan, Biak in kawta kan khuk luih luih chhung hian mi ram atanga min

rawn hmuh let dan hi kan in enfiah viau a ngaiin a rinawm a ni. Chuvang chuan, Pu Speaker, a tawp nan kha bell kha a final tawh ami? (SPEAKER : Aw, final) Anih chuan kan khaikhawm mai ange, hun a lo chep hma angreng viau mai a, thahnem ngaih chuan.

Engpawh ni sela, Pu Speaker, kan sawi duh chu he Dan hian zu zawrh ngawr ngawr lam a tum lo a, mi diklo te, hmang dik lo te, na taka hrema, tunhma a Dan kan la hmuh ngai reng reng loh te, entirnan KTP tha tak emaw, YMA tha tak emaw, kohhran emaw a mawhpurtu pawl tha tak te pawn zu a lo in ve palh thei, Dan pawn lama a lo ti a nih chuan hremna zawng zawng a awm a, khawlaiah, mi rama ram changkanga an tih angin, social works te tih a, khawlai phiah fai te thleng pawhin Dan ah khan an lo khung hi tha ka ti hle a. Hetiang Dan tha kan minister leh Department ten an rawn duangchuak hi lawmawm ka ti a, wawiin ah hian ka support duh a ni e. Ka lawm e.

*Speech not corrected

SPEAKER : Pi Awmpuii.

Pi VANLALAWMPUII CHAWNGTHU : Pu Speaker ka lawm e. A hmasain wawiinah he House chhunga thu ve thei tura min siamtu Pathian chungah leh, kan hotute chungah leh bial mipuite chungah te, Zoram dung leh vanga ka hmeichhiatpui moral support min petute chungah lawmthu he House kaltlangin ka sawi hmasa a ni.

Total prohibition han tih hian, a duh duhin zu an in dawn lo a, a duh duhin an zuar dawn lo a, a duh duhin an lei thei dawn baw lo a, a changtu minister zahawmtakin a rawn sawi tawh ang khan leh kan hriat theuh tawh ang khan Dan leh dun te, hremna Dan te, inkaihhraina Dan te felfai tak siam a ni a, chumi a nih avang chuan helaiah hian ngun taka kan ngaihtuahnate senga he ‘The Mizoram Liquor (Prohibition & Control) Total Bill, 2014’ hi ka support a. Tiang chuanin helaia ka member puite pawhin rilru ngaihtuahna zau tak senga he Dan siam tharte ngun taka ngaihtuaha support ve turin ka member pui zahawmtak tak te ka rawn sawm a ni e. Ka lawm e.

*Speech not corrected

SPEAKER : Pu Romawia.

Pu R.ROMAWIA, MINISTER : Pu Speaker, ka lawm e. Christian leh Mizo fate zingah, ‘Zu hi a tha em a, i phal rai ang u,’ ti tumah an awm ka ring lo a, hnam mawl chaw chhum thiam khawpa fing hi chuan zu siam an thiam vek a ni, khawvel ramah hi chuan, kamrah

ring aia an changkan chuan, chutiang chu a ni a. Khawvela kan awm chhung hian tha si lo, awm lo thei bawk si lo, awm miao si, a saptawng takin, necessary evil an tih ang chi, nawhchizawrhate, zu zawrhte hi a awm tlat mai a ni.

Heng thil tha lo, awm lo se kan duh, awm miao si ho hi hnawksak lo thei ang berin engtinngan kan khuahkhirhin kan enkawl ang, tih hi ngaihtuahna fim taka chhut ngai a ni a. Entirnan electric, kawlpheha chu thil chak tak mai, hlauhawm tak a ni. Amaherawhchu control a regulate theih a ni a, control a regulate chuan a tangkai em em si a ni. Chutiangin gas te chu thil alh duh, puak thei a ni a, mahse kan regulate chuan a tangkai em em a, eirawngbawl na leh thildang tamtakah kan hmang thei a, chutiang chuan, heng zu a ni emaw, nawhchizawrhna a ni emaw, heng ho te hi ram mipui tam berte tichhia leh tibuai lovin, regulate theih a ni em? Control theih a ni em? tih lai hi kan ngaihtuahna sen fo tur niin ka hria a. Mipui tam berin kan chhiatpui mek si, rilru hah tak, chung avanga kan tawrh mek si laiin, hei hi kan control thei em? Khuahkhirhna Dan tha zawk kan ngaihtuah chhuak thei em? tih hi kan ngaihtuah fo tur niin ka hria a.

Tin, Pu Speaker, he Dan hi kan chhiar ve a, zu zawrh phalna dan tih hi sawi dan lar tak a ni chungin, khapna leh khuahkhirhna Dan tih hi a nihna dik tak niin ka hria a. He Dan ah hian bung 10 a awm a, section 82 a awm a, bung 8 na ah hian section 28 a awm a, hei hi hremna hlirin a khat a ni, a Dan pumpui hmun za a 34 hi hremna Dan a lo nih chu, chuvangin kei chuan hremna dan a nih ber hi ka lo ti a. Tin, a hremna te pawh kum 5 chhung tan theihna te, ₹ 10,000/- thleng chawi tir theihna te a ni nawk mai a, a hlauhawm viau a ni. Chuvangin zu duh ho tan han hlimpui na tur awm chi kha he kan Dan sawi mekah hian a lo in fun lo hle in a lang a ni.

Tin, he Dan danglamna leh thatna em em ni a ka hriat chu, a in phalna te, a zawrh phalna te, khang permit-te leh card kan tih reng reng kha, lang tlang a ni dawn a. Tunge zu zawrh phalna pek ni a, tute nge zu in phalna pek tih kha kan hre dawn tawh a ni. Entirnan, tunah hian ka thenawm tlangval chuan zu in thinin ka hria a, Kohhran mi kan nih angin ka vei em em a, ka va len chilh a, a ni chuan, “E khai, ka pu, i hresual a ni, Phunchawngah ka kal ngai reng reng lo, Rangvamualah ka kal ngai reng reng lo, zu hi ka ti ngai reng reng lo asin,” lo ti se, kei khan counsel ngaihna a awm tlat tawh lo a ni. Mahse, tunah hi chuan permit-te an nei fak tawh dawn a, Card-te kha an nei fak tawh dawn a ni. Chuvangin target group tur kha a Chiang ta riau mai a, Krista hmangaih avanga khang ang miho kha kawng dika hruai tum a, vei tak taktu tan chuan kan va target turte kha he Dan hian min rawn hrilh ta fak fak mai a ni. Chu chu anni kha inzep thei pawh an ni dawn tawh lo va, chutiang chuan hemi Dan hi a tha hlein ka hria a, heti lai te mai hi. Tunah inphek vei ang hi chuan a har em em mai a. Miin, “Ka ti ngai reng reng lo,” an

lo tih tlat chuan sawi tur a awm tlat lo a ni. Chuvangin tuna hetiang Card leh permit holder lang tlang tak mai chiang fak mai, Chanchinbu engkim pawha hriat theih a, puan theih, RTI dan pawha dil chhuah vek theih, khang dan pawh kha a lo awm a, target group kha a lo chiang ta a. HIV positive veite pawh khatiang khan a bei pawl chu an chiang em em a, chung angho, “A dul hoin an put darh loh nan,” tiin, drop-in centre-te pawh siamin, hriaute pawh an pe a, an nunna tihsei nan damdawite pawh an lo pe ta ang deuh khan, khatiang mi va mal man fak fak tur a lo awm dawn tak avang khan zu zuartu leh zu inte duh lo va, tih sim a, tihtawp duh a, thahnemngaite tan target group chiang, luh chilh chat theih ni tura lo awm ta hi a pawimawh hlein ka hria a. Chuvangin permit, license te, surrender thlap thei tura counselling duhte tan nitina an va luh chilh turte kha, hei hi chona ropui tak, challenge ropui tak rawngbawltute tan thlarau leh taksaa damna duhsaktute tan a ni thei dawnin ka hria.

Tin, Pu Speaker, a tawp lamah chuan dan reng reng hi ennawn, siam belh, siam that a ngai fo va, India Dan pui Constitution ngei pawh hi kum 60 zen zawn kum 65 kan hman tak hnuah hian vawi za chuang lai siam that a lo ni ta a, MLTP Act pawh hi thangkhat lian teh meuh kan lo hmang ta a. hei zawng hi kan thlen chin a ni. Kan duh tak tak te, kan hmangaih te, kan fapa te, kan fanu te, kan makpa te, kan fa mo te, tam tak kan sun mek a, kan sun ta a, min liam san zung zung mai a ni. Chuvangin ram leh hnam hmangaihtu tak tak tan chuan, “Kawng dang a awm lul lo em ni?” tia dap loh theih a ni lo. Hetiang kawng daptute hi va hriat thiam loh ngawt tur pawh a ni lo. Thinlung taka ngaihtuahna chhungril ber atanga hetah hian, “Way out tha zawk a awm tawh lawm ni?” tia dapa hetiang Dan hi in hmang phawt teh ang u,” tia rawn chhawp chhuah a nih hi kan inhriat thiampui a ngaiin ka hria a.

“The Mizoram Liquor (Prohibition & Control) Bill, 2014,” hi kan ram leh hnam a lo dam zel nan thinlung lungchhia leh tap chung a lo piang chhuak a nih hre thiam a, Mizo fate zawng zawngin tih nuam tak leh thu awih taka a lo hlawhtlin theih nan thinlung taka sorkarin a hman hunah pawh tawiawm turin ka ngen duh a. He Dan hi he House zahawm tak hian pass-in han hmang phawt mai ila, a zawng chhang tlak lo viau a nih leh tih danglam leh theih zel a ni a lawm, Dan siamtu kan ni a lawm, Pu Speaker, ka lawm e.

Pu LALTHANLIANA : Pu Speaker, tlem han sawi ve ka duh a. Kan Minister zahawm tak Bill neituin a han sawi khan a sawi lang tho nain, helaiah hian kan sawi nawn leh duh chu, a Mizo tawng a sawi piah lamah part hnih deuhin a awmin ka hria a, ‘prohibit and control, production, manufacture, transport, import, export, sale, purchase and consumption of intoxicating liquor and’ a tih dawt hi kan la vung duh deuh a, ‘to provide for the imposition of excise duty thereon in the State of Mizoram’ tih ah hian helaia financial memorandum kan neihah hian vaibelchhe 30 chuang revenue kan hmuh phahna tur a ni tih a ni a. Tin, he dan te sep

hian a khung tel chu a zawrh phalna licence kha a lo ni ta a. Zu zawrh phalna dan hi chu a tih loh theih loh ve bawk a ni, helaia prohibition te, control te hi chu chhe lutuk pawh lo ni lo mahse zu zawrh kan phalrai dawn a, zu chhiah avanga hausak ai chuan zu chhiah tel lova retheih hi kan la huam dawn lawm ni tih hi Pu Speaker, kei chuan ka ngaihda a ni a.

A thu hrimin State dangte nen kan inkhaikhin a, state dang, kristian ram pawh ni lo, Kristian State pawh ni lo te tihdan kan entawn nge ni, anni pawh chutiang khatiang in an ti kan ti a, chu chu kan inkhaikhin fo tur pawh niin kei chuan ka hre lova. Kristian nive lo State te chuan an duh duhin lo ti ang hmiang. Keini chu Kristian State, Kristian ram, za a za Kristian-a inchhal ram kan ni a, kan tan hian zu zawrh hi a rem ve lo kan ti a ni.

Pu Speaker, zu zawrh hlawk zia hi chu kan ram mipui hian kan haiin ka ring lova, Amaherawhchu kan Bible in a duh lova, Kristian kan nihna atangin a rem bawk si lova, chuang chuan zu zawrha intih hausak ai chuan retheih pawh kan thlang zawk anih hi. Inhlawhna, eizawna tha zawk, zu kher ni lo hi a aia hlawklo pawh nise kan thlang zawk a nih hi Pu Speaker, Kristian tan chuan zu zawrh hi a remlo a ni. Kan thatpui dawn lo a ni tih hi kei ka ngaihda a ni a. Chuvang chuan zu hi i zuar lo hram ang u, chutiang chu thil awmdan a lo nih mek laiin keini Kristian rama kan hruaituten zu chhiah atanga intih hausaka, intodelh kan tum tlat mai te hi a zahthlak a ni lawm ni tih hi kei ka ngaihda a ni a. Chuvangin kan tih loh tawp tur kan ti ni in kei chuan ka hria a ni. Zu chhia in avangin kan chhiat phah, kan tawrh phah te pawh kan ti a, kan chhuanlam a ni maithei. Kum 60 ka kai ve tep tawh, Pu Speaker, zu in thiam hi khawvelah hian ka la hmu lo a ni. India ram hmun hrang hrangah pawh ka zin ve a, thian tam tak ka kawm ve tawh a, chuang chuan zu tha kan zawrh avang hian kan buaina te hi kiam sawt chuang hian kei chuan ka ring thei mawlh lo a ni. Mahse kan tlem zawk a nia, ti hian tihngaihna kan hre lo, kan mangang khawp mai. Zu zawrh phalna licence hi pu Speaker, kan pe a nih chuan zu chhia kan in avanga kan buaina leh kan tawrhna let engemaw zat hi zu tha kan in avang hian kan tuar dawn a ni tih hi kei chuan ka hmu lawk a ni. Zawlnei erawh ka ni lo, kan ram leh khawtlangah hian zu hi ti zalen lo ila, i ti tlangnel lo hram teh ang u tih hi kan tun dinhmunah chuan kei chuan kan sorkar hi ka ngen a.

Kan rinna inngahna ber Bible pawh hian zu hi a fak ngailo reng reng. A fak lo mai nilovin zu that loh zia hi min hrilh mawlh mawlh a ni. Thufingte 23:20-21 ah chuan “uaiin heh mite leh sa heh mite zingah tel suh ula, zurui mite leh sa heh mite chu an lo rethei dawn a ni”, a ti. State hausa nih kan duh a ni lawm ni? Zu kan zawrh chuan kan tam dawn, rethei kan tam dawn a ni. I Korinth 6:10 ah chuan rukhmangte leh zu ruih hmangete Pathian ramah an luh ngai loh tur thu min hrilh a ni. Pathian ram an luah ve dawn lo a nih chu, Pu Speaker, zu zawrh phalna kan pek chuan zu heh an pung sawt anga, Pathian ram lut lo tur hi an pung sawt dawn

anih chu. A mawh kan phur ngam dawn em vawiin ah hian, Habakuka 2:15 ah chuanin “A thenawm hnena zu in tur pe tu chu anchhe dawngin awm rawh se” a ti a ni lawm ni? A chung a pik e, a ti. Vawiin ah hian kan chung a pik ang tih hi kei ka hlau a, chuvangin Pu Speaker, kei chuan he dan thar hi ka pass pui thei tlat lo mai, min hrethiam dawn nia. Tin, drugs ruihhlo ngaiten an simna tur atan zu kan sawimawi deuh tlatin ka hria a, Lal Isua hi a tha ber. Zu nghei nan pawn Lal Isua, drugs nghei nan pawn Lal Isua hi a tha ber, chuvangin kan kohhran pawh hian a duh lo a ni.

Tin, a hremna dan te kha a khauh em mai a, Kristian pa in khati khawpa zu in lo thei lo kan tih te hrem vak vakna Dan han duan vak vak te hi kan tihtur a ni em tih hi kei chu ka ngaihtuah a ni. Ka lainat a ni, kan tawngtai sak ang a, kan ngaidam zawk dawn lawm ni tih te pawh hi kei chu ka ngaihdan a ni. Chawi tir a vuak hrep hrep te hi kan tih tur em ni, he lai House ah hian kan rel ang maw chu chu ? Kei chu Pu Chairman, ka pawm thei lo. Pu Speaker, he MLTP Act hnuaiah hian zu khapna hi a hlawhchham kan ti a, kan beidawng a, kan khuahkhirh zo lo a nih chuan, a total a hi kan han hlih ngat phei chuan Pu Speaker, kan hlawhchham leh Chiang dawn a ni tih hi kei chu ka ngaihdan a ni. A, kan tawng ring deuh hlek a min ngaidam dawn nia, min hrethiam dawn nia, ka thin a rim miah lo a nia. Thlarauvin min rawn pawl chuan heti tlat zel hi ania. Chuvangin Mizoram Liquor Total Prohibition Act dan tha tak mai kan neih lai hi hlip a, dan thar Mizoram Liquor Prohibition and Control Bill, 2014 hi chu Pu Speaker, tha ka ti lova, kan party pawh hian tha a ti lova. Chuvang chuan Pu Speaker, kan dan neih lai MLTP Act tha tak mai hi hlip lova kalpui zel turin kan sorkar hi ka ngen a ni. Ka lawm e.

SPEAKER : Aw, Pu Lalrinmawia Ralte.

Pu LALRINMAWIA RALTE, MINISTER : Pu Speaker, hun min pe a ka lawm e.

Term hmasa lamah khan nichinah Member zahawm tak, Pu K.Lalrinthanga'n a rawn sawi tak ang khan he House zahawm takah hian Total Prohibition Act hi kan enngun a ngai tawh a ni tih te ka sawi lang ve a. Sah-huk anih avanga a mamawhlo berte zing ami Pathian zarah ka nih ka ring. Zu hi a tui leh tui loh ka hre lova, a ruih nawm leh nawm loh pawh ka hre lo. Tin, ka hriat ngai pawh ka ring baw lo, Pathian zarah.

Amaherawhchu, Pu Speaker, a hminga YMA hruaitute kan nihna angin theihtawpin he Total Prohibition Act kalpui a nih chhungah, thingtlang leh khawpuih ngei pawh, he zu kan tihin a kan khawtlang a tihbuai thin zia leh, he Danin khapbeh a tumna te hre

chung rengin hmanraw tangkai nih tumin kan lo bei ve thin a. Chung atang chuan ngaihtuahna tam tak ka lo nei ve a. Vawiinah pawh hian ka ngaihthuahna zawng zawng hi midang ngaihtuahna nen a inmil ang ka tihna pawh a ni lova. He House zahawm tak kaltlang hian Zoram mipuite hnenah ngaihtuah tur engemaw han chhawp chhuah hrim hrim hi ka duh a ni. Ka hmaa Member zahawm takin a rawn sawi angte pawh kha mi tam tak ngaihtuahna ah a awm. “In mawl lutuk, in hre lo lutuk”, tih ngawt theih pawh a ni bik lova, kan inhrethiam tlang vek turah ka ngai a ni.

He Bill a lo luh hian ka rilrua awm han sawi chhuah ka duh, amah ang hi ni ve ila ka duh chu, hman zan, June ni 16 zanah khan Germany leh Portugal an inkhel a. Portugal-in thiam an intih ve teh reng nen, kum 4 lai an lo in buatsaih tawh hnuah, 4 - 0 in Germany in an han sawp a. Hrehawm an ti a, an Coach, Paulo Bento khan khawvel hriata a sawi chu, ama tawng ang angin, “ This is a moment where we will see who we are” a ti a. “Tutenge maw kan nih chiah le tih hi kan in hmuhna tur hun tunah hian kan thleng a ni” a ti a. ‘Reality check’ an tih hi, anih dan dik tak hi kan hmuh a, kan pawm ngam a ngai tain ka hria, kei pawh. He Bill in a a rawn tum pawh hi chu chu a niin ka hria a ni. Total Prohibition Act hmang hian kum 17 zet zu nen kan inkhel a, mahse 17 – 0 in kan hneh lovin ka hria. Hei hi thu dik a ni. Sah-huk kher a ngai lo, hawn huk kher a ngai lo, khap burna hnuaiyah pawh kan hneh chuang lo. ‘A thenawm hnena intur petu’, kha an pung tual tual thova lehlamah chuan, a pek zu lah chu a chhe em em a ni.

Chuvang chuan nichina kan Member zahawm tak thusawitu hmasa pakhatin a rawn sawi ang khan kan dinhmun dik tak kan enchiana kan pawm ngam a ngai a ni. He dan hian tute emaw tan chuan permit pein zu zawrh a phal dawn, a dik. Mahse hetiang dan kan neih hma, Total Prohibition kan neih laia tuma zawrh phal loh a nih lai khan mi tam takin an zuar tho. Chu chu thu dik a ni leh tlat; a chhe zawk lehngal a ni.

Tawngkam mawilo ni lo sela, zu check in kan han kal a, a zem te kan han tichhia a, hei hi maw ka thalai puite’n an in tih ka ngaihtuah hian khawvel thalai zawng zawnga zu zahpuiawm leh chhia leh him lo ber intu ka thalai puite hi ka lainat thin a ni. Engatinge a tha an in ve mai loh? Zu hrim hrim hi an nghei thei a nih loh chuan? Total Prohibition Dan chuan a total-in khap mahse, mihring rilrua duhna leh chakna hi a khap bet zo si lo, tih hi thil chiang a ni. Bible in a phal loh tam tak hi nitin zantin hian ka chak a, ka ti tlat thin a nih hi. Chuvangin Total Prohibition phei hi chu Bible ai pawha kan hlauh loh a ni a. Min khap hneh lo chiang em em khawp mai a ni. Chuvangin Pu Speaker, he Dan hian ka chakna a tireh zo si lova. Khuswant Singh-a, Indian Writer lar tak, ka ngaihsan em em hian Pakistana a zuk zin chanchin a ziak a. Ka nuih a za angreng a, “Pakistan-ah ka zuk zin a, zu an lo khap bur mai a, ka in duh si a,” a ti,

“an zute chu ka’n in ta a, India rama kan zu naran ang tho a ni a, mahse, sual rim a nam bik a, a tui sawtin ka hria,” a ti. Mihring rilru hi a sawi chiang hian ka hre khawp mai.

Vawiinah hian ka sawi duh mai mai chu khawvel ram 190 chuang zingah hian ram 15 in chiang takin prohibition an kal pui; Muslim ram vek an ni. Afghanistan te, Bahrain te, Bangladesh te, Brunei te, Iran te, Iraq te, Kuwait te, Libya te, Mauritania te, Pakistan te, Saudi Arabia, Sudan, Qatar, Yemen leh UAE ten an kal pui. A chhan chu Quran ah khap tur a ni tih chiang taka a ziah avangin. Amaherawhchu, hengah hian, Bangladesh-ah chuan Kristian tan zu in leh lei theih a ni. Pakistan-ah Hindu leh Kristian leh Zoroastrian minority te tan zu permit neih theih a ni. Chutiang chuan Iran-ah takngial pawh ‘religious minority’ te chu zu permit an neihtir a ni, Kristiante pawh. Kan khapna dan leh kan duhdan kha a inang lova. Anni ah chuan Kristiante an zalen a. Nuihzatthlak angreng deuh chu, Pakistan-ah pheih khu chuan Kristian-ho nen khuan an permit khu an zuar thin a, Zoroastrian leh Hindu ho khuan, Muslim ho hnenah an hralh thin a ni. Nuihzatthlak ang reng deuh bawk chu heng ho ram zawng zawngah hian (nuihzatthlak anga sawi chu a ngeiawm ang a, pawh deuh chu) tumah hi ‘ka hlawhtling’ ti ngam an awm reng reng lo. Saudi Arabia te khu erawh chu, ‘a rukna kut chu tan tur’ ti hmuk mai an nih avang khuan an khap fai leng a, khawiah mah phal chhinna an nei lo. A dang zawng zawng Arab ramah hi chuan khawi hmunah emaw hotel ah emaw tih ang tal hi chuan khawvel khualzinte tan harsatna siam lo turin kawng an hawng thin a ni.

India ramah hian Gujarat, Lakhshadweep, UP, Manipur, Nagaland leh keini hi kan ni a. Nagaland-ah hian keini aiin an ti hmasa a, North East state zawng zawng zinga zu khap bur hmasa ber an ni. Amaherawhchu, khawvel khualzinte kaihhruaina atana Internet a an thu post pakhat nuihzatthlak deuh awm chu, Nagaland-a zu zawrhna tam zia te, IMFL tam zia te, zutho (local zu) tam zia te, Mizoramah pawh kan zu chhiat zia leh hlauhawm tak a nih zia te khawvel mipui hriat theihin an tarlang, Pu Speaker i phalna in, “it is a fatally toxic blend of methyl spirit and vynil,” an ti. Heti khawp hian kan local zu tam em em mai hi a hlauhawm zia an in sawithaih a, khualzinte pawh, “in lei dawnah chuan a brand check uluk ula, tin to em ema lei turin inring lawk rawh u,” an ti. ‘A awm lo’ an ti reng reng lo. A chhiat zia leh a hlauhawm zia leh fimkhur a ngaihzia an sawi a ni.

Tichuan kum 17 kan inkhelh hun chhungah hian Pu Speaker, kan Excise Department Staff tlemte te chauh hian IMFL bottle chi hrang hrang nuai li sing kaw chuang lo man tawhin cheng vaibelchhe 22 leh nuai 63 chuang hu a ni a. Beer te, tin, keimahni local zu cheng vaibelchhe 13 chuang man ngawt a fim an mante nen. Tin, he kum 17 chhung hian zu bilh lai tin nuai 14 chuang an lo man tawh a tin 1 thlengin a figure hi kan nei a. Kum 17 hian he dan hnuaiah hian mi 51704 man an ni tawh a, chung zinga mi 46901chu Case Register an ni nghe

nghe a. Kum tin he dan kan hman hnuaiiah hian mi 3041man zel ang an ni a, kum tin mi 2758 tan Case Register a ni ziah ang a ni. Chutichung chuan, Pu Speaker, a tam tual tual a, ‘a zualzapui vaihlenhlo’ tih ang a nih hi.

Chuvangin Zu chhe pui pui lehngal ina kan khap ti chung si a pung tual tual a khap hneh chuang si lova kan thalai te leh a in duh mite’n hlau leh tlanche chung, dan leh dun pawh sawi hlei thei lovin hmun leh hmunlo pawh sawi thei lova an tih ai chuan dan khauh tak hnuaiia YMA kan duty ve thin te, dan lo tawpa mite pawh va man ve ringawt thin te thuneihna pekna hnuaiia he Dan hmanga fimkhur taka kan zawrh hi a hun ta mai loh theih loh avang zawkin niin ka hria. Hei hi thil tha ber leh ropui ber a ni tih avangin kan sawrkar hian a ti a ni tih ka ring thei lova. Kan hnam dinhmun leh kan thlen chin enin loh theih loh hmunah kan ding tawh niin ka hria. A intu zawng zawngte hnenah pawh ka sawi ve duh chu, engatinge Total Prohibition te, Control te hlauhawm taka hetia siam ngaia Mizo fate hi kan awm bik le! tih hi ka ngaihtuah thin a ni.

Kan Chakma leh Bru unaute, keini aia lehkha thiam lo zawk leh hnuaihning zawka kan ngaih te hi an hnam nun leh sakhuaa zu bet tlat zawkte hi heng avang hian an buai loh laiin engatinge hlauhawm tinreng nena vaubeh kher kan ngaih? tih erawh hi chu a in duh te zawng zawng, ka hnampui te hi ngaihtuahna hman nawn leh turin ka duh ve hrim hrim bawka a ni tih hi ka sawi lang duh a ni. Pu Speaker, ka lawm e.

Er. LALRINAWMA : Pu Speaker ka lawm e, vawiinah Bill thar Mizoram Liquor Prohibition Control Bill, 2014 sawi an ngai ta hi lehlam zawnga ngaihtuah chuan a lung chhiatthlakin ka hria a. Kan hotuten an rawn pu lut a ni a. Chutih rual erawh chuan Sunday zan te kha kan inkhawm hlawmin ka ring a, kan tawngtai loh pui dana kohhran member duhawm tak tak tena chet kan han la mai tur lai hi chu a hrehawm ang reng khawp maia. Tin Zu hrim hrim lai a hi a nghawng tawk nei lo a kan chaih chung pawhin kan chaih hneh lo a ni a, a thlunna han phelh thawl te phei chuan kan Lal thutthlengte nen min hnuk hniam vek ang ka ti rum rum a ni. Ka hmaah member zahawm tak tak ten mawi takin in sawi a, mahse a enga pawh lo inziak sela a tlangkawmna erawh chu Zu zawrh phal loh atanga phalna a ni mai a, sawi mawi vak kha theih pawh ka ti lova, ka member pui zawng zawngte pawh Support lo turin kan ngen nghal che u a ni.

Zu hrim hrim hi kan hre chiang lo emaw ni chu aw... ka ti a. Ka in ngai lem lova, mahse in lem loh hian a lo chiang viau zawk emaw ni chu kan ti deuh a, thil dang hi chuan anmahni hmangaihtu te hi a lo duat thin a, zu erawh chuan amah an hmangaih zoh poh leh a ti rethei tawlh tawlh mai a ni. Hei hi kan hriat ka duh kawp mai. Tin, a rah te pawh hi kan en

ngaiin ka hria. Damlo tam tak an awm a, an thih dawn te hian vanram ka fang, Lal Isua hmel ka hmu an ti a, zu avanga buai hi chu Lal Isua hmel hmu sawi tur an awm lo, ramhuai hmu vek an ni thin, a rah pawh a tha lo hrim hrim tih hi ka sawi duh a ka vah vel naah pa pakhat chanchin an sawi a an khua ten, kawt laia Bible a lo chhiar melh melh chuan a chhung lamah a lo chhuang a ni ngei ngei an ti a. Khatiangte pawh kha kan ang rum rumin ka hria tunah hian. Chuvang chuan, Bible chang nen hian ka tan a, a chhunglamah a phalna kan lo pe dawn si, an zuar leh dawn a ni a. Chuvang chuan, kan Sorkar kalphung nen pawh a inmil lova. A leh lamah chuan sorkar Bible chang nen a min lo welcome in ni a, a lawmawm viau rualin anih phung nen a inmil lo hlein ka hria a, kan sawi duh bawk a.

A hmaa sawitu zahawm tak tak ten in sawi angin a hlawhtlinglo chutiang khatiang in ti a. Mahni dan siam ngei mai a hlawhtlinglo tia kan han au kan han au pawh hi kan inngaihtuah chian deuh chu a ngai a ni mai awm mange aw ka ti a. Vawiinniah hian lo pass pui ta che u ila a hmaa in Dan siam sa pawh a hlawhtling lo tia au au thin te kha vawiinniah pawh hian han pass pui ta che u ila in lekkawh zo chuang ang em tih hi ngaihtuahnaah a awm a. Chuvangin, pass pui chi in ni ang em aw tih ngaihtuahnaah a awm rum rum a ni tih kha kan sawi duh a. Tin, Dan te pawh hi a hlawhtlinglo tih avanga kan thiat duh a nih chuan tual thah khapna dan te, thil ruk khapna dan te, mi suam khapna dan te kan siam a ni lawm ni. Bible ngei te pawh hi a ziak chu a kan ti hlawhtling lo a lawm. Vawiinniah hian IPC kan ziak tha leh mai dawn em ni? Kum 17 kan hmang kan ti a, a hlawhtlin lohna kan sawi a. Anih leh Dan chu a lo rei a, a hlawhtlin loh veleh a dang kan siam leh mai dawn em ni tih ka ngaihtuah a ni. Chuvang chuan, vawiina kan Member pui zawng zawngte pawh he bill thar hi support lo turin ka ngen nawn leh che u a ni.

Tin, chu mai piah lamah democracy ram kan ni a, mipui ngaihdante pawh kan la turah kan ngai a. Kohhran Kristian member hlun tak tak te kan ni a. Kohhran ngaihdante pawh hi kan zah turah kan ngai a. Vawiinniah hian kan ban tlem vang te, kan Member tlem vang te hian min hneh pawh a ni thei e, Amaherawhchu, Sunday Sikul lamah te vote han la ta ila chuan min hneh bik ka ring lo tih ka han sawi duh a. Tin, mifel tak tak kal khawmte in ni a, bial hmangaih tak tak kalkhawm te in ni a, kan bial mite rilru te pawh kha ngaihtuah ta ila. Vawiina kan pharna tur lamah hian an phar em tih te pawh hi kan mipuite pawh hi ngaihtuah ila. Vawiina ka Member pui lo kal zawng zawngte he Bill support lo turin kan ngen che u a. Kei pawhin ka support pui thei dawn lo che u a ni e. Ka lawm e.

SPEAKER : Sawi tur dang kan awm tawh lo a nih chuan e, Pu T.T. Zothansanga.

Pu T.T.ZOTHANSANGA : Pu Speaker, hei kawr thar kan nei dawn a, a engamah hmain a va fual awm ve ti kan ang tan viauin ka hria. Hei kan thu khel hi a pawimawh khawp mai a, thil dang daih kan sawi ang a, kum 1995 khan PYF organize-in Silchar-ah khuan drugs chungchang hi kan zir a ni. Chutah chuan Resource person-ah min ruat ve a. ND&PS Act 1985, chungchang hi fiah deuhin kan sawi a. Hre thawkhat pawh khan ka inhria a ni. Nimahsela, ka lo hriatchian loh zia hi Ukil ka nih hnu hian ka inhrechhuak chauh mai a. Ka lo ral hriat dan leh tun hnua Ukil-a ka luh tak hnua ka hriat dan hi a lo inthlau em em mai a.

Tuna MLTP Act kan han tih pawh hi 1995 ami kha kan her danglam dawn a ni mai a, kan chiang tak tak em aw tih hi ka ngaihtuah a, hrechiang lo tak, MLTP Act vawi khatmah la chhiar lo leh kan kalpui tum dan pawh vawi khat pawh chhiar lo hian Chanchinbuah leh engmaw thil dang tam takah hian comment tam tak hi kan pe teuh teuh mai a. Sorkarin a kalpui tum dan pawh hrechiang si lo tam tak hi chu kan nih ka ring a. A phawvuakah kan lo rui em em mai a, Tirhkoh Paula tawng kam takin boruakte hi kan lo hnek vak vak ringawt mai a tih te ka rilruah a awm a ni.

Tunhma kan politician lar Pu A.Thanglura khan a sawi a, Silcharah Rev. Zairema a awm lai khan a zu thleng thin a. Kei chu zu duh mi ka ni a. Vawi khat chu zu kan in a, “damdawi anih hi” kan ti mai a, ‘a ngawi ve mai a’ a ti. Tichuan ka kal leh khan kan ti leh a, “E khai, Lura, i damdawi hi i ei rei ta em mai, i ngeih lo a ni ang thlak tawh rawh min ti a ni a ti.

Zoram thatna tur anih ring hian MLTP Act 1995 pawh hi he House-ah ngei hian sorkar hmasa lamah lo passed tawh a ni a. Zoram ah harsatna chi hrang hrang kan tawh a, zu in a tihbuai ngai loh Mizote tunhma chuan kan ni thin a. Amaherawhchu, khawvel zau zawkte kan han daidar a khawvel hmasawanna chak tak mai karah te kan han khawsa chho ve a, chutihlai karah chuan tunhma a kan harsatna ni ngai lo Zu hi kan harsatna a ni ta fo mai a, chuvangin, Zoram ah harsatna chi hrang hrang a lo awm ta a. Kan hotuten “E khai hetiang chuan a dik dawn love, hawh teh u, i ngaihtuah tlang teh ang u”, an ti a, an ngaihtuah tlan hnua 1995 khan Total Prohibition Act hi an lo passed ta kha a ni a. Zoram dinhmun siamtha leh tura beiseina sang tak neiin Total Prohibition kha Zoram ah kenkawh a ni ta a ni.

Tichuan, sorkar a lo chho zel a, ka hma a Member zahawm tak Pu Rinawma han sawi ang khan mahni Dan siam han tihlawhtlin loh chu ti ang deuh khan a sawiin ka hria a, anmahni sorkar hun chhung kum 10 chhung pawh khanin an hlawhtling lo lehzual a ni, kha kha kan sawi tel duh hram a ni. Khawvel zau zawkte kan thlir hman lo ang hian, kan Zoram ngeiah pawh kan hnam tichhe tu ni a hriatna thui tak kan lo nei tawh thin a, tichuan khap beh tumin hma te pawh kan lo la tawh thin a, amaherawhchu hneh tak tak theih a ni lo anih kan ring tunah hian kan hneh lo em mai.

Tunhma pawh khan MNF thenkhat pawh khan hmeithai zu zuar te zu kha an lo va in sak thin a, “Independent kan nih hunah kan rul ang che u” te pawh an lo ti a ni, tun thleng hian zu man kha an la ba tihna a nih chu. Tichuan, zu khap burna dan chu kum 1995 atangin kan han kal chho ta zel a, kan ram leh kan hnam damdawi ni tura kan ngaih leh, Zoram سوالنا a su kiang duak duak ang a, sakhwana lamah pawh thuk takin kan kal ang tia kan ngaihtuah laiin kan beisei ang kan pha ta lova. A dik tak chuan Total Prohibition kan neih tirh khan mipuiin a kan beisei dan chuan, Bible ziah angin, “kein in Israel te tlan tu tur a nih kan beisei teh lul nen” tih ang deuh khan Zoram سوالنا zawng zawng hi hui kiang deuh duak tur khan kan ngai deuh a ni. Amaherawhchu, hun a lo kal zel a kan dinhmun kan hria, kan tum ang a ni chiah lo, “tlemin her rem ila a tha ang a” tih ngaihtuahna thinlung pu in tunah hian her rem turin chhawp chhuah a lo ni ta a. Pu A. Thanglura damdawi a chak tawk lo ang deuh khan kan total prohibition hi a chak tawk lova, chuvangin “tih chak leh zual dan i ngaihtuah ang u” kan han ti deuh chauh a ni.

Hei, Ukil ka nih avangin MLTP Act hi a hre ber pawl te pawh ni tura inngaihna te pawh kan han nei a, he Dan a that tawk leh tawk loh pawh hi ka hre ve in ka inhria. Kan Member zahawm tak Pu K. Sangthuama khan, ‘a ngai hian la kal chho ila chutiang khatiang’ kha arawn ti na a, a practical a kan han hman chhohna kawngah hian harsatna hi kan tawk nasa em em a. Amendment chi hrang hrang te kan han ti chho a tichuan, Amendment hmanga a pawp te kan han thawm zel avang hian a dik tak chuan MLTP Act 1995 pawh hi a original ang hi chu a ni tawh chiah lo a ni. A pawp bel zel a ni a, “a tum tak ti bo silovin i her danglam ang u” tunah hian kan ti mai a ni, khap burna dan hi kan siamrem ngun tawh hle a, kawr chu nise a pawp hi kan bel hnem tawh avangin hak tlak pawh a ni tawh lovang tih ka ring a ni.

Chuvangin, vawiinah hian zu hi kan tan hrim hrim emaw kan duh avang hrim hrim emaw arawn move kan ni lova, tuman a hranpa in zu hi kan tan in ka

ring lo; tin, a fak pawh kan fak hran lo, kan duh lo tlang a, tihbo kan tum a, kan tihbo theih loh takah chuan a her rem dan a awm thei mai lawm ni tiin kan hlawhchhamna dan kha ring tawh lovin a hlawhtling lehzuaw zawk leh kal ti rualrem zawngin tlemin kan dah rem thei lawm ni tiin vawiinniah hian ka rawn chhawp chhuak a ni.

Tin, zu zuar anga pawnlung taka kan inpuhna pawh hi a dik tak chuan kan inpuhna ang hi chu a ni lo, tuten emaw Khatla kawnah te, Chawnpuiah te purunsen leh thlai dang an zuar ang ngawt a duh duhna hmuna lei tur pawh a ni chuang lo, systematic takin sorkarin a control-na hnuaiyah mumal deuh zawkin a rawn ti dawn a ni a.

Tin, kan Opposition te khan a chhiah it avang liau liaua rawn move-ah an ngai deuh niin ka hria a, pawl ka ti khawp mai. 30 crore pawh lalut ni ila he Zoram sum indaih lohnaah hian eng angin hna a thawk tam chuang lo. Kha kha a main purpose a ni lova, a purpose ber chu Zoram hian zu hi kan nghei thei silova mumal deuh zawkin zu thianglim kan in theihna turin hma i la ang u tih ngaihdan kan nei zawk a ni. Zu hi kei chuan a mimal takin ka mamawh ngai miah lova, ka in ngai lova, a tui leh tui loh pawh ka hre chuang lo. Amaherawhchu, a buaipui tam ber te zinga mi chu ka nih tho ka ring.

Hei, keini chu khawchhak lama awm thin kan ni a, zu tha lo, eng eng emaw an han dilute a, an han tih ang chi kha ka hre hnem em em mai a, tin, B-i te nen an han pawl a, tin khawchhak lamah te chuan B-i hi 24 hours an chiah phawt a nih loh chuan a in ngam loha 'tur a ni' an ti a, khatiang avanga thihna te kha Champhai lamah khi chuan a awm a awm tawh thin a. Khatiang te'n a Mizoram-a zalen taka tual a rawn len hi hnawlbo anih theih nan mumal deuh zawka dan hi chu kan siam that hi a pawimawh a ni tih kha ka'n sawi duh bawka a ni.

Tuna kan bill support-tu tam tak hian a dik tak chuan zalen takin zu kan zuar huk dawn emaw an ti a, a in tam tak hian nakinah a hremna hi a tam em avangin harsatna pawh hi kan la tawh hial ang tih ka ring a, chutih rualin tuna duhlo tu tam takte pawh hian engtik hunah emaw chuan a Dan leh systematic leh in siamna mumal tak a lo awm avang hian an fak let hun hi chu a lo awm mai awm mange tih ka ngaihtuahnaah hian a awm a ni. Engpawhnise, Pu Speaker, hei vawiinah hian sawi tur a tam a, kan ramin vawiin niah hian hei hi kan ngaihtuah nasa a, zu chhiah kan it vang ni lovin mumal deuh zawka kan kal theih nan ka rawn move a ni a, hei hi ka rawn thlawp a.

Tin, Pu Speaker, chutih rualin thil dang pakhat han sawi duh lawk ka nei a, hei Assembly-ah hian thil kan sawi thin a, mizotawng leh saptawng hian in rawn print chhuak thin a ni hei hi tha ka ti khawp mai a, hei a hnuhnung berah khan kan en chhin a, a mizotawng leh saptawng kha a mizotawng kha tlar 109 lai a nih lain a saptawng kha tlar 20 lekin a rawn zo ta mai a, hei hi enge kan kal dan thin hi ka hre chiah lova, kan Assembly proceeding hi hemi mizotawng kan sawi minute 10 chhunga ka sawi kha tlar 20-ah a rawn confine thei ta mai a, hetiang ang hi anih chuan kan library-ah hian a nalh lo palh angem tih ka ngaihtuah a, nakinah library-ah saptawng publication kha kan dah dawn a ni a, khalai tlar 20 lek kha minute 10 chhunga ka sawi kha a ni lo hrim hrim a ni. Hei hi engtinng e kan kal dan a hi min lo hriatthiam pui ka duh a, hei a saptawng leh a mizotawng kan la chhuak a, a mizotawng chuan thui deuh mai a ni a, a saptawng chuan tlar 20 hian a rawn zo der mai a, hei kan proceeding hi kan tu leh kan fate pawhin la rawn en duh hun te pawh an la neih ka ring a, chuvang chuan he lai House-a kan sawi na na na hi chu a saptawng pawhin kim chang takin han tih theih dan a awm thei tho lawm ni tih kan belh deuh zauh a nih chu. Tichuan, kan bill hi ka rawn thlawp e.

SPEAKER : Dr. K. Beichhua

Dr. K. BEICHHUA : Pu Speaker, ka lawm e. Vawiina kan bill pass tur hi thil pawimawh tak mai, kan ngaihtuah ngun ngai tak mai kan tihsual leh tih fuh ina ram dinhmun nasa taka hril tur a nih avangin vawiin hi a pawimawh hle in ka hria a, chuvang chuan vawiin ah hian rilru tak taka kan ngaihtuahna te kan sawi a tha in ka hria a. Mahse vanduaithlak takin keini lam atang hi chuan eng anga thu tha pawh hi sawi dawn mah ila, kel a, be be mah la ka talh dawn tho tho che tih kha kan hlawh dawn a ni. Chuvang chuan kan ngaihdan thawhte kha chu a thiang a, ka ngaihdan ka rawn sawi ve ang a, min pass khum dawn tho tih kha chu a hriat a.

Aw le, nichina rawn sawi tute khan zu in ngai lo an nih zia te an rawn sawi a, an fakawm viau a. Kei hi tunhma chuan zu in ve thin ka ni. Zu in experience lo nei tawh ka ni a, Pathian zarah tunah chuan in tawh lo ka ni, in tawh loh experience pawh nei tawh ka ni. Ka compare hian in aiin in loh hi a tha zawk tih keima experience atanga ka hmuh chhuah a ni. Tin, vawiinah hian MLTP, MLPC ina kan thlak mai tur hi tha ka ti lova, dik ka ti lova, ka pawm baw lo a ni. Chutiang chiah chuan ka ngaihdan ang chiah hi kan party ngaihdan a ni tih kha ka rawn sawi a ni. Engatinge ? kan tih chuan keiin a vawiina ka pawm loh chhan chu : 1) kan policy a ni lo pakhatna han ti phawt ila a dik viauin a rinawm a, a pawimawh zawk chu kan economic dinhmun ngaihtuah hian vawiin ah hian MLPC la kalpui hlei thei kan ni hian ka hre lo a ni. Kan hohute'n kutdawh hnam

kan ni kan ti thin a, ram rethei, kut dawh a la awm kan ni tih hi kan hotute tawngkam kan hre zauh zauh thin a ni. Dik pawh a dik ka ring, chuvang chuan kut dawh bawk, zu in bawk, zurui bawk, zu siam bawk, zu ngawl vei bawk tih hi chu ka pawm lo point 1- na.

Point 2-na ah chuan Law & Order, MLTP kan nei hi vawiin ah hian Law & Order enforcement lam hi chak se a fail lovang, a Dan hi a fail lo, a Act hi a fail lo, enforcement lamah kan failed a ni, sorkar kan failed a ni. chuvang chuan damlo damdawi tha tak kan pe tawh a, a dam Chiang thei lova, he damdawi hi chu a tha lo ve ti a damdawi chak lo zawka thlak mai hi damlo ten an dam pui ngai lo, chutiang chiah chu niin ka hria a ni. Vawiin ah hian ka ngaihhdanah chuan midang ngaihhdan ni lovin. Law & Order kan kenkawhna ngaihtuah hian vawiina kan Control Rules, kan Control Act, kan Control tur hi ka ngaihtuah a, nimirah khan kan Home Minister zahawm tak hnen atang khan kan hre tawh a, Bike proton vuah, Jet fighter anga ring, dan bawhchhia pawh kha kan control thei lo a ni a, vawiina thawm nei lo, ri nei lo, a ruka dan bawhchhetu tur hi kan control in ka ring lo a ni. Chuvang chuan member zahawmtak te u, vawiin ah hian he kan MLTP kan control thei lo hi keimahni thiam loh a ni. Tan la leh zual ila a ngai khan kal leh ang u tih kha ka rawtna a ni bawk a.

Tin, kan infrastructure dinhmun ngaihtuah hian vawiin ah hian kan kalkawng te hi ngaihtuah ila, a zim a, a chhia a, kumtin mai hian a chhiat belh zel emaw tih tur a ni. Hetiang kara MLPC hnuaiia kan thalai ten motor nalh tak tak te an han tlan kualpui a, Bike nena vung deuha an han tlan tur hi ka thlir ngam lo a ni, a rapthlak dawn hle in ka hria. Chuvangin kan infrastructure vawiina kan kalkawng dinhmun te hian a zir ngang lo a ni ka ti kei chuan. Chu lo ah, vawiina kan ram Mizoram social life hi society free tak kan ni a, hmeichhiat /mipat kawngah pawh kan free, kan thalaite hian vawiinah hian total prohibition ni lova total control atanga total paih a, a total lova kan kal hun a, zalen taka zu in tur te lo nei ta se, Zu in thalaite a a hnathawh complication pawimawh tak chu Sexual inhibition hi a ni, thalaiten zu an in chuan sex ah hian in control theih lohna nasa tak an nei a ni.

Chuvangin member zahawmtak tak ten mita kan hmuh theih ang chin tam tak te an lo sawi tawh a, vawiinah he zu hi zalen deuhhleik in kan thalai ho te hian lo hmang ta se kan hmuh theih loh scientific thila min tichhe thei tu tur hi tam tak a awm tlat. Pakhat na ah chuan kan thalaiten sex ah zalen tak in in control theih loh na an lo nei ang a, chumi in a a hrin tur chu Africa ram Rwanda te phei chu an mang vek tawh khu. Khutiang khuan kan thalaite ah hian vawiina HIV/AIDS kan vei teuh na ber chu Drugs a kan in chiu na aiin Sex ah hian a ni, kan Mizoram statistic ah khan en

ila, Sex atang hian kan vei nasa ber. Chuvangin Sex atang hian he kan Dan thar hian HIV/AIDS hi nasa takin thalaite hian kan kai mai ang tih hlauhthawna lianpui ka nei a. Chu chu lo ni ta se, HIV/AIDS chang pawh a ni lo, vawiinah hian Hepatitis C, Hepatitis B tih Sexually Transmitted Diseases kan tih ang chi mihring nasa taka min tichhe thei tu hi tam tak a awm a ni, chu chu a hring chhuak ngei dawn a ni tih hi a hmu Chiangtu leh Medical Profession kum 20 chuang ka lo practice atanga a hrechiangtu pakhat ka ni. Heng avang hian vawiina kan Dan thlak tur hi chu a pawh ka ti in remlo eng ang pawhin ti lo mahila, in passed dawn tho tho bawh si a, a lungchhiat thlak ka ti a ni.

Chu lo ah, vawiinah hian kan hre theuh a, he Zu tha avang hian dik tak chuan milian fate hi an thi tam zawk, Rakzu vanga officer fa thi, zu ngawlvei thi hi hmuh tur an awm vak lovang, foreign liquor vek a ni. Medical-a kum 20 ka practice chhunga milian fa thi te hi rakzu chhe mai mai in an awm lo. An nu leh pa ten Assam Rifles, khawi ram atang tang emaw, Silchar ang atang emaw a pack pack a an lak chhoh sak ho hi a ni. Dik tak chuan kan milian fa te internal bleeding nei, liver cirrhosis leh thildang dang complication tam tak thihpui thin ho hi heng local zu hi a ni lo, zu tha man to chi hi a ni an thihpui thin ni tih hi a hmutu zinga mi ka ni tlat. Chuvang chuan vawiinah hian he Dan kan pass tur hi chu rem ka ti lo a ni.

Vawiinah kan work culture thlir hian sorkar hnathawk kan ni emaw, sumdawng kan ni emaw, kut hnathawk kan ni emaw, he zu hian ka lo experience tawh, ka lo in ve tawhna leh ka in tawh loh hnu a ka in compare hian kan work culture-ah hian kan work efficiency hi nasa takin a ti hniam dawn a ni. Tunah hian member zahawm tak tak te u lo chhinchhiah rawh u, he Bill hi pass ila kan pass hnu thla 2 thla 3 thla 4 velah chuan in Department chan kha lo chhinchhiah mah rawh u, a thleng dik nge dik lo. Kan staff te work efficiency a hniam daih ang, chu chu a sawkhawk tur a ni. A then phei chu zan lama a ruka lo ti deuh vak a, chhun lama luhai (hangover) vanga office a hnathawk thei lo pawh staff tam tak in neih ka ring.

Engpawhnise vawiinah hian hei hi kan tih chuan nu leh pa ten kan fa te hun lo takin kan la sun zel ang a, kan fa ten hun lo takin nu leh pa an sun ang a, fa te lo sun tawh ten tu leh fa te an sun leh zel tur hi kei chuan rem ka ti lo va. Engpawhnise Kohhran hi Pathian in direct ni lovin indirect a min biakna ni hian ka hria. Kohhran through lo hian Pathian hian direct in zu hi zuar rawh u, zuar suh u min ti dawn lo. Chuvang chuan Kohhran aw hi Pathian aw-ah ngai ila.

Tin, NGO aw te pawh hi a zahawm a, Kohhran aw vawiinah kan hnualsuat a an ngenna leh an zilh hauna te kan ngaih pawimawh loh chuan kan ring hi wawi leh khatah tih tliah thutin a awm ang a, tih damin a awm tawh lovang tih Thufing-ah kan hmu bawk si a, a hlauhawm viau a ni. Chuvang chuan pass lo turin ka sawm che u a, kan Pathian aw a ni tih anga ngai a Kohhran aw leh ka te pawh hi ringtu vek kan ni a, kei aia rinna kawng a chak tak tak vek in ni a. Chutiang rilru pu a he bill hi chu pass loh duh vek turin member zawng zawngte ka sawm che u a ni.

SPEAKER : Tunah Pu Vanlalvena i ko hmasa ang, a phar hmasa a.

Pu R.VANLALVENA : Pu Speaker, ka lawm e. Vawiinah kan ram leh hnam tana pawimawh tak tur kan Excise Minister zahawm takin rilru leh tih tak zet hmangin, amahin zu hi a tanah engmah a ni lovang tih hre reng chungin kan ram leh hnam thatna tur ngaihtuahin bill tha tak mai a rawn pu lut hi lawmawm ka ti a. A thusawi kha nichin khan kan ngaihtla a, a thusawi tawp an tlipna khan ka rilru a hneh khawp mai a. A thusawi khan kan ram leh hnam tana a ngaihtuahna tak tak a sen nasat zia a ti langin ka hria a, Pu Speaker i phalna in kan chhiar lang ang e, a tlar tawpna tlar 3 lek te kha - MLTP Act, 1995 hi tih danglam duh lo hle mah ila tih ngaihna dang a awm si lo va, hreh tak chungin tih danglam a lo tul ta a ni, a ti a. Hei hian kum 17 chhung zet Total Prohibition kan hmang a, kan ram in kan thatpui si lo a mangan thu leh heti zawng hian her hret ila kan ram leh hnam tan hian a tha zawk ang tih ngaihtuahna nasa tak a rawn hmang a ni tih a ti lang chiang hle in ka hria a.

A hmasa a kan member pui zahawm takin a rawn sawi condom chungchang te leh sex-ah kan nasa ang tih a hlauh chungchang te leh kan nasa tih a sawi chungchang te kha a ngaihnawm viau a. Amaherawh chu kum 17 he Total Prohibition kan hman tawhah khan tun dinhmun, tuna a rawn sawi ang chiah kha kan dinhmun tawn lai a ni a. Khalai kan hneh loh dan, kan puan nasat zia te, he kum 17 chhunga kan ram leh hnam in a tawrh nasat zia kha sawi thui vak tulin ka hre lo va, khalam kha chu an sawi nasa tawh a. Kan hneh loh kan buan a ni tih hi kan pawm hi a hun tawhin ka hria a.

Vawiinah hian “The Mizoram Liquor (Prohibition & Control) Bill, 2014 pass tuma helaia kan move in a entir chiang em em chu kum 17 chhung khan kan tha lo hle a ni tih kha chiang takin a langin ka hria a ni. Nichin khan an rawn sawi tawh a, sex hman nasat leh helaia zu kan control zawh loh avanga harsatna kan tawh zawng zawng kha nichin khan an sawi tawh a. Kan tlawmngai pawlte a bik takin MSAC te hi han en ta ila, hetiang AIDS, HIV te kum 17 Total Prohibition kan hman chhunga a nasat lutuk an hlauh avangin condom te pawh an duh

vang ni lovin, natna tha lo inkaichhawn an hlah lutuk avang zawkin an sem a, an hman tir ringawt mai a ni. Chutiang chu kan hun tawn tawh leh tawn mek kha a ni a. Chutiang chuan tuna “The Mizoram Liquor (Prohibition & Control) Bill, 2014 an rawn thehluh pawh hi Mizorama zu chhia tam lutuk tur venna tur te, Mizo thalaite kan chhe lutuk danna tur atana thahnemngai taka a rawn thehluh a ni tih a chiang a. Khati zawng khan kan ngaihtuahna hi kan hman hram hram a tulin ka hria. A chhunga Dan hrang hrang ka’n thlir khan a tha em em in ka hria a.

A rawn pu luttu Minister zahawmtak leh kan Officers-te an fakawm thlawtin ka hria a ni. He an rawn put luh han thlir a, han chhiar han chhiar hian zu hi tam se an ti a ni lova. Zu tam lutuk hi engtingge kan tih reh theih ang? Heti zawng hian i her hret ang. Heti zawng hian kan ram leh hnam hi a tha zawk ang tih nasa taka ngaihtuahna an hman avanga rawn pulut a ni tih a chiang khawp a ni. Kum 2010 khan ka hrawk lam nawm lohna avang hian Kolkata ah Doctor-in min refer a, ka zuk inentir a. Chutihlai chu Chapchar Kut an hman nen a in nang a. Mizo Welfare hruaitu ten an lo sawi chu, “Mizo za tam tak pungkhawm zingah khan ral atanga han thlir vang vang pawhin saw saw zu a rui a ni ang a tih tur hmel hmuh tur kan hmu miah lo”, an ti. Mizo tam tak kal khawm duhtawka khawlaia zu lei tur awm si ah khan khatianga kha zu tamna hmuna kan Mizo te chettlat dan a ni ve tawh a ni. Chuvangin, ka ngaihtuahna a ti thui khawp mai a.

Vawiinah hian kan rilru in zu permit a awm dawn han tih a, Bazar-a duh duh a lei a, han tih vak tur hi a ni lo a ni tih kan hre chung hian Mizo zingah hian a tamna hmunah pawh kan thalaite zingah zu in loh nachang hria, zu in a tha lo a ni tih hria hi an tam hle tawh niin ka hria. Chuvangin, keini khawtlangah pawh hian tuna kan Bill pawh hi han pass ta ila, zu in lo tura kan inzirtir tam hi a ngaiin ka hria. Zu in mi te a tha an in theih hram hramna tur dap a nih rual hian a pawimawh ber zawk chu kan thalai ten zu in tur hi tam tak an bulah awm thleh thluahin, lei mai theihin tam mahse in lo tura kan inzirtir a, kan infuih tawn zel a tulin ka hria a ni. Kan Member zahawmtak tak ten an han do deuh tak na-in kei chu kan hneh theih rinna lian tak mai hi ka nei a.

Pathian khawngaihna in kan vanneiin ka hria a. Kan Home Minister zahawmtak te tan lakna leh an beihna Pathianin mal a sawm ni te pawh hian ka hria a. Christmas ah hian halpuah hi kan hal nasa khawp mai a, kum reife hi kan hal tawh a ni. Khap rem theih a ni tawh lovang a, hei chu kan than hnan tlat tawh mai kan tih khawpin halpuah kan hal nasa kha a ni a. Tunah chuan, kan Home Minister zahawmtak ten theihtawp an han chhuah a, halpuah halte pawh a reh ta duak mai a ni. Chutiang deuh chiah chuan tuna “The Mizoram Liquor (Prohibition & Control) Bill, 2014 kan han tih tur pawh hi Home Minister ten, kan hotuten theihtawp an han chhuah ang a, a hlawhtling ang tih hi ka ring tlat a. Zu chhia in nasa lutuk avanga thihna tam tak

an deadboard ah zu in tih lang bawk si lo, natna dang sawi ni tlat bawk si ang chi te hi a lo reh tawhin ka ring a. Hei hi theihtawp kan chhuah a, tan kan lak chuan a hlawhtling ang tih hi ka ring tlat a ni. Pu Speaker, chuvangin, kan Excise Minister zahawmtak ten vawiina kan ram hun tawn mek siamthat ngai tak leh hun lo la kal tur thlir chung a Dan tha tak an rawn siam hi lawmawm ka ti.

Pu Speaker, hetiang Dan tha tak mai an rawn siam chhuak a an rawn theh lut hi ka support a, tlang hram se ka ti a ni. A bik takin kan party ni lo, tawng mawi lo ni lo se kan thian te zawng zawng pawh hian kan ram leh hnam thil anih tih hria a theih tawpa a hlawhlhtlin theihna tura thanhnemngai taka thawk turin ka ngen a ni. Ka lawm e.

Pu LALSAWTA, MINISTER : Pu Speaker, ka lawm e. Mahni ngaihndan dik tak mai han sawi ngam ve tura ka rawn ding thei hi ka lawm hle a ni. Mahni ngaihndan pawh sawi ngam lo hi mi dawizepah pawh dawihzep pawl tak an ni. Mahni ngaihndan kan sawi ve ang e. Pakhatna ah chuan zu atanga chhiah lak chungchang kha a Bill in financial memorandum a ken avang khan Finance Department ah kan lo en ve thin a, chutah chuan, “He in Memorandum of Agenda” hi tih a nih dawn chuan pawisa engzatnge in mamawh a, kan sorkar hian an tih thei ang em? tih lo zawhna turah khan anmahni khan, “Pawisa sen belh a hnekin a hmuh te pawh kan hmu ve tawh ang” tihna kha a ni a. Tiang hi a pawimawh khawp a 2008-a School 237 upgrade khan pawisa lam ngaihtuahna Financial Memorandum a awm miah loh avangin 2009 atanga vawiin thleng hian pawisa awm lovin sikul 237 upgrade-na hi kan la phur ngar ngar a. Kumtin a delh a rit tial tial a ni. Chu chuan Sorkar puitling zia a ken loh avangin vawiin ah hian harsatna kan tawka a ni.

Pu Speaker, zu hi a tha lo. Sawi mawi tum chi pawh a ni lo, zu hi a tha lo va, zu avanga tuar nu leh pa tam tak an awm a, fa sual tam tak harsatna nei hi Mizoramah chauh lo pawh khawvelah hian an tam khawp mai. Amarawhchu vawiina Mizoram Liquor Prohibition & Control Bill 2014 pass duh ten zu hi kan duh vang a ni lova keimah mimal pawh hi zu duh a buai ngai lo ka ni, chuvang chuan zu duh ho awm khawm mi 32 ang mai hian min ngaih mai ka hlau a. Ani awzawng lo tih kha kan sawi duh a chuvang chuan zu hi sawi mawi a ngai lo, Zu sawichhiat nan a Bible sawi sawi pawh hi a tul lo Bible lo pawh hian kan hre khawp mai.

Chuvang chuan Zu hi a tha lo. In loh theih vek a tha, mahsela kum 17 Total Prohibition kan han en khan kan Minister sawi angin, “Heti hi kan lo ni ta a, kawng dang zawn a ngai a ni,” a han tih hian kan zawnna turah hian mipui hian min lo tawiawm se, Opposition pawhin min lo tawiawm se. A lo tha lova, a lo hlawhtling lo anih pawhin he ram hi kan ta a lawm le! Midang puh mawh tur kan nei chuang hlei nem le! Kan siam tha leh mai ang chu, tih kha kan sawi hmasa duh a ni.

A pathumna ah chuan Sorkar kan tan a ngai dawn. He dan hi kan pass ngei turah ka ngai, kan tan hle pawh a ngai dawn a ni. Kan za vaiin kan tan a ngai a ni, sorkar chauh nilovin mipuite, NGO te kan tan hle a ngai dawn a ni. Hmanah motor accident a ka zuk hmuhah chuan pa pakhat hian a lo sawi a, “Driver kha a rui lutuk” a ti a, “Patling i ni a, ‘Chhuk rawh, nang lo hi kan zingah motor khalh thei kan awm, nangin thih i ngam ang hian kan la ngam ve lo, nupui fanau nei te kan ni’ i ti lawm ni?”ka ti a ni. Mipuite pawh hian kan ram tana tha lo na na na zurui, chung motor khalh te, dan lo anga thil ti te hi chu kan haw ngam tur a ni, action pawh hi kan la ngam tur a ni tih kha a sorkar chauh puh lovin kan tanrual a ngaih thu ka’n sawi ve duh a ni.

Tin, a palinaah chuan kan Mizo fa te hi kan thalai te, thalai lo te pawh an ni, zu awmna hmuna awm ve tlaka kan inbuatsaih hi a hun tawh. Nikum hmasa khan Guwahati-a ka kal in kan Liaison Officer chuan “Guwahati an rawn thlen hi chuan Officer te leh officer lo te pawh in chin tawk nei lovin zu an buaipui viau vek mai a. Officer pakhat chu meeting tura lo kal a ni a, a tuk zingah kan kaitho zo thlawt lova, a meeting tur chu a thulh thak a ni,” a ti. Chumi ka sawi nachhan chu sual hi chu khawvelah a awm reng dawn a ni, Pathian design a ni, sual zinga kan awm ve theihna tur atan chuan Kohhran pawh hian engtinng a tih kha? “Nang erawh chu” tih hi lehkha thawnah pawh kan hmu tam viau a, sual ti ve lo tura sual zing atanga sual ve lo tura awm hi Kohhran pawhin a mipuite a kaihhruai hram hramna, a beram te a kaihhruaina tur niin ka hria a. Chutiang chuan sual bo vekna tur ni lovin, sual awm loh avanga kan fa kum 5 jail a zu awm loh avanga a awm hi a lawmawm loh. Ka fapa in kum 5 zu a in lo, engngatinge jail ah a awm alawm, lawmna tur a awm tlat lo, zu awmna hmunah zu in miah lo an nih theihna te kha kan awm dan tur niin ka hre zawk a.

Tin, AIDS kan hlauh tirh khan, kum 1992 vel khan condom hi an sawi vak mai a, ka ngaihkan a ni lo khawp mai a, mahse, ka lo a hle a ni. Condom hi a lo ngai a ni. Kohhran leh nu leh pa te hian he sex hi ti lo rawh tih ngawt chuan a lo theih miah loh mai, a lo kal ve reng mai a lo ni a. Chuvang chuan. “in tih tho tho dawn chuan condom hi hmang mai teh”, tih hi a lo ngai a lo ni a. Chuvangin kan fa te Aizawla Matric, Class XII pass thar te phai lama an zir zawm dawn in, “Bangalore-ah i kal lovang, Delhi-ah i kal lovang, Washington-ah i kal lovang - zu a

awm tlat,” kan ti dawn nge? “Luxemberg-ah zu a awm, Delhi-ah zu a awm. Mahse ka fapa, ka fanu, zu hi in suh ang che aw” tih hi kan aw tur leh kan in thiar fihlimna tur niin ka hria a. Tin, dan hlawhtlin loh vanga phalrai tih kha an sawi a, kan member te khan. Ni e, tual kan in that tho si a, tual thah hi phal law law mai ang tihna tur khawpin tual hi kan in that tam bik lo a ni han ti teh ang.

Vawiina zu in min chim dan ang em em hi chu a ni lo deuh a ni. Tual thah chungchangah te, ruk ruk chungchangah te, phalrai law law ang, an ru reng tho si a tih hi kan tih lohna chhan chu ru lo tur hi kan la tam em a ni. Mizo thalai leh Mizo zingah hian tual that leh zu rui, rukru lo tur hi kan tam em avangin, India ramah pawh hetiang dan hi i paih mai ang tihna khawp turin chutiang hun chu kan la thleng lo a ni. Vawiinah hian a min ti maithei a, kan ram tana tha tur ni a kan hriat chu inthlan leh 2018 tlak ngamin, tlak duh vang erawh chu ni lovin, mipuite hi kan hruai ngam dawn lawm ni? He ram roreltute hian. Kan ram tana tha nia kan hriat, uluk taka kan zir hnu, hei hi kan ram tan tha in kan hriat, mipui lamin an lo ei loh tlat chuan a tlak pawh chu kan tla ngam mai dawn lawm ni?

Tin, Kohhran phen atanga in fuihpawrh hi ka duh miah lo kei chu, tupawh hi lo awm se Kohhran phen atanga in fuihpawrh tur hian kei pawh hi Kohhran mi ka ni ve a ni, kan vengah te chuan Kohhran rawngbawltu te min han ti ve, kan ni vek mai. Chuvangin, Pu Speaker, Kohhran bik awm anga tu te emaw hi lut thuk bik anga in ngaih lutuk pawh hi ka ngaihdan a ni lova. Kohhran mite tan, an beramte zingah ka tel a, duat takin ka thlarau chhandama a awm theih nan vawiin thleng hian min la enkawl a, ka dam ve chhung chuan min enkawl ka ring. Chuvangin vawiinah hian lemchan awm lovin a takin he ram rorelna hi i hmang teh ang u tih hi ka ngen a ni. Ka lawm e.

Pu LALRUATKIMA : Pu Speaker, kan bill sawiho hi ngun taka ka chhiar chhuak a, a bu te pawh ka Xerox a, lo zir ve tur awma ka ngaih te pawh ka pe a, mi tam takin feedback te pawh minrawn pe a ni, a lawmawm khawp mai a. Chutihlai erawh chuan kan dan neih sa MLTP Act han tih hi ... tur ang chi zawng chuan a lunglen thlak khawp mai a. Khami siamthat ni baw si lo bill thar hlak mai anrawn puang chhuak kha a fin te pawh hi an fing e aw, thil sual ti tur pawha thil tha ti tur te pawhin kan ngaihtuaha kan tang tlang hle a ni tih chu a lang a.

Kan hriat angin 5.10.1995 khan Pu Lalrinchhana kan MLA khan Private Bill, The Mizoram Prohibition of Liquor Bill, 1995 kha a pharh a House-ah a pharh thu kan hmua, an sawi vak a mahse an passed ta lo a ni. A hnu thla hnih khat lek December 24,1995 khan Official Bill Pu Hrangthanga Colney, khatih laia Excise Minister khan, The Mizoram Liquor Total

Prohibition Bill, 1995 tuna Act kan hman taka hi a pharh a. Official Bill a ni bawk a lungrual takin an pass a, Pu Lalrinchhana Private Bill kha chu opposition bill a nih tak vang nge ni an pass ve ta lova ni.

Kan hriat angin State Day ni 20 February, 1997 khan kan Member zahawm tak khatih laia Excise Minister Pu P.C Zoram Sangliana hian MLTP Act hman tur hian ram pumah District Council tel lovin a lo puang ta a. A boruak kha ka ngaihtuahin a lunglen thlak khawp mai a, khatih lai khan YMA ah te kan in zui a, a Secretary ka ni thin a, khatiang ang puang theia awm vannei ka tih thu te ka sawi a. Vawiin erawh hi chuan he Dan tha tak mai a hring tu in a enkawl ni si, chutihlaia a enkawl theih loh avanga Home a a va dah tak mai te hi ka chan rum rum a ni . Chuvang chuan, he Dan hi duh takin kan siam a, Amaherawh chu MLTP Act 1995 hi a hlawhtling lo a ni kan ti leh si a, chuti anih chuan Good Governance kan ti kan ti a rorelna tha kan neih theihna tur hian kan ti a. He Dan keng kawh zolo hian engtingge Financial crisis kan nei te hi kan enkawl theih ang aw tih te ka ngaituah? Pu Speaker.

Chuvang chuan Dan pakhat hi keng kawh turin a enkawltu Department thuam chak tumna kan nei chuang lova, tunah vote on account-in kan kal a he Bill hi Act-ah a rawn chang dawn a ni si a. Amaherawhchu pawisa financial memorandum te kan en a sum luh tur ringawt kan en, engzahnge vawiina mi hi lo pass ta ila zu avanga harsatna tawk enkawl na damdawi bill-ah kan hman ang. A enkawl nan law enforcement agency tih chak nan engzahnge kan hman ang? Ngaihtuah ngam pawh a ni lo a ni.

Chuvang chuan ngun taka ngaituahin rawn ti chung hian he kan Bill hi an Excise Minister zahawm takin hnuk let leh se ka duh tak zet zet a ni. Kan ram dinhmun te, kan khawtlang dinhmun te kan hria a, kan thlarau khawvel min enkawl turin Kohhran kan nei a. Chutihlai chuan tisa khawvel enkawl turin Sorkar kan nei, thlarau khawvel thih hnu khawvel hi a pawimawh tih hi kan hriat fo a tha a ni.

Chuvang chuan min enkawltu kan kohhran ten min ben harh tumin theihtawp kan chhuah a, mahse rawn kan tum bawk si lova. Chutihlai chuan Vanglaini June 2009-ah khan kan Chief Minister zahawm tak chuan Mizoram mipui tam ber duh dan leh Kohhrante nawrna leh anni hi ka zah avanga zu khapna dan hi kum 11 kal taah khan Chief Minister ka nih lain hmantan a ni a. Chuvangin anni rawn lo leh remtihna lo chuan kan Sorkar leh Party hian zu khapna dan hi tihdanglam kan tum lo tiin thuchhuah kan siam a ni.

Chutiang te chu kan ni a. Chuvang chuan Pu Speaker, vawiinah hian kan kalphungah hian khap burna dan kha neih tawh loh a Zu zawrhna dan neih kan tum ta a ni. Prohibition and Control Bill kan ti a, chumi phenah chuan zawrh tumna a awm tlat avang hian Zoram mipui a bik takin Nu leh Pa, Tlawmngai Pawl leh Kohhran hruaitute hi an mangang a, an rum a ni tih hi, vawiinah hian kan hriat a thain ka hria a.

Tin, chutihlai chuan thei pawh hi a hmin hmaa ei chuan a thur a ni. Chutiang chiah chuan he kan Dan pawh hi mipui kan la rual lo deuh a ni, tun dinhmunah hian hnuk let leh sela, en tha leh sela, kan hmin rual hi vuak dup chawp ngai lo hian kan nghak deuh thei lawm ni, tih kha hi ka duh dan a ni.

Tin, chutihlai chuan kan Synod Front zir chianna 2011 ah chuan 1990-1996 zu zawrh kan tih chhung, khap burna dan kan hman hma khan zu avangin mi 329 an thi a, Drug avangin mi 147 an thi bawk a. Tichuan khap burna dan kan hman 2004-2010 inkarah khan zu avangin mi 223 kan thi a, Drug avangin mi 93 kan boral bawk a ni. Chuvang chuan zu zawrh lai aain khuahkhirh hnuah hian thi an tlem zawk a ni tih hi kan hriat a tha awm mang e.

Tin, crime against body or life ah chuan Mizoram leh Gujarat ah zu kan khap a, chutihlai chuan health hian tihthat berna development ah te an nei a ni Gujarat a bik takin. Infant mortality rate phei chu a ti tha an ni a, keini pawh kan tha lo viau emaw kan tih lain cheng nuai 3000 chuang kan dawng a nih kha. Economic tehnaah pawh Gujarat te phei chu tha tak an ni. Tin, chumi piah lamah chuan heng economic zirna lam, a term ah chuan zu chhiah hi Sin-tax an ti a ni, sin=sual, chhiah an ti hial a ni. Chuvang chuan chutiangte it lam zawng lek lek khan thu kan member zahawm tak takte khan an sawi a. Amaherawhchu, zu avanga hatsatna nakin kum 10-a lo thleng tur te kan ngaihtuah chuan khanga kan sum sente kha a tam zawk daih a ni tih te hi kan ngaihtuah tlan thain ka hria a ni.

Tin, kan member zahawm tak takten an han sawi a, a ngaihnawm khawp mai a. Zu duh lo, zu khap burna dan hlip duh lote kha Talibanism lek lek khan kan puh a, hreawm ka ti angreng khawp mai a. Kha kha chu nilo sela, Kohhran leh NGO te zu duh lo an ni mai a, chuvang chuan Talibanism lam kha chu ni lo hret se thain ka hria a.

Tin, vawiinah hian sawi tur tam tak a awm ang a, zu hian kan mimal nun te, kan chhungkua te, kan khawtlang nunte min tihrehawm a ni. Thleng thlawkthei a siam a, nupa tam tak inthenna te, tlakranna te min thlen a ni. Chutiang ang te chu kan ni a, chhungkua tam tak zu

hian min tibuai a ni. Chutiang kan nih si chuan khap burna dan kan han hlip a, kan han zawrh meuh chuan zaninah pawh hian Pu Speaker, en chiah ila kan boruak a dang daih ang. Police patrolling pawh hi a tam zawk kan mamawh ka ring. Nizana Lockup-a awm aiin naktuk zana Lockup-a awm hi an tam zawk ngei ngei ka ring. Kum 20 kal taa matric result chhuak ang chiah kha kan boruak a nih ka ring. Chutiang ang chiah chu kan ni a, mi kan zauthau tlat a, a tha zawnga hman tum lova a chhe zawnga hman tumna rilru hi mipuiin lian tak kan nei fo thin a ni. Chuvang chuan he thil kan bill hi ngun taka ngaihtuah a, MLTP Act kan hman mek hi Law Enforcement Agency te tichak a, NGO te nen, Kohhranhote nen ngaihtuahna kan hman hi a tul a.

A tawp bera ka'n sawi duh chu Pu Speaker, kei chu a mimal takin midang ka sawi kep thei lo. Synod Kohhran inzirtirma atanga seilian ka ni. Chuvang chuan kan Kohhran lian ber Synod-in a duh lova, MLTP Act kha hman zel a duh a. Chutiang bawh chuan Bial aiawha lo kal ka ni a, Aizawl West-II bial chhunga Pastor Bial pakhat chuan, zu khap burna dan MLTP Act kan hman mek hi tha an ti a, hmang chhunzawm zel turin roreltute min ngen angin, Bial aiawh leh Bial mipuite aiawh ka nihna angin, he kan Dan tharrawn duan hi tun dinhmunah chuan Pass tha lo ka ti a, kan ram, kan hnam ngaihtuah chungin he Dan hi khawngaihtakin kan Minister khan hnuk kir sela, Dan kan hman mek hi tichakin Law enforcement agency te pawh thuan chakin ngaihtuahna thar hmangin, NGO te leh tlawmngai pawl hrang hrang kohhran te nen i bei tlang ang u, tiin kan han inngen a ni e.

SPEAKER : Sawi tur kan awm tawh loh chuan, Pu Joseph Lalhimpuia.

Pu JOSEPH LALHIMPUA : Pu Speaker, ka lawm e, hei hun laklawh deuh a ni a, kan pel thui lo ang chu maw?

Pu Speaker, hei vawiinah hian Zofate leh Zoram tana Bill pawimawh tak pakhat, a bik takin thalaite tan a ni lehzuala "Mizoram Liquor Prohibition & Control Bill, 2014" kan sawi mek a, kan Excise Minister zahawmtakin a Bill kalphung leh a bill chhunga a content te tlangpui a sawi tawh a, khalam pang kha chu ka sawi zui ve vak lo ang a, thil pali tawi te te han tarlan ve ka duh a, Pu Speaker, pakhatna ah chuan he Bill hi, nichina kan member zahawm tak tak ten an sawi ang khan, vawiin ah hian zu zawrh leh zawrh loh chungchang te, zu thatna infak mawi siak leh in sawisel siak te kha kan awm chhan leh he Bill in a ken hi niin ka hre lo a. He Bill hian zu avanga kan khawtlang leh kan ramin harsatna a tawh mek te, engtin nge tun aia kan insiam that theih ang, heng harsatna hi engtingge kan sutkian theih ang? Chumi atan chuan kan Dan neih lai MLTP Act hi heti hi kan dinhmun a ni a, chuvangin hei ai hian hei hi a tha zawk

ang a, tih ngaihdan, Mizoram khua leh tui, thalaite leh mipuite tana a siam avanga chutianga rawn pu lut chu a niin ka hria a. Chuvang chuan vawiin ah hian zu hi a tha ta emaw, vawiinah hian a tha ta lo viau emaw tia ngaihdan kan lo insual tir kha he Bill in a ken hi ni lo in ka hria a, chu chu ka han sawi hmasa duh a ni.

Kan Bill pu lut tu Minister zahawmtakin a sawi ang khan, MLTP Act, zu khap burna dan kan tiha kha kohhran te ngenna angin 1995 ah sorkarin a ruahman kha a ni a, chutah chuan sorkar bakah kohhran te, NGO hrang hrangin kan theihtawp kan chhuah a, chutichungin chhan hrang hrang avangin vawiin hi kan thleng ta a ni. Zirchiang mite an awm a, nichinah Bill pu lut tu in hun bul lama a sawi ang khan statistic atang te, tin, kan survey report atang te pawhin kan hria a, khalai kha chu sawi tam a ngai lovin ka hria a, kan thlen chin chu a hniam ang reng khawp mai.

Kan sawi lar ber Lengpui kawnga kan kal chuan a chiang vek mai a, hmun dang tam takah pawh a niin a rinawm a, zu khuahkhirhna dan, total prohibition kan hman avangin, zalen takin zu hralh leh zu in kha a lo remchang tawh lo a, chuvang chuan zu leh ruihhlo dang leh a kaihnhawihte kha underground lamah kan nawr bet ta a, kawngpui dungah te, ramhnuai leh tlangpangah te, lui kawrah te kan nawr bet ta a, tichuan sorkar te, tlawmngai pawl te leh kohhranin kan theihtawp kan chhuah a, chutiang anih avang chuan nichina member dangten an sawi tawh ang tho khan, theihpatawp kan chhuah chung pawhin, zu chhia a pung, tin a supply tu leh a siam kha kawrdungah te engemaw zat an la awm zel a ni. Chutiang chu kan dinhmun a ni a, chuvang chuan zu khuahkhirhna dan hi a hlawhtling tak tak dawn a nih chuan sorkar, tlawmngai pawl te leh kohhran bakah zu in te nena kan tan tlan hi a ngai a ni. Tunah hian Pathian khawngaihna zarah zu vangin harsatna ka nei lo in ka hria. Zu in te hian he total prohibition hi an support si loh chuan, a in tur an zawn renga chung zu in te tana sumdawnna leh thildang avanga zu siam tur an awm reng bawk si a, supply tu an awm reng bawk si chuan engtikahmah a hlawhtlinna hmel kan hmu dawn lo in ka hria a, kan thlen chin chu kan sawi tak ang khan a ni.

Tunah hian Pu Speaker, zu zuar sorkar ti ang lek lek a sawi te, pawn lamah, chanchinbuah te ka hre thin a, nichina kan Minister zahawmtakin a tarlanah khan a chiangin ka hria a, MLTP Act kan hman hnu ah hian hei BSF leh Assam rifles te leh khatiing pawl ho chi, pawl 12 hian tunah hian zu hralhna permit hi an nei reng a ni. Kum 17 chhung khan zu an hralh reng a ni. Tunah chuan doctor ten damlohna leh hriselna tur atana an pek bakah Ex-servicemen te nen mi 2376 te hian zu permit an nei reng a ni. Chuvang chuan vawiinah he Bill a luh avanga zu zuar sorkar han in tih hi chu a fuhin ka ring lo a, sorkar hmasa a ni emaw a hmasa leh a ni emaw, MLTP Act kan hman hnu kum 17 chhung hian zu zuar hi an awm reng a ni. Hei hi

vawiinah hian zu zuar sorkar ti anga sawilan te, chanchinbuah te ka hmuh avangin tawitein kan han tarlang a ni.

Tin, Pu Speaker, kan hre theuh va, Kristian state kan ni a. Kristian ram kan ni a, thurin inang ringtute kan ni. Chutih laiin Bible chang thenkhat chauh han tarlan a, han lak bing hi chu a fuh em aw tih ngaihdan ka nei deuh a. Hei kan Pathian thu chuan Pathian in a zawm tawh chu mihring in then suh se, a ti a, nupa chungchang a sawina a ni. Chutih mek laiin, Kohhran mite hian khawvel a la nih avangin kan famkim loh avangin kan zo lova. Pathian thuin “Pathian in a zawm tawh chu mihring in then suh se” a tih laiin Kohhran ah hian inthen theihna dan te, inneih that leh theihna dan te pawh kan siam tlat a ni. Chuvang chuan, Bible chang engemaw avanga Kristian sakhua nek deuh ran anga sorkar han chhuah hi chu a fuh lo in ka ring deuh a. Chulai chu tawitein kan sawi nawn ve leh duh a. Mihringin kan zawh chin kan thatpui chin anga kan kal hi a pawimawhin ka hria a, chu chu 1-naah kan sawi duh a ni Pu Chairman.

Pahnihnaah chuan hei Industry Department enkawl pui turin kan hotupain min ruat a, minister tanpuiin ka awm a. Kum 2006 khan Ministry of Law and Justice Legislative Department chuan dan thar a siam a. Hei hi President assent an lak tawh Parliament a pass hnuah a ni. Chu dan chu Food Safety and Standard Act, 2006 tih a ni a. Vawiinah hian Mizoram ah chuan Food processing lamah nasa takin hma lak an tum a, Central sorkar pawhin 5 year plan kum 5 chung atan Vaibelchhe 10 chuang minrawn pe a ni, theihpatawpin bul kan tan a, hma kan la baw a. He Food Act ah hian Central sorkar in President assent a pawm tawhah chuan zu kan tih hi alcoholic drinks kan tih hi food items ah kum 2006 ah khan dah a ni tlat a ni. Food processing lamah hma lak tak tak kan tum phei chuan department pawhin he dan hi zawm tura kan dil te pawh a la ngai dawn a. Chulai chu Industry enkawl puitu ka nihna zawnah kan department chan anih avangin kan han tarlang ve hrim hrim duh a. Alcoholic drinks tih kha Food Safety and Standard Acts, 2006 ah chuan food items chi 1-ah hman a ni a. Kan zawt chiang deuh a Pu Speaker, Aizawl ah te pawh hian bakery hi a lo tam khawp mai a, tha deuh deuh changkang deuh deuh hi. Birthday cake kan tihte, wedding cake kan tihah te phei chuan whisky hi an lo telh deuh vek hi a lo ni a, tih rimtuina turin wedding cake lian deuhah chuan bottle 3 te kan telh thin te an lo ti a. Chungte pawh chu a Department kaihnawihthe kha a lo ni a, kan hriat hrim hrim atan kan sawi duh a.

Tin, Pu Speaker, a tawpna bera kan sawiduh chu hei hi a ni. Nichinah khan kan Finance Minister zahawm tak khan financial memorandum a ngai a, bill putluh dawn chuan a ti a, a rawn tarlang tawh a. Sum leh pai chungchangah nichinah khan kan member zahawm tak khan zu chhiah avanga hausak ai chuan zu zuar lova retheih kan thlang zawk a ti a, a ropui khawpin ka hria a. Pathian thu zahawm tak a ni a. Tunah hian kan rorel tawh dan te hi in enlet

ila ka duh a awm a. Education Department enkawlpuitu ka ni a, kan Budget hi kan theihtawpin kan Minister ruahmanna in kan han zir ve a. 1986 state kan nih hnuah Education Department Budget kan han zir a. 1998 ah chuan khatih laia sorkar hotupa ber chuan plan Budget kan ngah dawn chuvangin, non-plan ami hlawh la te pawh hi kan hman sen dawn loh avangin tam tak plan ah hlawh la turin kan sengluh a ngai a ni a ti tlat mai a. Chumi hisap chuan hei 1986 atangin Demand for Grants kan neih zawng zawng kha kan Department chuan kan han zirchiang a. Kan zirtirtu tam tak a bikin non-government teacher ho hi non-plan ah hian hlawh tur min pe thin a ni. Tichuan, min pe chho char char a. Khatiang kha kan sorkar inkaihhruai dan 1998 ah a nih tak avang khan kum 2000 atang chuan non-plan a hlawh min pek ho kha min pe ta miah lo a ni. Zirtirtuten hlawh lak tur (SPEAKER : Dar 4 a ri tawh amaw, kan la chhonzawm ang chu House remtihna a ngai? Awle, kalzel rawh le) ka zo tep Pu Speaker. Tichuan zirtirtuten hlawh lak tur an neih tak lohah chuan kum 2000-2004 thleng kha non-plan (BE) a an dah loh kha RE ah non-government teacher ho hlawh kha an lo pe ta a. Chu chuan, tlemin kan inchhan deuh hlek a. Kum 2005 atang pheii chuan a hma zawnga non-plan a hlawh la thin ho kha pakhatmah non-plan ah hlawh lak tur pawisa an dah tawh lo a ni.

Vawiinah hian engvangin nge sum leh paiah kan pachhiat tih hi Pu Speaker, kan ram mipui hian hria se ka duh a ni. Department 1 chauh kan tarlang ania chu chu (SPEAKER : I hun pawh i hmang zo tawh e) Chuan Pu Speaker, nichina kan Finance Minister zahawm tak sawi ang khan 1998 ah MNF Party sorkar a lo ding a, kum 2000 kum atang chuan non-plan atanga hlawh la zirtirtu tamtak te hlawh non plan ah an dah tawh lova, plan ah pawisa dah belh a ni ta bawkw silova, Education in a tuar ta a ni, 2008 inthlan dawn tep ah school 337 hlan kai a ni leh a, chung zawng zawng chu plan ah hlawh lak tir an ni leh ta a.

*Speech not corrected

Pu LALRUATKIMA : Pu Speaker, kan bill nen a in concern lo hle mai a, kan sawi ve thei thova, a tawkw tawh mai lom ni? a hun a ral tawh tho bawka.

SPEAKER : Nia, han sawi zo law law teh se.

Pu JOSEPH LALHIMPUA : Pu Speaker, tumah ka tibuai lova nia, an sawi lai khan, vawiinah hian zirtirtu hlawh la lo an awm chungchangahte, sorkar lai kan dem vak vak te hi mipuite hian engvangin nge zirtirtu hlawh indaih lo kan lo neih chhan tihte hi vawiin ah hian hria se ka duh ani, Pu Speaker, 1998 sorkar ina non plan atanga hlawh la thin tamtak sorkar ina a dah bo tak hnu ah 2008 inthlan dawn tep ah school 337 an hlan kai leh khan

pawisa dah belh awm baww silo khan vawiiinah hian sorkar hian phurrit nasa tak kan taww a ni. Chung zawng zawng chu vawiiinah hian mipuiten an hriat chuan he kan Bill a hi sum leh pai leh nawmsakna duh vang a nilo a ni, tih erawh kha chu min hriat sak ka duh a. Vawiiinah hian sum leh pai indaihlohna tamtak kan nei, chung zingah chuan Department pakhat ah pawh khan engvangin nge kan harsat? tih te pawh hi Zoram mipuiin an hriat ka duha, kan han tarlang a ni.

Engpawh nisela, Pu Speaker, vawiiinah hian hei Bill tha tak mai kan neia, kan sawi tak ang khan vawiiinah hian zu hi a tha thar thut emaw a chhe thar thut emaw a nilo, Pathianin a hmakhawsang atanga a din a ni. Kan hotute sawi ang khan meichhem thiam hi chuan mahni pual in hnam pualin zu an nei deuh vek a ni, Amaherawhchu zu ina min tih chhiat lutuk hi chu vawiiin niah hian engtinge kan siamthat theih ang, tih ngaihtuah in MLTP a kan dinhmun kum 17 chhung kan enchhin tawha, chu ai chuan hei hian hma kan sawn thei ang a, tih ngaihtuah in Bill tha tak mai Excise Minister zahawm takin a rawn pu lut a, Mizoram Liquor (Prohibition & Control) Bill, 2014 a rawn put luh hi pass ngei ila, tiin ka rawn support a ni e. Ka lawm e.

*Speech not corrected

SPEAKER : Awle, Pu Vanlalzawma i lo sawm ang.

Pu VANLALZAWMA : Pu Speaker, ka lawm e. Vawiiinah kan ngaihtlak tawh angin Bill pawimawh deuh mai kan buaipui a, kan hriat angin he Bill hi House a luh hma pawhin khawlaiah chuan kan buaipui tawh a, vawiiinah a takin helaiah kan han sawi khawm ta a. Excise Minister zahawm tak kha an present vel dan ah khan a in puahchah tha in sawi te pawh a sawi ngaihnawm ka ti a. Chutih lai chuan he Bill chungchangah kher kher hi chuan mittel sai en te hi ka ngaihtuahna ah chuan a awm deuh a. Kan hmuh dan erawh chu a inang lo tlat a ni tih kha kan sawi duh a. Pu Speaker, i ding lama mite sawi zawng zawng kha a dik lo e, thil nih dan a nilo e, kan ti a ni hranpa chuang lova. Amaherawhchu, keini lam hmuh dan erawh chu tuna kan han sawi kan han sawi ang khan zu hi chu kan zuar dawn niin a lang tlat a ni, he bill behchhan hian, churang chuan zu zawrh phal na tur Bill ang khan a sawi mai loh theih lohva. Kan thian ten an rawn sawi tawha, keiin sawi vak ka tum lov a, an sawi tawhte sawi nawn kher ngaiin ka hre lova, mahse an sawi baka han tih lan ve kan duh thenkhat te kan sawi zawr zawr ang a.

Hei kan hre vek a, tuman kan hai lova, Mizote hi zu in thiam lo deuh mai hnam kan niin ka hre ve a, keimahni aia mawl fe a kan ngaih ho te ai pawh hian zu in hi kan thiamlo

ani lawm ni ka ti a. Nichinah pawh khan kan lo sawi mai mai a, midum zu in pawh hi kan tluk meuh lova ni. Midum te chu kan hria a, zu an in thin a, puja emaw an neih hian an rui thei angreng khawp mai a, an rui lawk lawk a, let tawp te pawhin an rui ni te pawhin a lang a; Amaherawhchu an puja a zova, a tukah hi chuan in leh pawh hi an tum tawh lova, bawngtuthlawh leh suahtur nen fai veng vawng hian an rawn tei chhuak leh nawlh nawlh zel a. An hna ngaiah an bung leh a, an puja, emaw dawn a nih chuan an han ti leh vak a, ka ngaihtuah chu heng pawh hi kan tluk lo emaw ni aw hi ka ti a. A chhan chu keini chu zu kan in hian Krismas leh Kumthar lawm nan kan tihte pawh hi January thla ah hian chhonzawm ngei ngei hi an tum a, February thla a kai a, ti chuan kumtluanin kan bei chho ta mai thin a, chuvang chuan zu hi a in thiamlo ber hnam chu kan ni mai awm mange te chu kan han ti a. Vairam ah te pawh hian an in lo pawh hian ka hre lova, an in viau chuan ka hria a, mahse hun leh hmun te hi an hrethiam khawp a. Chuvang chuan Mizo te hi zu buaipui em em hnam leh zu in thiamlo kan nih avang hian vawiina kan bill buaipui pawh hi buaipui awm pawh a nihna lai a awm a.

Nichina kan han sawi tawh ang khan, Pu Speaker, i ding lama mite leh i vei lama mite sawi dan kha chu a inang lo reng reng a, kan hmuhdan a inang lova, chuvang chuan keini thlirna lam atanga kan han sawi rik leh duh chu Financial Memorandumah te khan senso ngailo tur ang te khan alo lang a, Amaherawhchu kan hmang dawn a nih chuan he Bill hi total prohibition bill ai chuan a kenkawh hi a hautak dawn lawm ni aw, ka ti a. Chuvang chuan pawisa tamtak sen belh a, mite pawh tamtak in dah belh a ngaih ka rin lai khan sen belh tur awmlo ang khan alo lang a, helaiah a zuar ang a, helaiah ruih an phal lo ang a, thil hi a awm belh teuh dawnin ka hria a. Chuvang chuan senso tur pawh awm mang bawk silo, tuna kan enforcement ngai hmanga kenkawh theih tur ani dawn emaw ni aw ka ti a, chuvang chuan khangte kha ennawn leh loh te phei chuan han pass mai chi emaw ni aw ka ti a.

Tin, a hmuh tur lam kan beisei kha alo lang a, crore 30 vel kumkhatah beisei a ni a. Chumi awmzia chu, nuaih 3000 vel hi chhiah hmuh belh tura inngai kan ni a, a lehlam zawng chuan a itawm tham khawp mai. Keini ang state te leh sum leh paia kan management pawh lianlo tan chuan. Heti zawng hian ka ngaihtuahna ah a awm a, kumkhat a nuaih 3000 chu ni 365 in han sem ta ila, nitin cheng 820000 vel kha chhiah ah alo lut tur alo ni ta a ni. A chhiah ringawt ah khan, chumi tur chuan zu kha hralh tam hi a ngai khawp hian ka ring a. Nikhata 8,20,000 lakna tur zu chu engzat nge ni ang aw ka ti a. Chuvangin han ngaihtuah khan zu hi chu a tam hle ang a, a rui pawh kan pung hle dawn a ni ang a, tih kha ngaihtuahna ah a lo lang a. Chuvang chuan enchian tul tak mai niin ka hria a.

Hei kan hrevek a, tunah chuan khawi laiah emaw kan veng zu zuar thang deuhvin a plastic jerigan bur 1 a rawn hawn hi chuan, sang hnih khat man a nih pawhin kan kawtlai hi a

hiar nak mai a ni a. Tiang a nikhat a a chhiah ringawt nuai 8 leh sing hnih kan lakna kan hralh hi chuan ram pum kan buai nuai nuai mai lawng maw aw! tih te ka ngaihtuahna ah hian a awm deuh va. Chuvang chuan he thil hi tha awm anga a lan ai hian ngaihtuah chian a min ti buaitu a nih theih dan a awm a. Kan hre vek a sawi ang khan, Mizo mipui zawng zawng hi kan tamlo ania, chuti zat zat thawhkhawm a chhiah pe khawm tur chuan kan vai ruih mai ang a tih te pawh kha thil hlauhawm tak ni te pawhin ka hria a.

Chutih lai chuan MLTP Act pawh kan tih hleihtheih loh laia hemi han tih tum kha a huphurhawm hle in ka ring a, nichina an sawi ang deuh khan. Tualthat an awm reng mai si a, mumal deuh hlek a tualthah theihna dan siam ang tih ang deuh te pawh khan a tehkhin theih lek lek em aw ka ti a. Chuvang chuan khati zawng khan ngaihtuahna kan han hmang a, kan hotute pawn in hriatthiam a tha in ka ring a.

Tin, hei kan sawi ang khan he Bill hi a rawn rik chhoh tih atang khan kan kohhran lam kan sakhaw hotute hian an helh riau mai a, kan hre vek a. Hei tunhnaiah pawh kan hriat ngailoh deuhvin tum 2 tawngtai rualna te pawh min han neihtir a ni a, kohhranhote. Tin, MKHC angte pawhin an duh loh zia te an rawn tilang a.

Tin, ka hre tawi deuh te pawh a ni thei a, a kohhran meuhvin poster tar meuh a, sorkar policy, sorkar bill do zawng a han tih te hi ngaihtuah deuh chu a ngai mang e aw. Chuvang chuan he Bill hi ennawn leh a nih loh pawn tuna tan chuan pass lo rih mai ila tih kha Pu Speaker, a dik lo maw? A chhan chu he Bill avang hian kan ti daih ang e, thil kan duh loh deuhvah te pawh hian kan in hnuklut thei em aw ? ka ti a. Kohhran Vrs. Sorkar tih ang deuh te pawh khan. Kohhran Vrs. Rulling Party tih ang deuh khan an ti ang a, hemi avang hian inepna thalo zawkte pawh kha a kal chho thei ang em tih te pawh kha ngaihtuah tham awm in ka hria a. A chhan chu kan Synod hruaitute phei kha chuan hmanni lawkah kan hria a, Press Conference te hial an kova. Khang a an thusawite kan hre vek a, ka sawi kher a ngai lova. Chung avang chuan he thil hi a move tuin kan chulmam ai hian thil dang engemaw hi a lo hring tel daih ang tih te pawh hi a hlauhawm a. Chuvang chuan tih loh zawk a kha a tha rih mai awm mang e aw tih kha vawiin ni ah kan dinpui ve duh a ni a. Nichin khan kan hotu tam tak ten an sawi tawh avang khan sawi nawn leh kher pawh tul ka ti lova. Chuvang chuan tlawmah la lo ila tihian tizui lo mai ila tih ang deuh khan a kalpui theih lawm ni tiin kan ngen ve a ni. Ka lawm e.

SPEAKER : Aw le, Pu Zodintluanga a phar hmasa a. Aw, Pu John Rotluangliana, sorry ka tisual.

Pu JOHN ROTLUANGLIANA, MINISTER : Tawitea ni ka sawi ang Pu Speaker. The Mizoram Liquor Prohibition and Control Bill, 2014 hi an sawi tawh a, nichina ka hma a mite sawi ang khan Mizote tluk a zu buaipui leh zu vei hnam hi kan awm ka ring lova. Chuvang chuan kan buaipui em avang hian control a ngai zawk ani tih lai kha a ni. Chuvang chuan tunah hian kan Bill hi control na tur Bill zawk a ni a. Total Prohibition kan ti a, an sawi ang khan kum 17 lai kan lo kalpui tawh a. Hemi chhung hian nasa takin kan fail a, kan thalaite leh zu in mi tam takin zu chhia an in a, zu tlanchhia an in a, zu hmanhmawh. Chuvang chuan thihna tam tak chhungkaw tam takin an tuar a ni. Tun hma Total Prohibition te tih hma zu tha pangngai an in lai chuan tlema zu in mi deuh te pawh hi an dul a kiar a, an biangte a puar hman deuh va, a vanneih deuhte phei chu camping ah an piangthar a, rawngbawltu tha takah an la chhuak thei. Tunlai zu chhe in hi chu an dul pawh a kiar hman lo, an biang pawh a puar hman lo, an thi zung zung mai a. Kan zu chhiate hi control a ngaih avangin kan zu in miten zu tha zawkte an lo in theihna turin he dan hi siam a lo ngai ta a ni.

Tin, zu, zu tlanchhia kan ti a, a bik takin RV kan ti, Phunchawng kan ti, chungahte chuan keini Supply lam atang phei chuan kan mit alo mim em em a ni. Kan buhfai ramhnuaiah an phur liam zung zung mai a. Chungte chu a lo reh tawh ang a, chutah chuan zu tha zawk thalaiten an in ang a, Zu khap burna Dan mahse khap hneh chuan si loh control na tur atana ruahmanna kan hotuten an siam hi tha ka ti a. Tin, kan thianpan fiamthuina ti a, ‘total prohibition atang khan ka rui thei riau a ni’ a ti a. ‘engatinge?’ kan ti a, ‘a, ka hmuh chhun hian thahnem ka ngai em a ni’ a ti a. Chuvang chuan kan control a, hmuh tur a awm tho bawk si a, a in mite tan pawh khan thahnem ngaih a awl viau ni tur a ni.

Tuna kan control Bill atang chuan han en hian a lehlamah chuan kha ka hma ami khan ‘a huphurhawm hle mai’ a tih kha, a huphurhawm khawp mai. Kan tan ho a ngai a ni. Kan ram tana kan tan ho tak tak a ngai. A Danah khan hrem ngei ngei a ngai tlat mai a, a tidik lote kha, hremna hniam lam a awm avang khan. Dan dangah hi chuan kum 3 thleng lungin tantir theih a ni ang tihte kha chu kum 3 thleng a theih a, kum 3 tling lo pawh kha a tan theih tihna a ni. Hetah hi chuan thla khat tal lungin tan a ngai hrim hrim a, a tlem berah. Chuvang chuan a khuahkhirhna Dan hi a strict hle mai a. A lawmawm rual rual hian a huphurhawm hle mai a. Hei hi zu zawrh phalna Dan mai a ni lova, zu khuahkhirhna Dan a nih avang hian fimkhar hle a ngai a. Tin, a bik takin nichina a sawi ang khan driver-te hi an kutah nunna tam tak a awm a, zu an in hian accident tam tak a thlen phah a. Kan Danah hian ka duh ai hian a la khirh lo mah mah a. Ram dangah chuan an party nikhuain emaw dinner an neih nikhua in emaw motor khalhtu tur chuan an party na ah emaw an picnic na ah emaw dinner na ah emaw drinks an khawih miah lo a ni. Chutiang Dan chu siam a tha zawk hialin ka hria a. Zu in ve lo tam takte nunna an kutah hian a awm a ni. Driver-te phei hi chu maxicab an ni emaw taxi an ni emaw bus an ni emaw, an kutah mi tam tak nunna a awm a ni, anni hi public vehicle khalhtute an ni a, mi

chuanna. Chuvangin a khat tawka check-na hunte pawh hi siam ni sela, chumi a nih loh chuan zu hian zu in ve lote nunna tam tak a lak sak ang tih pawh a hlauhawm a ni.

Tin, Pu Speaker, zu hi kan buaipui em em a, kan hnam hian. A lehlam zawngah chuan ka ngaihtuahnaa awm chu a in loten a inte kan nekchep lutuk a ni lo maw? tih laite pawh ka ngaihtuah. Chuvang chuan a in duhte pawh hian in ve sela, a inte pawh hian a in lote tan hnawksak bik lo sela, a in lote pawh a inte tan hnawksak bik lo sela, chutiang chuan lungrual takin awm tlang ila a tha mai lo maw? Tuten emaw kan in loh avanga tute emaw in hnawk intih em em hi a fel loin ka hria a, kan unaute, kan mizopuite hian an in ve duh rau rau a nih chuan zu tha zawkte in ve sela tih hi a thain ka hria a.

Tin, hei, a financial implication an tih, a sum leh pai chungchangah hi chuan kei chu kan ngaihtuahna ah pawh khan a awmin ka hre lova. A chhiah lak tam leh lak tam loh lam a ni lo. Kan society-in vawiinah hian a mamawh a circumstance-in min compelled tawh zawk a ni. Zu kan control hi. Kan phal lo bur ni lovin a in dante kan control a, a in zah turte kan control a, kan kalpui hi a hun ve tawh a ni. A lehlamah chuan, entirnan, Guwahati-ahte, Kolkata-ah te, Delhi- ah te, Hyderabad-ah te zu an zuar nasa mai. Mahse chumi hmunah chuan kan fate school luhtir tumin kan bei tang tang a. ‘Zu a tam em mai, khuti lamah chuan i luhtir lo ang u’ kan ti reng reng lo. Kar hmasa khan Delhi-ah ka zu kal a. Khutah Admission list a chhuak a, 1st list a chhuak, 2nd list a chhuak an ti a, la tel ve lo kan Mizo unaute pawhin ‘kan hmuh hma chu haw kan tum lo’ an ti a, vawiinah te pawh an fate dah turin an la nghak thup a ni. Khutah khuan zu an khuahkhirh lova, duh duha inna tur a awm tho, mahse, kan fate zir sanna leh thiamna sang zawk duhin khu lamah khuan kan la tir liam a, ‘zu a tam em mai, khulamah chuan i awmtir lo ang u’ kan ti chuang lo a ni. Chuvang chuan engah nge hetih laiah ‘a Dan mumal takte nen i zuar ve ang u’ kan tih hi kan helh em em le tih hi ka ngaihtuahna a ni.

Pu Speaker, vawiina kan Minister zahawm takin he “The Mizoram Liquor (Prohibition & Control) Bill, 2014 a rawn chhiar chhuah a, a Dan awm zawng zawngte a rawn tih hi tha ka ti a, kan ram hian a mamawh tawh ka ti a. He bill hi ka rawn support ve a ni e. Ka lawm e.

SPEAKER : Pu John Siamkunga kha a phar hmasa a.

Pu JOHN SIAMKUNGA : Pu Speaker ka lawm e. Vawiina kan Bill The Mizoram Liquor (Prohibition & Control) Bill, 2014 chungchang kan sawi hi a

pawimawh tak zetin ka hria a. Zu hi hnam zawng zawngin kan buaipui a, hnam zawng zawng chanchin kan chhiar chuan an hnam nunah hian a bet deuh vek a ni. Chutianging Mizo hnam nunah pawh hian a lo bet thin a. Lalin ro a relna ah te, a khawnbawl upa te nena ro an relna ah te, engemaw thil pawimawh khuangchawina ah te an hmang tangkai em em a. Tin, pasaltha feh chhuak lo haw ni ten an hmang tangkai a. Tin, pasaltha leh tlawmngai, mite aia chungchuang bik chawimawi nan Nopui te pawh an lo dawm tir thin a ni. Chutianging chu a ni a, khawvel hnam zawng zawng chanchin chhiar ila zu-a buai lo hi an awm lova. Chuvanging, khuarel thil a ni a. Nature siam chhuah hi eng ang pawh hian do ila kan do hneh ngai lo a ni. Chumi anih avang chuan khawvel ram changkang zawk leh hmundangah hi chuan khuarel thil hi chu a do-a do lovin a control zawngin an bei thin a. Chuvanging, lui tui pawh nasa taka a lo len thin chuan khuarel thil a ni a, nature thil siam chhuah a nih si chuan kha lui khan thil a tih chhiat vak vak lohna turin a control na turin tuikuang an lo siam danglam thin a ni tih kan hriat a pawimawh hle in ka hria a.

Chuti chung chuan hman deuh khan Zoram mipuiin Zu hi total prohibition a ngai a ni tiin nawrna nasa tak a awm thin a. Sorkarin nu leh pa mit anga thlirin a khua leh tuite a hmangaih em em si a. Chumi anih avang chuan khua leh tui thatna tur leh damna tur a ni dah lawm maw tiin MLTP Act hi 1995 khan pass a lo ni ta a. Tichuan ni 20 February, 1997 atanging hman tan a lo ni ta a.

Total Prohibition-ah hian keini Mizo Kristian te duh danah chuan um khat pawh hi lo lut lo sela, far khat pawh hi Mizoramah lo lut lo sela, a ram mite pawh hian pakhat mah hi siamlo ila kan duh a ni. A total-a tihbo vek kan duh. Chutianging ni tur chuan sorkar-in nasa takin a bei a, NGO in kan bei a, Kohhran pawhin a bei a ni. Amaherawhchu, khuarel thil, nature thil hi do hneh theih a nih siloh avanging nasa taka kan beih pawhin tihngaihna a awm ta lo. Arawn pung chho zel a, min chim sang zel a, zu mai nilovin drugs arawn ti tam ta a. Vawiih hian kan hriat em em, i veilama mite pawhin an hriat, Amaherawhchu, mipui hmaa thangthat lak an duh avanga an sawi duh reng reng loh a ni. Tunah hian Mizoram-a Zu lo lut hi a tam em em a ni. Nizanah pawh khan engzat nge an man? Um 1000, cheng nuai sawm chuang man a ni. An man chin ringawt pawh hi nuai sawm tel ni lovin nuai za tel a ni tawhin ka ring, a tam a ni. Kan man loh hi eng zat nge awm ang? Chutianging a nih avang chuan vawiih hian harsatna kan lo tawk ta a, he kan Total Prohibition avang hian kan thalai tam tak, ruihhlo lamah an tlan a, kan invui liam zawih zawih a. Nu leh pa tam takin an fate an thlah liam a ni.

Chu chang pawh a la ni lo, thlanmual hrang hrangah han kal teh u, kum 30 hnuai lam thlan in hmu hnem hle ang. A sawia sawi ni mai lo hian hmuh tur a tam a ni. Chumi chuan engnge a hrin chhuah? Kan thalaite kal zel dan tur han ngaihtuah hian lung a chhia a ni. Kan thalaite hmakhua kan thlir hian a pawl tak zet. Nakin lawka kan ram hruaitu turte an ni si. Chuvangin, sorkar chuan a khua leh tuite a hmangaih a, hmangaihna mitin a han en thin a, E, hetiang reng a Zoram hi kan kal chuan a tha dawn lo. Chuvangin, zu khapna dan kan lo siam kum 17 lai kan lo kalpui tawh hi ennawn a ngai a ni, heti lo deuh hian i her chhin ang aw, in ti chhin phawt teh ang. Chuti chuan Zu hi chhe deuh deuh emaw a ruk a lo lut nghek nghek emaw ai chuan huai takin a langin zuar tawh ila, chu chu control ila. Tin, mipui in kan huphurh em em khawlaia zuruih kan phal lo ang a, public hmun Bus ah te pawh zuruiin min lo nek theih lohna turin mimal pawhin, NGO ang pawhin kan hekin kan man tir thei a ni.

Vawiinah mobile phone a tam tawh, zurui kan duh loh te chu Police/Excise kan man tir thei. Motor khalh chungchang ah te pawh vawiina kan Dan en hian kan control thei a ni, zurui/nam chung a n khalh chuan kan man nghal thei, thiam loh chang sa an ni. Chuvangin ram changkang chungchang kan hotu hrang hrang ten an sawi tawh atang khan zu nam in kan khalh ngam dawn bik lo; enchhin hmaa a chhe lam hlir a thil kan ngaih tuah a nih chuan a dik lovang. Vawiinah a chhe lam zawng hlir a thil kan thlir hi kan tih tur a ni em? Mizo mipui/Zoram sorkar kan ring ngam tur a ni. Hnam hnuai hnung zawk zu in thiam lo tal buah buah te ang in engatinge kan in ngaih tlat. Vawiinah hian Mizo te kan changkang tawh, tun hunah hian engatinge rinhlelhna nen kan in thlir tlat.

Tin, he khawvel a cheng kan nih chung chuan sual a awm dawn, heng sual hi wavi leh khat ah thiar sawn mai theih a ni lo, setana atanga lo kal kan zing a sual nghet tak awm hi kan paih bo thei lo, keimahni zawk kan in sum a ngai tlat. Zu hi ruih dan ka hre lo, ka la in loh avangin, no khat pawh ka la tem lo, a awm zia ka hre lo, mahse vawiin ni a kan ram dinhmun leh nakin lawk a kan ram hruaitu tur thalai te nun kan thlir chuan thui zawk a kan ram din hmun kan thlir chuan i en chhin ang u aw..! ti a kan lungruah hi a tha zawkin ka hria, a lo thalo a nih chuan sut leh mai thei kan ni. Nichina kan han sawi he khawvelah hian sual hi wavi khatah kan thiar bo dawn lo, sual hmun a awm kan ni, kohhran mi te leh Kristian te chu nghet takin kan ding ang. Kan Pathian in min duh dan chu sual ral beihna karah pawh nghet taka ding tur kan ni zawk, sual in a chim theih lo va in vawng zawk tur kan ni. Eng ang sual ral pawh lo lian se Kristian te chu nghet tak a Lalpa tan a ding ngam tur kan ni. Sual kan tih kha hmun dang a va thiar bo tur kan ni reng reng lo; vawiina kan thusawi pawimawh tak hi kan hrethiam lo lui thin a, pawiin ka hria. Kristian ram kan nia, Kristian ram a zu zawrh hi a dik lo kan ti maw. Dik tak chuan sawrkar lam atang pawhin hrehawm kan ti.

Amaherawhchu kan ram hmakhua leh kan thalai te nakin lawk a ram hruai tu tur te hmakhua kan thlirin ni theiin kan hre si lova Chumi avang chuan hetiang zawng hian aw kan ti a ni. Tih tak em ah chuan khawvel a Kristian ram kan tih tam tak hi zu zuar an ni, a dik takin tawngtai hnam kan tih USA ngei pawh zu zuar an ni. 1945 a Isolation Policy a lak lai pawh khan a hnu lawkah eng tin nge a rawn tih chhuah a zuar tho. A dik tak in sawi ila, vawiinah Israel te, Pathian hnam thlan kan tih te tan a Guardian Angel a ni. 1948 May ni 14 Israel indan atang a vawiin thleng a a chanchin UNO in a rel theih lohna chhan khu USA khu a ni. Khu khu Kristian ram tho a ni asin! Khawvela responsible government awmchhun a ni. Zu an zuar tlat! A hman dan an thiam thung.

Chuvangin vawiinah hian Kristian ram pawh ni i la, khuahkhirhna hnuaiiah awmze neiin kan kalpui thei a ni tih a chiangin ka hria a. Chuchang lo pawh sawi tur tam tak a awm. Mahse hun tawite ah hian ka sawi seng lo ni se. Tichuan, vawiina kan Bill tha tak hi hun a tawi em avangin ka sawi senglo ni ta se la. Zoram nghahfak kan thalaite hmakhua thlirin he Dan tha tak hi ka rawn thlawp a. Kan pass ngei theihna turin he, “Mizoram Liquor (Prohibition and Control) Bill, 2014” hi ka rawn thlawp a ni tih ka sawi duh a ni. Ka lawm e.

SPEAKER : Pu C. Ngunlianchunga kha a phar hmasa a, i lo ko hmasa ang.

Pu C. NGUNLIANCHUNGA, MINISTER : Thusawina hun tha tak min pek avangin lawmthu ka sawi e. Kha kan hotuten kan hma lamah thu tha tak tak te an sawi tawh a, tlem han sawi ve ka duh a minutes 10 pawh ka hmang zo kher lovang.

Vawiinah hian he Bill sawihonaah hian tel ve thei a Pathian leh Bial mipuite leh kan hotute zarah he House zahawm taka ka awm ve hi lawmawm ka ti takzet zet a ni. Kha Member hrang hrangin a Bill chung thu te leh kaldan tur te ruling lam atang leh opposition lam atangin an sawi teuh tawh a. Han sawi ve ka duh chu – keini hi 6th Scheduled area a awm vawiina kan Dan pass tur pawhin a huam loh Autonomous District Council area atanga lo kal kan ni a.

Kum 17 zet Mizoram in total prohibition a lo hman tawh laia keini Autonomous Council-ah chuan kha Dan khan a huam ve loh ram a awm Autonomous Council chung a mite kan ni a. Hemi chungchang thuah hian Member tam tak atangin thusawi kan ngaithla tawh a, kum 17 chung kan kalna ah hian kan hlawhchham a ni, harsatna tam tak a awm a ni tiin leh kan Minister zahawm tak a Bill neitu pawhin he

MLTP Act, 1995 hi tihdanglam duh lo hle mah ila tihngaihna dang a awm silova hreh tak chungin tihdanglam a lo tul ta a ni ti hialin he House zahawm takah hian a sawi a. Tichuan, hei vawiinah a veilam pang a kan opposition lam atanga thusawi kan ngaihthlakna ah te he Bill vawiinnia The Mizoram Liquor Prohibition and Control Bill kan pass tura hi kan pass tak avanga Mizoramah hian zu hi lo luanglut ruih ruih tur leh hmun tin mai a awm tur anga ngaihna kan nei leh khati zawnga kan han sawi kha a dik lovin ka hria a.

Keini Autonomous District Council area a awm te saw sawi tak ang khan kum 17 kalta chhung khan a huam ve loh kan ni chungin hemi kawngah hian chuti takin total prohibition in min huam loh avangin zu hi a luang ruih ruih a, khawlaiah hian zurui hi an vak sup sup a, an invaw chuah chuah emaw sex lamah te an kal dul dul emaw a ni lo ani tih he House zahawm takah hian ka sawi duh a ni.

Kan Member zahawm tak pakhat khan he Dan hi kan hman anih chuan kan thalai te zingah sex lamah te in control theihna te a awm lovang a, HIV te hi tun aia a let in a hluar dawn a ni tih a han sawi te kha vawiinniah kan fa, kan naute ka hma a Member zahawm tak Supply Minister in a sawi ang khan phai ramah zu zalen taka an zawrhna hmunah kan fa, kan nau te kan dah a ni. Tunge khatah khan zu a zalen si a kan fa, kan nau te HIV te in vei ang tih avanga dah lo ngam tunge awm, kan dah vek a ni ti rawh u. Kan fate pawh a tu a te mah a in lo chuan an in chuang lo a ni, chuang chuan he Dan kan pass avanga he Zoram a zu avanga chhiatna a chhe thei ang ber duhthusam a chhe thei ang ber thleng mai tura an han sawi kha a fuh lovin ka hria a, kan hmuh dan leh kan thutna lamin a zir loh vang te nge ni Pu Speaker ka hre chiah lo. Chuang chuan kha kha a hrechiang tu kha Saiha bialtu tak phei kha chu kha amah ngei pawhin a hun kal tawh te a sawi a, tunhma in lo in thin anih thu te leh vawiina a in tawh loh thu te a sawi a, amahah chuan engngemaw difference a awm te pawh a ni thei e mahse a in lai huna zu tha a hmuh loh dan te leh harsatna awm te hre tu chu amah anih ka ring.

Vawiinah hian he sorkar Pu Lal Thanhawla kaihhruai sorkar hian kan party tan te, mimal tan te, he Mizoram Liquor Control Bill a hi pass a duh a nilo. He Zoramah hian kum 17 zet total prohibition kan lo kal pui tawhna ah zu tha aiin zu chhia in hmun a luah tam a, ka hma chiah a sawi Hnahthial bialtu Tuipui South bialtu zahawm takin a sawi ang khan T.V. a kan hmuh te chu nitin deuhthaw maiin zu an man ruih ruih reng a, sorkar lam atangin kan veng hleithei lo a ni tih kan Excise Minister in a sawi ang khan ven sen pawh a ni lo a ni. An zu man ho a hi zu tha tih

sawi tur a awm lo a ni. Ka hma sawi tuten an sawi tawh ang khan Silchar-a ₹ 150 man vel kha helai a lo thleng chho a ₹ 700-800 in lo theih loh in kan lei a, kan economics dinhmun pawh hian a tuar nasa a ni.

Chuvang chuan a in lo thei lo te tan helaiah hian zalen zawk leh zu tha zawk a in duhten an in theihna tur a tan tiin leh a man te pawh tlawm zawkin an hmuh theih nan tiin a buatsaih mai a ni a. Kan Group Leader-in a sawina ah khan kohhran hote nen pawh kan in ep ang tih te pawh a hlauhawm a ti a, he sawrkar hian kohhran nen ep a duh ka ring lo, a ep ngai bawk dawnin ka ring lo. Amaherawhchu, nu leh pa te chuan fate tan thil tha an ngaihtuah thin a, vawiinah kan fa , kan naute zu in lo thei lo, zu lova khawsa thei lo, zu chhia in mai te, zu tha an lo in theihna tur atan mahni dinhmun pawh eng anih pawn kan ni ange tiin he ruahmanna hi a kalpui niin ka hria.

Tichuan, Pu Speaker, he Bill kan buatsaih hi a lawmawm ka ti a, a chhung thuah te, zu pawlh dal, zu a thil han pawlh tih ang chi te ka hma a supply minister-in a sawi tak ang khan zu tha lo, a bik takin zu bilh kan han tih chi ah te hian sumdawnna atan tiin sum va hmuh theihna tur anih chuan zu chhe thei ang ber pawh a in tute hnena pek mai hreh lo khawpa he kristian ram za a za kan tih ramah si hian kan awm a ni. Zu bilhna hmuna kalho te chuan an sawi danin hetiang ang zu bilhna hmuna an va kal hian an zu tih takna atan khan thawmhnaw sukna atana an hman thawmhnaw bal tihrehna atana an hman thin Robin an tih ang chi te hi an pawlh nasa em em a ni. Chu chuan zu kha a lo ti tak ta a, chu zu chu mihringin an in khan an ke hnuai lam a ti zeng a, an thin a lian a, mi engemaw zat in an thihpui a ni. Kan Supply Minister-in a sawi ang khan hman lai chuan an hmai a puam a, chutiang khatiang a ti a, tunah chuan an puam hman tawh lo a tih kha a dik a ni.

Chu chu engvang nge? Kan tih chuan zu chhia an in nasat lutuk vang a ni. Chu zu chhe lak atang chuan kan thalaite leh zu in lo thei lo te he sawrkar Pu Lal Thanhawla kaihhruai zahawm tak hian a ram fate tan pa chan changin eng pawh huamin he ramah hian kan thalai zu in mite'n zu tha leh thianghlim an in theihna tur leh zu chhe lutuk ringawtin a min chim reng mai hi chu hnawhkian anih theih nan tiin control-na mumal tak leh enkawlna mumal tak hnuaiyah he dan hi a lo siam chhuak ta hi vawiinah hian a lawmawm ka ti.

Tin, kan repeat leh duh pakhat chu hei kan bialah hian a bik takin Tuichawng dung kan tih angah khuan Tuichawng dung velah te khuan hei kan unaute

hnamdang chakma kan tih te leh kawl kan han tih ang chi te hi an tam a, an ni ah kuan a han zalen em em a ni. Naupang tap thlem nan pawh hian kan han inkawm a naupang an tah chuan an zu te pawh an tulh mai thin a ni tet te atangin, tute mah kha an zu kha a zalen avangin an in vaw hlumin sawn an paiin Aids an veiin chhiatna kha an tawng chuang lo a ni. An in thiam em em a, kal ila atu mai te pawhin zu tui tling a ni emaw kawnglawng zu a ni emaw duichuani a ni emaw a duh tan chuan in tur a awm a ni. Mahse, a in lo mi chuan an in chuang lo a ni.

Vawiinah hian MLTP Act hi lo hlip pawh ni ila, a in lo chuan an in dawn chuang lo a ni tih hi vawiin ah zoram mipuiten kan hriat sa ni sela, hriat sa mah nisela kan ngaihndan leh kan chhut dan hi sawrkarin he Zoram tana thil tha leh hmakhua ngaia hmalak nan a tih hi a ni lo zawnga lo sawi tal tum a mipui ngaihndan kuai her tur zawnga kan sawi thin a hi a dik lovin ka hria a ni. Pu Speaker, he “The Mizoram Liquor (Prohibition & Control) Bill, 2014 hi he House-ah hian pass anih ngei theihna tur atan he house zahawm tak leh member zawng zawngte pawh ka sawm ve a ni ka support ve a ni e. Ka lawm e.

SPEAKER : Pu Lalrobiaka.

Pu LALROBIAKA : Pu Speaker, ka lawm e.

Hei vawiinah thil pawimawh tak mai Zoram tana thil thar lo thleng tur leh thil tha tak tak te lo lang thei turte kan han sawiho hi a lawmawm ka ti a te kan han sawi ho hi lawmawm ka ti a. A bik tak in kan sawi hmasak duh a chu, kan Excise Minister kan fak duh a. Hei kan hotute zar ah leh Pathian zar ah, Bial mipuite zar ah term hnih kan lo awm ve na a ni ta der mai a, a lawmawm ka ti a. Chutih rual chual Bill thehluh tawh kan ngaihtuah tawh zawng zawng ah hian he Bill aia felfai hi awm in ka la hre lova,. Hei kan enchiang a kan chhiar kan chhiar a, vawi nga aia tam mah hi ka chhiar chhuak in ka hria, a wording ah te, tin, a thiltum hrim hrim te han en hian a felfai em em a, kan Minister inpekna te, tin, a Committee hrang hrang, a Department te an hah tur zia te a lang chiang hle in ka hria a, a lawmawm ka ti a.

Tin, chutih rual chuan a chhung thu ah hian a tha in ka hria a, midang tam tak leh Chanchinbu ah te kan hmuh thin ang in he MLTP Act thlah zalen a, ti bo a, a duh duh anmahni duhna lam lam a kal a, buaina te siam ta sup sup tur a zuk

ngaihna leh inzirtirna awm a hi concept diklo tak a ni tih hi mipui te he House hmang hian kan hrilh duh a ni.

Tun a Bill kan chai mek a hi kan hriat ang in Mizoram Liquor Prohibition & Control Bill a ni a, total tih kha a awmlo mai chauh a ni tih kha kan hriat atan a tha in ka hria a tih kha kan sawi duh a ni. Tichuan, hei kan khawvel in a a ken leh kan ngaihtuahna a awm tur a chu he Mizoram hi amah chauh in a awm thei lova, India ram a State pakhat kan ni a ni tih te, khawvel a ram pakhat ani ve mai a ni tih te kan hriat fo a tha, khawvel kal dan dungzui a kan kal ve loh te, kan thalai ten an chak ve si lai ah te, kan thalai te dinhmun te pawh kan hriatthiam ve fo a ngai a ni tih hi kan hriat atan a tha in ka hria a.

Tin, hei information technology ah te kan sang chho em em a, khawvel a thil kal, thil awm mek te kan hre zel a. Nizan a inkhel chu a hmun ah kal lo mahila an inkhelh lai kan en a ni, chutiang chiah chuan kan nun zia te pawh hi kan in hria in kan in hmu vek a ni. Chumi a nih avang chuan kan thalai ten an duhna te, an chakna te, a pawng a taka kan ngaih theihloh mai ang chi te pawh hi tha lo tak a ni tih hi kan hriat a tan a tha in ka hria a.

Tin, chutih rual chuan mihringte hi sual a piang kan ni a, khap han tih hian khap a nih avang a tih chak ve ta hrim hrim mai te kan awm tlat a ni. Khap ni lo se Zu kan han tih te pawh hi in luh tir han tum ila tam tak in duh miah lo tur hian khap a nih tak avang a in ta mai te pawh hi tam tak a awm theih a ni. Chumi a nih vang chuan hetiang Dan kan han ngaihtuah mek a hi a lawmawm ka ti a, Chutih rual chuan kan Dan ah hian Chapter-8 Section 44 ah khan Illegal Possession in Small Quantity for Personal Consumption of any Intoxicating Liquor tih kha a awm a, hei hi kan Department te Rules siam hun ah khan rawn fimkhur deuh tur in kan chah duh a, kan ti sual mai ang tih te pawh kan hlau deuh a, helai ah hian in kan officer leh engemaw deuh te pawh a nihna ang tak, hemi spirit ni lova power exercise duh avang a han englo mai te pawh kha thil awm thei awm tak ah kan ngai deuh a chung te chu kan sawi duh a.

Tin, miscellenous Section 18-ah khan in hmu tho in ka ring a. Khalai ah khan Limitation of prosecution ah khan nichin khan an rawn sawichhuak tawh in ka hria a. Excise & Narcotics leh Police personel te exercise dan ah khan kan fimkhur a ngaih

ka ring a, chutih rual chuan Rules an siam hun ah hengte pawh hi zau taka thlirna neih a ngai dawn a ni tih kha kan sawi duh a ni.

Total Prohibition hi kan sawi thin angin ram hrang hrang ah te kan lo hmu tawh a, Amaherawh chu Prohibition hian nasatak in effect tha lo chhuah tam tak hi a lo nei tawh a. Chutih lai kar ah chuan hei vawiin ni ah kan ram ah Kohhran te nen a han engemaw lek lek te pawh kan hre thin a, amaherawh chu heng zawng zawng ah hian kan duh a in ang a, Amarawh chu kan panna kawng a in ang lo mai ani tih hi kan hriattlan a tha in ka hria a ni. India Independence dawn in Chandra Bose hote chuan Silai nen a India zalen tir an duh laiin Gandhi a chuan Non-Violence in he ram hi a soal chhuak a ni. Chutih rual chuan Chanchinbu lar tak DNA chanchinbu in a ziah hi Pu Speaker kan sawilang zawk ang a. Pu Gandhi a pianna State a nih avangin Gujarat ah Total Prohibition hi vawiin ni thleng in neih a ni a, chutih lai chuan DNA chanchinbu chuan Gandhi a hi lo piang nawn leh ta se Total Prohibition hi a hming a tih hi a duh hauh lovang, chuvang chuan a rang a rang in an ngaihtuah ang tih a rawn ziak a ni.

Tin, nuihza siamna ang reng deuh a hemi chanchinbu bawh in a rawn ziahna ah chuan Farm House ah Picnic an nei a Gujarat ram ah hian chu picnic na ah chuan Police pakhat in an zai tawp ta tlat mai kha engatinge tih an zawt a, a zai a khan zu a mamawh tlat mai a, an lam mek ani an ti a. Mahse Police pa chuan a chhanna chu ngati nge Thana-ah a tam teh lul nen in lokal mai loh, a ti hlauh a, an ti a ni. Chu chu kan sawichhuah duhna chhan a chu Total Prohibition awm naah hian harsatna tam tak a chhuak thin a ni, eirukna te thil chi hrang hrang. Khawvel a Total Prohibition chhut tu te leh mi fing kalkhawm in point 12 harsatna awm thei an sawi a chu hetiang hian an sawi a – 1. Dan ngaimawh lohna/zah lohna a lo thleng thin a ni. 2. Sakhuana a dal thin a ni. 3. Organized Crime nasa takin a pung thin a ni. 4. Dan kengkawhtu te zingah corruption a pung a, chumai ni lovin court system-ah corruption hemi avang hian a pung a ni.

Hemi chungchang pawh hi sawi tur tam tak a awm in a rinawm a ni court leh dan keng kawhtu chungchangah pawh. 5. Police te tan leh Court te tan an hna pangngai aia piah lam nasa takin burden a siam a. Chu chuan harsatna a siam ani an ti a. 6. Mipuite financially in, emotionally in, morally in harsatna a siam a. Tiang chuan hei kan ramah pawh kan harsatna tam tak mirethei te te ten an sum hmuh sa te man sang tak takin zu an leina avangin harsatna an nei a ni.

Tin, chhungkaw in vuak darhna te a thleng thin a ni. 7. Cause physical harm an ti a, chu chu kan hrethiam in ka ring a. Chhungkua in vuak darhna te, tin harsatna chi hrang hrang

te. 8. Habit panggai awm lo va in hun, nichina kan Supply Minister in a sawi kha zu an zuk hmuh tak avang khan in teuh duhna te, limit nei lo lek a awm duhna te a lo awm thin a ni. Chu chuan ram tan harsatna a thlen a, family tan harsatna a thlen a ni. Hemi piah lamah hian zuk leh hmuam in harsatna hei hian a thlen bawk a ni an ti ani. Tikhan thil tam tak an sawi a ni. Heng hi Research nei a an tar chhuah vek a ni a. Chuvang chuan keini State-ah pawh hian kan hotu ten huaisen taka he bill anrawn chhawpchuak hi a lawmawm ka ti a. Zoram tan vawin niah hian a hlawhtlinna hmu mai lo ila vawiin ni atanga hun reilo teah hian physically, financially hian hlawkna kan hmu ang tih hi ka ring a ni. Chuvang chuan hei hi a hun in min nawr thlukna avang zawk in zu hrim hrim a hi tute mahin kan duh lo Pathian pawh in a duh lo.

Chuvang chuan mipui mi mir hian a mamawhna avang zawk in he Bill a hi a lo lut a ni tih hi kan hriat tlan atan a tha in ka hria a. Chuvang chuan, “The Mizoram Liquor (Prohibition & Control) Bill” hi kan zavaiin lungrual takin pass turin karawn support a ni e, Pu Speaker, ka lawm e.

*Speech not corrected

SPEAKER : Pu P.C.Lalthanliana.

Pu P.C.LALTHANLIANA, MINISTER : Pu Speaker, ka lawm e. Ka phar thin a, min hmu lo a, ka sawi lo mai ang ka ti tawh a. Vawiin niah hian sawi tur tam tak awm mahsela member tam takin an sawi tawh a, ka ngaimawh deuh te han tarlan duh ka nei ve a. He bill he House a putluh a nihna turah leh sawiho a nihna turah te mimal ang te pawhin inleng te, a Kohhran ang pawh a Upa anni emaw thian tha te hemi chungchanga zawhna te tam tak kan lo tawng a. Chungte nen pawh chuan sawi ho dan tam tak kan nei a, chung ang te chu Vawiin niah hian helai House a member te mai ni lo, Zoram mipui pawh hian kan ngaihndan hemi chungchang a kan siam thiam theih nan ka mimal ngaihndan te pawh han sawi ve ka duh a.

Pu Speaker, vawiin ni-ah Zoram hi kan hriat angin, chhak leh thlang, chhim leh hmar-ah kan boundary ah sakhaw dang bia, ringlotu kan tih ten min hual vek a ni. Thlangah a ni emaw, hmar-ah a ni emaw, chhak-ah a ni emaw. Chutiang chu kan ni a. Chumi piah lamah nichina kan Member zahawmtak tak ten an sawi ang khan a ramri-ah zu dawr, a khua leh a chheh vela a hralhna tur pawh a market awm miah si lova ngaih kha zu dawr bottle sang tam tak zawrhna Zokhawthara kan kal chuan a awm a ni. A khua-ah mi cheng an tam hran lo. Khawiah nge an hralh kan hre lo. Mahse, vawiin ni thlengin an la awm thei a. Chutiang chuan Mizoram ram ri depah tam tak zawrh a ni a. Thlang lamah Tripura lamah kan kal pawhin kan hmu a ni. Engatinge vawiin ni thlenga khua chhe te te in tlem te si a khang ho kha an awm le. Khawng an

market tih hi ngaihtuah a ngai a. Leh lamah ringtu kan nih ang a sakhaw dang betu-te kan ram ri depa awm te theihtawp chhuaha tih en kan tum laiin, annin min rawn cho-na chu zu Mizoramah chuan tam takin an in duh a ni. Chuvangin, min rawn cho a ni berin ka hria a. Chutiang chu a tak taka kan dinhmun a ni.

Tichuan, vawiinah kan Excise Minister zahawmtak in Bill a rawn pu lut ta a. Nichina Bill a rawn put luha a han sawiah khan he Bill avang hian zu in mi te an lo hlim ngawt ang e. An tan Jail luh theihna kawngka tam zawk a awm a ni tih a rawn sawi tel a. Chuta ka rilru a lo lang chu Total Prohibition kum 17 zet kan lo hman tawh hnu ah vawiin ni-ah he Bill hi put luh a lo ni ta a, Mizo in thil kan tih a, kan hlawhchham chuan kan thufing neih chu ar talh dan chi khat chauh a awm lo tih a ni a. Vawiin ni-ah hian ar talh dan chi hnihna kan hmang dawn niin ka hria a. Ar talh dan chi hnih hi pakhat chu a tla lai um vak a, thah tum a ni. Mahse, tunah chuan ar talh dan chi hnihna ar chaw kan pe a, kan ko khawm a, kan tuk hlauh ang khan vawiin ni-a kan Excise Minister zahawmtak in kan Dan hman dan tur leh kan tih dan tur a han sawi a, zu in mi leh zu permit nei te pawh chep zawka an awmdan tur te pawh a han sawi khan ar talh dan chi hnihna, kan talh tum chu ar tho, vawiin ni-ah hian kan do leh kan tih rem tur chu zu tho niin, a chi hnihna in kan kal niin ka ngai a. Chuvangin, a fiah thawkhat viau in ka hria a. Vawiin ni-ah hian zu hi duh ta viau a, thlah zalenna lam niin a lang lo a ni.

Tin, Pu Speaker, kan dinhmun a zir te, kan hnathawh a zir te leh kan mawhphurhna a zirin kan thlir dan hi a danglam khawp mai tih hi a chiangin ka hria a. A hmingin kan chunghte Kohhran Upa an lo kal a, hemi chungchang hi min rawn zawtfiah ve a ni. Chuta ka sawi chu hei hi a ni – Vawiin ni-ah kan ramah sualna a nasa a, zu leh drugs-in nasa takin kan ram thalaite min tibuai a ni. Vawiin ni-ah kan ram hotu leh hruaitute Dan siamtu ten kan ram tana tha tur an ngaihtuahna-ah chuan vawiin ni kan thleng ta a ni a. Entirnan, Kohhran Chairman i ni a ka ti a. Kohhran angin khawtlang sualna nasa takte, zu avanga thalaite buaina tam tak awm hi engtingge kan tih ang tih in ngaihtuah a nih chuan, Crusade, Camping kan siam ang a, tunge Speaker ah kan chah ang tih hi ka pute-a Upa ngei bulah pawh in tihdan tur a ni tiin ka sawi a ni. Ama'rawh chu, YMA President ni ta la, YMA anga khawtlanga kan harsatna zu leh sa te leh zu zuar-ahte harsatna ngaihtuahin, chutah chuan Chairman han ni leh ta la. Chuta in ngaihtuah dan turah chuan, zana duty kan insiam ang a, chutiang an awm a nih chuan kan man ang a, na taka hrem tur, Police ah kan pe ang tih hi in rel dan tur a ni.

Chuvang chuan, vawiinah hian kan thutna a zirin, kei ngei pawh khawtlangah V/C ka nih laite, YMA a ka inhman lai chuanin khawtlangah zu nasa takin kan dova, in ensan te kan ti a. Theihtawpin kan check thin a ni. Mahse, TKP a hruaitu kan nih laiin kan rawngbawlina hmunah chuan khang hunah khan mi inah kalin counselling kan bei a ni. Chuvangin, kan nihna leh dinhmun a zirin kan tih tur hi chu a hrang a. Kan ngaihtuahna-te pawh hi a hrang a ni tih lai

hi kan inhriatthiam tawn tlan a pawimawh viau-in ka hria a. Chuvang chuan, vawiin ni-ah hian vawiin a Sorkar hian kan ram hun lo kal tawh kum 20 a thlir let a. Kan ram lo la kal leh zel tur kum 20 lo thleng tur te thlirin vawiinah chuan hetiangka kan kal hi a tha lawm ni. Ar talh dan chi khat chauh a awm lova, a chi hnih hian kal ila kan talh tum chu Ar tho tho a ni. Zu han zawrh a, a tam viau chuan kan in tam tih te an sawi a, ni e thil hi a mak khawp mai a, Khanghu hi ka duh khawp mai a a awm tirh te hi chuan a to khawp mai a a ₹ 50 tel te chu a te khawp mai a, Khanghu huan leh Mai an hmun ka siam ve a, kan thar tak tak mai chu ka ei tha peih miah lo a, thil hi a tam chuan kan ei tha peih lo emaw tih tur ania, thil hi a van hian kan chak mai mai, kan chak vang mai mai emaw ni chu tih pawh hi awl tak a ni. A tam avanga in tam tih te, heh viau tih lam hi chu ani mang lo.

Kan member zahawm tak Pu Rinawma khan in Lalthutthleng atang te pawh hianin in thawh chak tawh ang chu ati a, Pu Speaker hei hi ka sawi duh Kohhran in poster tar khuma he thil a kan hotu leh kan sorkar kalna ah hian Congress in a hamthatna leh a hlawkna tur ringawt hi ngaihtuah nisela chuan kan hotuten he bill hi House ah hian an pharh ka ring lo.

Vawiinah kan hotu hian party aiin ram an hmangaihna an dah hmasa a chu ram hmangaihna atanga ka thlir thiam theih tawk atanga kan thlir atangin he Bill hmang hian kan ramah zu kan ti rem anga, kan ti tlem thei zawk ang a tih ngaihtuahna hi a rawn hmang a ni. Chuvangin vawiina he Bill sorkarin an buatsaih hi ram tana thil tha duh vang a ni, vawiinah hian zu dawr a awm ang a, kan Bill kan hotu pa in a rawn sawi chapter 8 ah chuan zu permit nei lovin a lei thei miah lo, naktuk ah hian sorkarin zu dawr siam sela vawiin a permit nei 200 vel bak hian an lei thei lo, chu chuan vawiin niah hian Excise Office ah MNF sorkar atang tawh khan zu man hi nitin dar 1 atanga 4 thleng a lei theih a ni. Zu man sorkar Office atanga permit nei ten an lei theih reng leh vawiin ni a zu dawr a permit neiin an leih theih reng chu enge a danglamna le, Pu Speaker kei chu a danglam na ka hre miah lo, zu chhe deuh deuh lei ai chuan a tha lei kha a danglamna ka hre lo. Vawiinah hian Superintendent Excise Office ah hian dar 1 atanga dar 3/4 thleng zu permit nei chuan a lei theih, chu nen chuan a danglamna ka hre miah lo. A danglamna tur chu zu man kher leih loh, zo tawlh kher ni lo, zu tha awmze nei a zawrh permit nei in an lei dawn tih na mai a ni. chuvang chuan vawiin niah hian ngaihtuahna thui tak kan hman thiam a ngai a, kan thutna hmun a zir te, kan awmna hmun a zir ten kan ngaihtuahna pawh a danglam thei a ni. chuvang chuan sorkar a kan ram hun lokal zel dan tur thlir chungka he Dan siam tu ten a tha zawk tur a kan ngaih lai ah hian min dem lo sela chutiang hre thiam lo heta tanga a tha lo zawk ang a ti tu te pawh an awm anih pawhin an dem awm lova,

kan dem bawk lo. He Dan hi a tha lo anih chuan nakum kum lehah pawh sorkarin a let leh mai tur a ni a. Pu Speaker, chuvangin he Bill hi kan ram tan a thatpui turin ngun taka mimal ang leh party-in a thatna zawk ngaihtuah lo va ram tana tha zawk tura ngaihtuahna atanga Bill hi lo kal niin a lang a, chuvang chuan kan ramin kan thatpui ngei zawk pawh ka beisei a ni. Pu Speaker, ka lawm e.

*Speech not corrected

SPEAKER : Pu T. Sangkunga.

Pu T.SANGKUNGA : Pu Speaker, ka lawm e. Hei vawiinah zu chungchang kan kheuh ber a. A ngaihnam hle mai a, zu lo danglam zia pawh a langin ka hria a. Mak deuh chu zu duh lo kan kal khawm a vawinah hian, kan duh loh dan hi a inang lo a ni ringawt mai a, tumah hian zu hi a tha e, ti hi kan awm lova, ka lo ngaithla reng a. Ka tehkhin chu, hlo kan thlawh dawn a i vei lam ami ten chem kawm hi kan hmang rei zawkin a tha anga an ti a. Helam i dinglam a mi te chuan, kan hmang a hei kum 17, kan hlo thlawh hi a fai tak tak thei lo a, a tuthlawh hi i thlak leh mai tawh ang u, kan ti a ni ber mai a. Kan Excise Minister zahawm tak hian vawiin a sawi loh CLP a sawi mi convince em em awm chu, thalai te an thi hnem si a, Amaherawhchu kan thalaite he ti khawpa suattu leh sum harsatna thlentu kan Dan dinglaiin a tirem thei silo a, he kan Dan thar hi han ring chhin i la, a lo tha lo a nih te chuanin kum 4 kan la nei a lawm, kan thlak leh mai tur a lawm a ti a, kha kha ka sawi lang duh a.

A hman dan tur chu min convince em em a total prohibition kan ti a, kei ka vannei nge ka vanduai ka hre lo a, Dinthar zu tam vanglai tak khan kum 6 YMA President ka ni a. Chu lo pawh OB ka nih chhungin kan beih nasat vanglai kha a ni a, Central YMA ah kan awm veleh hian zu check pawl Total Prohibition implement hlim a ni leh a, a ti pawl ah hian ka tel thei ang reng a. Chuta ka tawn hriat ho ang reng tawi te chu, Dinthar a kan han tih vak khan a zawrh na kha a hla hret a, Rangvamual ah te an in sawna Tuikual nen kan han tih vak khan. Central YMA Rangvamual te kan zu thleng a, Tlawng leh Sairang ah a chhuk leh a, khumi lui kamah khuan in. Engineer pakhat in Pu Sangkung tunlai chu zu in check nasa a ni, Tlawng ah lawng kal na tur en in mau kuang in kan kal a tlawng dung chu zu zawrhna hlir a ni an ti a. Zu hi a danglam mang e aw ka ti a, Aizawl khawpui lai li Upper Bazar vel vanglai kha chuan khu lam Rangvamual ah a awm lo reng reng, kan thian ho te an tam a nia khutah khuan. Aizawl a kan check deuh kha chuan a chhuk thla a Rangvamual zuk tih deuh chuan a thlangah an chhuk thla leh mai a.

Kan Chief Secretary Kohhran Upa ni bawk chuan nalh deuh maiin min hrilh a, 'in tih thui poh leh a awmna in sawn a ni mai', min ti a. Chutiang thil danglam tak mai do a nih

avang chuan kan do dan a in ang lova, Amaherawhchu, kohhran ten hei an duh loh zia an rawn ti lang a, khami in fin khawm a kha kan duh loh dan leh control ni se kan tih dan a inang lo mai a ni a.

Tuna kan Minister zahawm takin a Bill a rawn put luh chuangchanga ka rilru a rawn awm a chu zu tha nge kan zawrh duh zu chhia tih chauh hi a ni a. He Dan hi kan hman loh chuan kum 17 kan tawn hriat tawh ah chuan zu chhia kan thalai te in tir vak vak a thih tir a ni mai. Hemi a enchhinna Dan kan sorkar hotuten an rawn ngaihtuah chhuak hi a huaisen thlak ka ti, heti khawpa poster tar a tawngtai khum chung pawh a tha zawk a an rin ah an nghet hi ropui tak niin ka hria a, chuta alo that loh leh kan siam tha leh mai tur a ni a, zu tha lo kan zawrh atanga lo lang lo chu – thu thiam pakhat in a rawn sawi ka hriat reng chu nu pakhat zu zuar hnenah hian i zu chu a tha maw? kan tia, tha lutuk a ti a, kan pa pawn hei hlir hi a in a ti a, a kum leh a an zu kal chuan khawng in pa an ti a, a ni chuan a thi tawh a lo ti e a ti , kha kha a nia kan tawn kha zu tha tak an pa pawn kha hlir a in kha a kum leh ah chuan a lo awm tawh reng reng lo mai a, khatiang khan reality hi i face chhin teh ang u. Kan hlo thlawhna chem kawm hi a hman tlak tawh si lova tuthlawh ah i kal leh teh ang u tih ang chiah a ni, duh in ang si hmanrua kan duh hi a in ang lo mai a ni. Helam veilam ami te rawn tan dan ka en khan a engthawl thlak in ka hria a, chuvangin tha an rawn thawh tak tak dawn, tha pui kan thawh ve ve tak tak dawn tih hi a lang reng niin ka hria a.

Duh inang awm khawm, Amaherawhchu, ka hma a kan Minister zahawm takin a rawn sawi dan ang khan thutna a in ang lova an ki a in ang lo mai mai a ni. Helamah hi chuan rawn thu se lang chuanin he tuthlawh hi tha an ti ve em em ang a. Chuvangin kan awmna in ang lo hian kan duh inang reng tho si hian kan tih duh dan a in ang lo mai mai a ni tih a langin ka hria a. Chuvangin kan nau te tha em em mai zu in mi ni si nakuma kan hmuh tawh loh mai tur ai chuan, sapramah te pawh kum 30 an in pawhin an sen tul mai a chuvangin i han ti ve chhin teh ang u a a lo tha zawk mial ang e kan pu te hian an ti mai a ni a. Pakhat that loh zia hi a lang tawh sia kum 17 chhungin, mawng a thep hman tawh lo te an tih kha, chuvangin kan hmanrua tur a hi kan han hmang chhin leh ang a, a lo tha lo a nih chuanin kum 4 kan la nei a, a aia danglam deuh hlek hi kan pu ten an rawn hmu chhuak leh ang a, kha kha a lo tha lo zel anih pheih chuan kawng dang tih loh tawp dan te kha an rawn siam leh mai dawn a ni. Hei hi an tum a ni tih an sawi atangin alang em em a, chuvangin tuna kan Dan hman a mi 2000 vel thubuai siam ringawt mai rem thei baw si lo, mi thi nasa baw si a kal ringawt mai hi zawng huaisen takin in ti teh ang an ti a.

Kan Minister zahawmtak, Excise changtu khan a tawngtai dan kha a sawi law law lova, ka fanuin min hrilh a. “A tawngtainaah chuan Lalpa he thil hi a tha lo a nih chuan kan chhungkua emaw, keimah atangin emaw putluh theih lohna rawn thlen ang che”, a ti tawp mai a

ni an ti a. Khatiang khawp khan Pathian hnenah Biakinah mi hriatin a thalo a nih chuan an ti a, a thaa an rina a thalo a nih chuan Pathian hnenah thinlung tak takin tawngtai khartuah ka tang a, ka tawngtai e a ti a. Hei hi thil thalo a nih chuan Pathian hnenah ti thei lo tawp turin a lo dil a, a tha a ni mai awm mang e aw, ka ti a. A pulut tha thui angreng riau mai a, chuvangin tuante pawh hi kan ram tan hian a tluang dawn a ni mai awm mang e. Kan thalaite nun tawi lutuk leh zu chhe in lutuk te hi a tha zawka thlakna tur a ni awm mang e.

Kan Home Minister meuh tawngtaina kha a chhiat bik hi ka ring lova, nangmah ngeiin kan MLA zahawmtak thian Pu Saikapthianga'n Hnar i sawi kha Hnar satliah a ni lo i tih kha ka hrereng a. Chuvangin kan Minister zahawmtak tawngtaina kha a ni tih hria ilangin, silai ven thuah I sawi kha ka hrereng a. Chuvangin khang tawngtainate kha chu Pathian pawh hian a ngaihtuah hi ka ring khawp mai a, kei chuan. Chuvangin vawiinnia kan tluan dan leh sawi awmloa ka ngaihte pawh khan an rawn phur dan te kan en leh helamin zu kha awm lo se an tih Dan te kan en khan a thlamuanthlak em em hian ka hria a, kan inlungual hle dawn e, he dan chungchangah hian. Kan ram thatna turte pawh a ni ang, tawngtaina lama khatiang a nih chuan tih te kha ka ngaihtuah a, thlamuanthlak ka ti a.

Hetiang hi enchhin a nih loh chuan kum 17 failed tawh, buh chi chhia chinga kum 17 mang thin sela, chin zel kha a atthlak a ni. Hei hi a tha zawk deuh ang a, han tiha enchhin kha a hun tlat. Chuvangin kan duh inang, kan hmanraw hman inanglo mai a ni a. Kan ram hian a thatpui ngei ringin he bill hi ka'n support hle phawt mai ang e. Pu Speaker, ka lawm e.

*Speech not corrected.

SPEAKER : Tunah B.D.Chakma i lo sawm ang.

Dr. B.D.CHAKMA, MINISTER : Pu Speaker, ka lawm e. Ka hnung lamah chuan sawi tur pawh an awm vak lovin ka hria a. Chuvangin tawitein- tunah hian khami Bill chungchangah tlem scientific deuhin sawi ka duh a. Syllabus 2 ka nei a, before MLTP Act, kum 5 chung report ka nei a. Alcohol related liver diseases kha prohibition hma khan 252 a ni a, prohibition hnuah 500. A awm zia chu MLTP Act neih hma aiin neih hnuah chuan a sang em a ni. Chutah alcoholic treated mental diseases hi kum 10 data kan nei a. Kum 1988-1996 hian prohibition hmian 482 a ni a, prohibition hnu kum 2002-2003, 2010-2011 khan 1686 a ni a. Chu chu almost four times increase a ni a. Nichina kan member zahawm tak Dr.Beichhua sawi danin alcohol vangin hetiang natna hi a awm a ni. Tunah pawh Doctor a nih angin engemaw opinion kha chu anglo deuhin ka'n hria, engemaw hepatitis B,C engkim AIDS lampang te. Kha

kha chu keima en danin due to alcohol chu a ni lovang. Hei chu due to less of knowledge about the self kan ti ang a. If we don't know about ourselves, alcohol te, dendrite te engmah tih tur an nei lo. Keimahnin kan khawih loh chuan dendrite te, zu te, anmahni mimalin a hman theih loh chi a ni a.

Chuvangin he Bill hi tuna kan Excise Minister zahawmtakin a pu lu hi chu lawmawm ka ti a, hei hi chu ngaihpaawimawh a ni a. Syllabus thar berah khan, kan zirchiang ang a, a thalo a nih chuan, kan pass lo a nih chuan thlak dan chu a awm tho ang a, chuvangin heta report dan ah hian syllabus hluiah kan fail a ni mai a, 1986 MLTP Act hman lai hi chu total fail a ni ang a. Chuvangin syllabus tharah khan, engemaw text book tharah khan kan zir ang a, chuan exam kan ti leh ang a, distinction ah pawh kan pass mai thei asin. Mizoram chu literacy ah India ramah hian top 5 ah kan awmin ka hria a, chuvangin lehkha zir leh lekhathiam te nen, The Mizoram Liquor (Prohibition and Control) Bill, 2014 kha chu keimahni ringawt niloin keimahni, opposition lam doctor leh engineer te pawh an awm a, keipawh technical mi angin, an mahni lam atangin, at least two of them kan beisei deuh ania, hemi bill chungchang hi support turin, ka lawm e, Pu Speaker.

SPEAKER : Pu Zothangliana.

Pu H. ZOTHANGLIANA : Pu Speaker, ka lawm e. Tawitein sawi ka tum. Ostrich sava, African sava an tih, sava lianpui thlawk theilo, tlanchak deuh chanchin hi ka rilruah a awm deuh a, ostrich hian hlauhawm a hmuha a hlauh chuan, a lu hi vaivutah a phum a, a hmu ta lo a, him ta riauah a inngai an ti a. Chungte pawh chu tunlai, ngaihdan hrang hrang vawrhthu thenkhatte ngaihdan nen hi chuan a inang deuh mang e aw, ka ti a. Kan ramah kan duh emaw duh lo emaw, zu hi a awm tho tho si a, chuvangin engtin nge mumal zawkin, awmze nei zawkin, finthlak zawkin kan inenkawl ang tih, kan hotuten ngaihtuahin, 'The Mizoram Liquor Prohibition & Control Bill' a an rawn pu lut a nih mek laia, total prohibition kan duh kher kher tih tlat lai hi chu, Shakespeare a'n, 'All the world's a stage' khawvel hi lemchanna khawvel a ni a, a chhunga chengte hi lemchanga te chu kan ni" a tih dikzia kan lantir zel mai mai hi a ni lawm ni aw, ka ti a ni. Eng ang pawhin awmlo rawh se, tiin sawi vak vak ila, tap chiam mah ila, a awm tho tho dawn a ni tih hi kan hrechiang vek chungin, chutianga total prohibition Dan chu khawvel anih chhung hian a hlawhtling dawn chuang lo a ni, tih hrereng chung a Total Prohibition Act kan ramin a thatpui, kan duh, la tih luih talh hi chu, sap ho in 'hypocrisy' an tih, moral standard nei sang tha tak ni awm taka lan tum talha, nei tak tak mang silo te nen pawh hian huang khatah a lum theih hial em? ka ti a ni. Chuvangin, awmlo theilo a chu, mumal zawka kan control a, kan enkawl theihna turin he Bill hi rawn put luh a ni a, a tha ka ti a, ka support a ni tih hi kan sawi duh a.

Nichin khan common lounge-ah, opposition group leader, member zahawm tak ni bawk Pu Vanlalzawma'n thil a sawia, ka rilruah a lut khawp mai a. Amah khan a rawn sawi tel dawn emaw ka ti a, mahse a Bill thlawpna lam hawi te pawh kha a an theih dawn avangin a sawi duh ta lo niin ka ring a. Tun thlenga kan kal tawh thin danah hi chuan, a zuartu hi kan buaipui em em a, a in te, vantlang tan, nu nau tana hnawksak te hi kan buaipui mang silo laia te hi a ni, enthat ngai a ti a, chu tak mai chu tuna kan Bill hian a rawn take-care tur, a rawn tihfel tura chu a ni. Zurui mi kawng kal lo chhah nawmna a, lo au mai mai te kan ngaithei ang reng phian a. Fun 1 zuar hmeithai kan ngaithei thak lova, kan um ruih ruih a, kan man a, kan timualpho hrep a. Hei hi kal dan phung tha a ni zel lovang tih hi ka ngaihda a ni a. Chutiang karah chuan kan Bill thar Dan thar, lo ni mai tura kan beisei mekah hi chuan a zuartute pawh control an ni ang a, a in tute pawh dan hnuaiah in turin control an ni tur te hi a lawmawm ka ti. A thatna lam sawi zel dawn ila sawi tur tam tak awm mahsela, ka duhtawk ang a. He bill hi ka thlawp a, pass ngei ka duh a ni tih ka han dinpui ve a ni e. Pu Speaker, ka lawm e.

SPEAKER : Tunah hian member zahawm tak 24-in in debate a, a ropuiin a lawmawm hle a ni. Chuan kan sawiho na chu kan duhtawk tawh mai ang a. Kan minister zahawm tak Pu R.Lalzirliana kan sawm ang a. Aw, House Leader-in atlipna sawi sela a tha tak ang.

Pu LAL THANHAWLA, CHIEF MINISTER : Pu Speaker, sawi pawh ka lo tum chiah lova, mahse, a hranpa liau liau a min koh takah chuan tawite lawmthu sawi pahin.

Pu Speaker, khawvelah hian thil tha kan duh veka tute pawhin, ringtu inti te phei chuan kan duh bik zual mai thei a. Mahse, a tha ber hi kan tlin thin lova. Chuvangin, a thalo nep deuh te, a chhe nep deuh te, kan zawng thin a ni. Hei, HIV (AIDS) kan donaah pawh hian hetia poster te han tar a, han do velah hian a sawt tehchiam lova. Chuvangin, a KS an tih lampang chi te leh hengho hnenah hian condom te kan pe a. Chu chu a tha ber anilo mai thei, mahselangin, a chhe nep deuh khang do nan khan kan ngaihtuah a ngai thin a. Chutiang chuan, Drugs addict inchiu lo theilo hnenah pawh khatianga thil chhia kha a inthlah zel lohna turin, a inkai zel lohna turin syringe tha te an mamawh a. Chuvangin, syringe tharte pek anni thin a. Kha kha chu a tha ber anilo tih kan hotute pawhin an hria, mahselangin thil thalo deuh do nan hmanraw zawn nan khan a chhe nep deuh a ngaihte hman a ngai thin a. Khatianga kan kal khan tunah hian hma nasa takin kan sawn a ni.

Chutiang chuan, zu hi a tha ti an awm lo mai thei a. A tha ti pawh anlo awm mial mai thei a. Pathian khawngaihna mipuite zarah kei hi he sorkar congress sorkarah hian vawi 5

ka tel ve tawh a. A sorkar ang chuan kan buaipui miah lova, mahse, a buaipui tute leh a tuartute an awm miao avangin a sorkar angin ngaihtuah a ngai a. Rampum leh hnampum leh khawtlang thatna tur atan chutiang chu a ni a. Hei, Pathian khawngaihna in zu hi a buaipui lo berte zinga mi ka niin ka inring a. Ka lawm khawp mai. Chuvangin, thui tak sawi dawn pawh ni ila, sawi thei turah ka inruat a, mahse chu lampang chu ka tum vak lova. Tunah hian diklo tak taka inpuh tumna te a awm a. Hei hi tha ka ti lova. Hetiang a kan sorkar ina The Mizoram Liquor (Prohibition & Control) Bill, 2014 a rawn ngaihtuah chhuah hian tute mah a khing lova, khin kan tum bawk lova. Tute mah a do lova, do a tum bawk lova. Thil tha a zawng mai a ni. Tin, Pathian khawngaihna in he kan sorkar apiangin tum 5 kan han sorkar ve tawh a ni a. Kan Kohhran hrang hrangte nen hian kan thawhhona hi a tha em em a. Mamawh kan theih ang chin chinah kan inphuhru tawn a chutiang chuan kan thawkho chho a ni.

Vawiin ah hian he Bill hian Kohhran pakhat mah pawh sawi a tum miah lo. Kohhran pakhat mah khin kan tum bawk lo, theih pheis chuan, kan lamtang nise kan duh a, chutiang chu a ni tih hi hria ilangin tunah mai pawh hian message ka hmu tam khawp maia, khatiang zawnga rawn fuih tum te leh min rawn ti te an tam a, mahse kha kha kan tum dan a ni miahlo, tin, Kohhran thuawih lo pawh kan nilova, sorkar anga kan tih tur kan hotuten an ngaihtuahna ah ram leh hnam tana tha tur nia an ngaiha kha huaisen takin an kal maia ni, nichina kan ngaihthlak tawh ang khan alo thalo anih chuan a sut leh theih maia, chuvangin huaisen takin kan enchhin dawn a ni.

Tin, hetiang angah hian Pathian hi a inrawlh vaklo emaw ni chu aw, ka ti, a chhan chu kha kan ngaihtla tawha, 1995 velah hei pass niin 1997 ah kan hmang tana, Kohhran te min phutna leh min nawrna in kan hotute pawhin tha an ti a, kan han hmang tana, 1997 atangin, 1998 inthlan ah chuan kan tla fai vek, a tana thil tha leh a lawm zawng tak ni seng chuan, khatiang a lawm zawng tak ti tute kha min chawisan awm tak a ni a, mahse min paih phiar nia mawle.

Hei tun tumah pawh hian tawngtai rual tur an tih zanah pawh khan in Pu Speaker, Armed Vengah hei kan hotupa Excise Minister zahawm tak hi Kohhran a lawi a ni a, Armed Veng North ah, chutah chuan tawngtairualna ah khan nichina kan ngaihthlak tawh ang khan a tawp khar tu, a ni hlah maia, chung a tawp a kharna ah chuan Pathian hnenah thinlung takin, aman ala sawi maithei a, mahse aman a sawi hreh takin, thinlung takin “ he Bill hi a thalo tak taka, he Bill hi I duhlo anih chuan put luh anih lohna turin ka chungah emaw ka chungte chungah emaw thil thalo thlen tir ang che” a ti ngat a ni. Mahse vanneihthlak takin thil thalo a thlen tir lova, vawiin ah tha takin a introduce thei a ni. Chutiang chu a ni a, chuvangin keimahni duhdan a ni emaw thil tenau leh engemaw a Pathian inrawlh tir zel kan tum te pawh hi ringtute tihdan tur a ni ang em tih te pawh hi kan ngaihtuah a ngaiin ka hria. Chutiang chu kan ngaihtuah

dan nise ka duh a, he Bill hian a tum chu Zu zawrh a nilo, kohhran mi tamtak, kohhran Upa te pawh an niang zu in lo theilo, a ruka in ngai, zu chhia lei ngai, heng ang te pawh hi engtingge kan chhan theih ang ? tih te pawh kha ngaihtuah tel a ngai a ni.

Chuvangin hemi Bill hian a kawh chu Kohhran mi vek an ni. A tak takah chuan, ringlo mi a va ngaihtuah vaklo, ram leilung fa, khatiang hnuai a awmte kha anni. Tin, hemi kan kalpui naah hian Mizo tena kan ngaihtuah nawn tura ka duha chu, zurui te ngaitheih loh hi kan zir a tha in ka hria. Zurui te hi kan ngaithei lutuk a, tu emaw zurui in ka pawl lo sawi selangin khing let ta ilangin, Pu Hawla chu zurui te mai mai a khinga, kan inti daih mai a ni. Hei hi a dikin ka hrelo kei chu, zurui te hian an concidence an hloh miah lo. An uang mai mai a ni, hlauhna hmunah chuan a ruilo ai aiin an hlau zawk daih. A takin ka hmu fo, chuvangin zurui chhawmdawl hnam, zurui ngaithei hnam nihloh hi kan tum a tha in ka hria a, zurui ngaitheilo hnam kan nih a tha, ringtu kan nih phei chuan zu hi athalo tih ngaihdan nei turin zurui te lek phei hi chu thalo tih lehzuala, ngaitheilo ber kan nih a ngai. Kan bawl emaw kan tih hi anmahni kan in bawl let tir zawk a ni.

Chuvangin heng ang te te hi kan zir chhoh a tulin ka hria a. Zurui ngaitheilo hnam ah he Bill hian min siam sela, chuta tang chuan he Bill hian kan khawtlang nun siamthatna kawng ah te leh chumi chuan kan Kohhran nun thlenga siamthatna kawngah hma min sawn tir tu anih ka ring a ni. Chuvangin Pu Speaker, he Bill hi ka support a, tha ka ti a, tin, ka sawi tak ang khan he Bill huaisen taka kan hotuten an kal pui avang hian Kohhran pakhat mah kan do lova, Kohhran pakhatmah kan khing bawkw lova, an mi tanpuina leh an mi tawngtaisakna kan dil zawk a ni. Tin, tawngtai rual te pawh hi kan han tia a tha, mahse lungruwal tak nilova thawngtai rual kha a sawt vak lo. Kan dil a inan a tul tlat Bibleah kan hmu a lawm. Kan duh a inan a tul tlat, chuvangin khawvel thil leh Pathian thil, thlarau lam thilte pawhhi a hun lovah chuan tihpawlh loh thiam te pawh hi a tulin ka hria a.

Chuvangin min koh takah chuan khang thil tawite te kha kan sawi duh a ni. Ka sawi nawn leh duh chu he Bill atang hian tute mah do kan tum lova, kohhran kan do lova kan khing bawkw lova. Pathian pawisawi kan hlau em em a, Pathian pawisawi loh nan tawngtai pawh kan tawngtai ve a. Chutiang chuan tun hi kan kalpui a ni a. Chuvangin kan tum ber zawk a chu he Bill atang hian, Act alo nih hnuah kan ram kan hnam kan khawtlang nun hi changkang takin khawvel hnam fing zawkte kalphung zir chho ve in, hnam changkang kan nihtheihna turin a ni. Zu buaipui em em hnam nihte pawh hi a zahthlak a, zu hi hnam tinin an nei a, chi tinin an nei a, hnam mawl ber Andaman-a Jarua an tih te pawhin an nei a ni. Chuvangin chuti a nih lai chuan a buaipuilo ber hnam, ringtu 100 ah 100 a inchhal ngam, Pathian hnam thlan kan nih avanga

buaipui miahlo engah a mah ngailo kan nih theihna tur atan he Bill hi tangkai zawkin ka ring a, chuvang chuan kan support a ni.

*Speech not corrected.

SPEAKER : Tunah chuan a Minister in-charge zahawm tak kan sawm ang a, kan sawihonate a khaikhawm ang a, a tlip ang a, pass rawn dil nghal mai rawh se.

Pu R. LALZIRLIANA, MINISTER : Pu Speaker ka lawm e. Member 25-in kan House Leader tiamin ngaihnawm takin kan sawiho tawh a. Debate in thiam hlawm ka ti a, a ngaihnawm ka ti tak zet a. Kan Opposition Member te a bikin mithiam tak tak vek an ni a. Chutiang a nih laia ka rindan chuan an mahni ngaihdan sawi ngam lova an awm erawh kha chu ka khawngaih khawp mai a. A hma khan an Party President in whip alo nei tawh si a, khami kalh a han kal kha chu an hreh avang a thuawih thei tak a khati zawng a rawn tang mai kha niin ka hria a. A chhan chu keini aiin hetiang hi a pawimawh zawk a ni tih an hria a, khawvel ram pawh an dai zau zawk a, an hre tam zawk a.

Chuvangin hetiang a zu buaipui reng hnam nih ai hi chuan engah mah ngailo hnam, excursion te an han kal a, zirtirtute, mi dang dangte an kal a, Bagha an thleng a, zu dawr a lo awm a en huai huai mai te kha thil zahthlak a ni a. Khang zawng zawng kan kal pelh theihna turin vawiin hi hun tha, hun rangkachak lo thleng a ni a. Eng pawh ni sela min do dan kha a zahawm ka ti a, a tawk viauvin ka hria a, an thusawi pawh kha a ngaihnawm ka ti hrim hrim a. An thusawi atang khan han react tur a awm tawh lova. Kan Member ten debate na lamah an rawn chhang thla fai vek tawhin ka hria a.

Hei zu hi, zu tax it vang hian vawiin a Ruling Party rorel lai awmkhawm te hian tumahin an la sawi ngaiin ka ring lova. Amaherawh chu lehkhah tarah te leh kan la sawi ngai reng reng loh zu tax hausak na atana beisei niawm tak a lehkhah tar te a awm avang te erawh chuan vawiin hian an rawn sawi chhuak ve mai niin ka hria a. Hemi it a ti hi kan ni lova, Zoram kalsiam a that zawkna atan a ti kan ni tih kha kan sawi nawn duh a. Tin, Excise te hi hetiang ang an nih tawh chuan an tlem a, hetiang a kan phal rai deuh chuan duty na tur a tam ang a, a indaih lo zual ang a, pawisa mamawhna Financial memorandum-ah a awm lo hi engti zia nge han tih te pawh kha thil awm tak a nih laiin ramhnuai leh hmun dang danga ramchhuaha zu vaia duty vak vak lo khan khaw chhungah zu ruite an vai zawk tawh ang a, a tul hunah chuan ramhnuaiyah te pawh phalna nei lova zu sate pawh an awm a nih chuan an kal tho turah kan ngai a. Tin, Section 78 na, 79 na leh 80 na MLA zahawm tak Pu Sangthuama rawn sawi Excise leh Police te

safeguard na hi a lutuk deuh a ni lo'm ni tih kha hetia han chhiar mai chuan a awm khawp mai, thil tihawm tak a ni. Ama'rawhchu, kan naute, kan officer-te huaisen taka Dan lek kawha hnathawk tura kan duh a nih si chuan khatiang Dan kha a ngai a. ND&PS Act-ah te leh MLTP Act tuna kan hman laiah te pawh hian kha Dan kha a awm vek a ni tih hria ilangin.

Tin, thil sual duty laia sorkar hnathawkten an lo ti a nih chuan kha Dan kha awm sek sek mah sela sorkar hnathawkte khuahkhirhna, Conduct Rules a awm vek a. Chuta tang chuan an chungchang ngaihtuah theih vek a ni tih erawh chu kan hriat a tha awm e. Tichuan, Pu Speaker, kan thusawi tawhte pawh kha han sawi nawn nual thain ka ring a, wind up na ah hian. MLTP Act hi kum 17 lai kan lo hmang ta a. Uluk taka a hlawhtlin leh tlin lohte, Study Group dinin Mizoram University a kan mithiam rualte pawhin an lo zirchiang bawk tawh a. NGO hrang hrangte ngaihdan pawh lak a ni bawk a. MLTP Act hi a hlawhtling lo tih chu an pawm dan tlangpui a ni vek a ni. Thil hlawhtling lo na na na chu hman reng a tul em ni tih ngaihdan lian em em a awm a. Zu khap hi a hlawhtlin loh mai bakah zu chhia avangin mi tam takin nunna an chan a. Hrisel lohna nasa tak thlenin zu khap hma aiin zu avanga damdawiin lut pawh an tam fe zawk tih hriat a ni a. Nichinah kan sawi zo tawh a. Lo hlawhtling se chuan kan ram leh khawtlang pawhin a nawm phah dawn tih a chiang reng a. Chu chu kan duhtusam pawh a ni, kan zavai hian.

Amaherawhchu, kan duhtusamte chu a lo thleng si lova, Pu Speaker. Ram leh hnam tan a that zawk beiseiin "The Mizoram Liquor (Prohibition & Control) Bill, 2014 hi buatsaih a ni a. A chhuanchhe zawnga ngaihdan lo siam ngawt pawh hi a dik lova, party thatna tur ringawt kan ngaihtuah thei lova. He Bill hi chutiang ang party thatna tur ringawt ngaihtuah ni ila kan pulut lovang .

Amaherawhchu, ram tana mawhphurhna kan kovah Pathian leh mipuiin an nghah si avangin kan ramin rahbi a kai ve theihna tur atan he Dan hi putlulh a ngai a ni kan ti zawk mai a ni. He Dan, "The Mizoram Liquor (Prohibition & Control) Bill, 2014-ah hian mimal leh pawl hote pawhin thil sual ti an man ve theihna pawh dah a ni a. Hei hi thil ropui tak niin ka hria a. Nichinah kan sawi tawh a, Dan lo anga thil tih hi a tha lova, a duty tur hnam hmangaih a, ram tana inpete, in volunteer Dan anga an chet theih kha duhna lian tak a lo awm tawh a ni. Dan reng reng hi hun lo kal tur thui tak thlir lawka siam a ni thin a. Tun ni hnih khat mai thlira siam a ni ngai lova, zu in, zu in hnua motor khalh, mi tana hnawksak te thlenga hrem theih tura siam a ni a. Phalna lova siam leh zawrhte phei chu na taka hrem theih tur an ni. Tin, a tul dan azira zu dawr hawn phalna te leh Distillery siam theihna turin ruahmanna siam a ni a. Hetiang ruahmanna telh a nih avang hian tun hunah hian kan ti vek ang. tihna a ni chuanglo. Tun hnaia

chanchinbumi pakhatin zu sak phalna/zawrh phalna pe mai tur awm ang a an sawite kha an mahni ngaihndan mai a ni tih ka sawi duh a.

Dan thar kan lo neih hian, zu hi zalen taka phalrai a ni dawn tihna a ni lova. A lei thei chin fel taka bithliah in, vantlang hmuna in leh zuruite, tunhma aia khuakhirh tum a ni zawk a. Thalai tam takin zu ai-a pawl zawk Drug an tihloh phah beisei a ni a. Drugs a inchiu thinte hnenah hriau thianghlim sem a ni a, hmeichhiat/mipatna khawlo taka hmang thin te hnenah condom sem a ni a. Hei hi an lo hrisel zawkna ngaihtuahpuina vang zawka tih a nih ang bawkin, zu-chhe in thinte hnenah zu tha zawk in tura duhsakna mai a ni a, mi zawng zawng in tura buatsaih a ni lo a ni.

Zu khapna dan ennawna ah kohhran kan rawn lovang tih thu ka sawi a. Hei hi kohhran pawisak loh vang ni lovin, kan pawisak em avang leh a thianghlimna humpui ka duh avang zawka he thu hi sawi ka ni a. Kan hre theuh a, zu hi sual angah kan ngaih tlat avangin kohhran ang chuan thlah-dul hi a remlo a ni. Inrawn khawm pawh ni ila kan dinna chu a ngai reng tho dawn tih a lan reng avang leh, chuti chung a sorkarin a kaltlang pui si chuan, kohhran duhdan palzuta sorkar kal kan an dawn avangin he dan ennawna, zu khuakhirhna dan siam mai hi him zawka kan hriat avanga khatiang thu sawi kha ka ni a. Inpawisakloh vang a ni hauh lova, khami avanga rilru na an lo awm palh a nih chuan vawiinah hian ngaihdan ka dil a ni.

Kan ram hi zu in a tihbuai loh State nih kan duh avangin MLTP Act hmangin tih rem kan tum a kan hlawhchham a. Chu dan chu ennawn a 'The Mizoram Liquor Prohibition & Control Bill, 2014 a thlak kan tumna hi mi thenkhatin zu thlah zalen kan tumna-ah an ngai hi sorkar ngaihndan chu a ni lo, a tum dan pawh a ni lo. Kan tirem theilo hi thununna hnuaia dah kan tum mai a ni zawk a. Chutiang tur chuan Dan tha tak kan duang a, zu chu zawrh a lo nih pawhin duh zat zat mi pakhatin a lei thei dawn lova, entir nan sipai bang permit nei tam tak an awm a, khang te khan Ration Card angin thlakhatah quota te an nei a, chutiang chuan tih kan tum ang a. Zu lei a, in rui a midang tan a harsatna an siam a nih chuan dan hmang a man tawh phawt chuan pawisa engemaw zat chawi leh lungin tan, a pahnih pawh a hrem theih a ni a. Nichina kan sawi tawh ang khan Police leh Excise te chauh ni lovin NGO te pawh helaiah hian an tangkai thei viau dawn a ni. Kan dan hmanlai anga zu kan khap bur reng hian thalai ten ruih hlo lam ah an tlan phah tih te, zu chhia avanga hriselna kawngah tawrhna nasa tak te, phai lam atangin a ruk a lakluh awm thei reng mai te, mi lian leh mi te Dan bawh chhe theuh theuh hrem dan in ang lo tak tak te hian kan society a ti buai hle a ringtu 100 a 100 kan awm mek lai hian zu avanga man chu Criminal Case ah kan siam si a, crime record sang tak tak kan nei reng te hi a zahthlak hle a ni. Ringtute hi thil tisual lo tur, thianghlim tur kan nihnaah a awm loh avanga zu in lo, eiruk tur a awm loh avanga eiru lo ni lovin zu awm reng pawha in lo thei; eiruk tur awm

leh eiru thei dinhmuna ding reng chung pawha eiru lo ngam, uire theihna hmun a awm reng uire lo ngam Kristian kan nih a tul tak zet zawk a ni.

He dan thar hian zu zawrh emaw in phalna ngawr ngawr a tum a ni lova. Kuthnathawk tute, lo nei mite thar chhuah a lo pun a, man man zawka hlawkna an telna tur leh dawm kanna tur hi a tum bul pui a ni bawk a. Zu, Beer leh Uain a siam theih chi Agriculture product te, Sawhthing, Fu, Lakhuihthei, Grep tih ang chi te tunah a siamna ti nghal rum rum theilo mah ila, heng tharchhuah hralhna kan buaipui fona te, kuthnathawktu farmer te hamthatna tur a hman tangkai a la ni dawn a ni. Hei hi sorkar pawhin a tum a ni.

Kan Dan hman mek aia a danglamna tur chu khuahkhirhna hnuaiyah zu tha lei tur a awm ang a. A in duh tan phalna neiin lei theih zat te bithliah a ni a. Amaherawhchu, phalna neilova zu siam, zu zuar leh in te, vantlang hmuna in te, zu rui buaina siamte, rui chung motor khalh te chu he Danah hian a hma aiin nasa fein hremna a nasa zawk dawn a ni. Khauh taka hei hi lekkawh tum a ni.

Kan Dan hman lai hian hremna a bithliahah tan emaw, pawisa chawi tir tur zat, a rei zawng leh tam lam chauh a bithliah chu a tlem lam bithliah a ni a. Entirnan, thla ruk aia tlem lo, kum nga thleng lungin tan tir theih a ni ang tih te a ni a. A tlem lam bithliah loh a nih avangin reilo te te tana tlak mai leh pawisa chawi pawh tlemte chawi tir a hrem mai ang chi chu a tlem lam bithliah vek a nih tawh avangin a theih tawh dawn loh a ni. Hei hi kan sawi nawn leh duh kher na chhan chu ram mipuite pawh hian hria sela. Tun hma ang mai mai a thil tih tur anih loh avangin tawrhna nasa tak he Bill hian Dan pawisa lote chungah a thlen thei a ni tih an hriat a pawimawhin ka hria a. Tin, zu tam tham man leh tlem te fun hnih khat mante hremna dan thuhmun reng thin pawh tih, danglam a ni a. Small quantity bithliahin hremna pawh tih nep deuh a ni thung. Excise leh Police te bakah mi mal leh pawl ho, group of person ten Dan bawhchhia zu zuar leh rui te an man theih na te, zu rui buaina te siam thla khat aia rei lo, kum hnih thleng lungin tana hremna te, vantlang hna, social work, khawlai leh kawr phiat fai a hrem theihna te he Dan tharah hian kan sawi tawh angin a chuang vek a ni.

Pu Speaker, Dan bawhchhetu tan chuan kan Dan hman lai aia hlauhawm zawk, khirh zawk a nih na lai a awm dawn a. Zu rui, khawlaia zu in buaina siam, rui chung motor khalh te a hma aiin hremna a nasa zawk dawn a ni kan tih kha hre nawn leh ila. Kan Dan siam thar tur hi a hlawhtlin a, state dange ang bawk a rui buai lova zu

hi khuahkhirhna hnuai a zu thianghlim a duhtu te tana in theih tura buatsaih sorkar hian a tum a ni a.

Kum 40 leh 50 lai kan lo practice tawh, culture ang maia kan lo neih tawh Krismas leh Kumthar vuakvet a halpuah kan lo hal thin pawh Pathian chakna ringa kan khap a, mite rilruah Pathianin hna a thawk a, halpuah ri hre lovin kan hun pui te chu kan lo hmang thei ta a. Zoram dung leh vang, khawilai hmun tinah pawh tunah hian zu duh lohna poster tar avang ringawt pawh hian zu ina ruih buaia mi tana hnawk saka awm chu tu mahin an duh ka ringlo a ni. Hengte hi kan thil tum hlawtlinna tura Pathian remruat, a hmanrua te an niin ka hria a, awareness tha tak a ni. He Dan hi kan tum anga kan hlawhtling lo a nih chuan kan Leader in a sawi tawh ang khan kan ramin a tawrhna thlentu a nih dawn phawt chuan tihdanglam leh mai theih a ni a. Mizoram Excise Act hi tum thum tihdanglam a awm tawh a ni.

Chuvangin, he zu khuahkhirhna dan hi hlawhtling taka kal pui a nih theih nan Member zahawm takte lungrual taka min pass pui tur leh Zoram mipui zawng zawngte min tawiawm theuh turin ka sawm che u a ni. Ka lawm e.

SPEAKER : Le, kan Minister zahawm takin “The Mizoram Liquor (Prohibition and Control) Bill, 2014” pass a rawn dil a, pass remti zawngin “remti” ti rawh ule.

Pu VANLALZAWMA : Pu Speaker, khawngaih takin. Hei, “The Mizoram Liquor (Prohibition and Control) Bill, 2014” sawihonaah hun tha tak mai min siam sak a. Member zawng zawngte thusawi theihna hun tha tak min siam sak a, a bik takin opposition member-te kan thiam ang tawk tawk a kan thusawite min ngaihthlak sak avangin kan lawm hle a ni. Amaherawhchu, chuti chung chuan he Bill hi pass tho tur niin a lang a, chuvang chuan min hrethiam la he Bill pass-naah hi chuan kan tel ve lo mai ange. Min lo hrethiam dawn nia.

SPEAKER : Awle, remti lo chu an chhuak ta a, tichuan, remti an tam zawk a, Mahse an chhuak tau tawh alawm, an chhuah dawn thu kha Opposition Group Leader khan dingin a sawi a. Engpawhnise, tunah hian “The Mizoram Liquor (Prohibition and Control) Bill, 2014” chu pass a ni tih ka puang e.

Pu R. LALZIRLIANA, MINISTER : Pu Speaker, ka lawm e.

SPEAKER : Chuan Mizoram Legislative Assembly 7-na kan vawi thum thutkhawmna chu kan lo zo dawn ta a. Tun Session-ah hian ni thum chhung chauh kan nei na in thil kan ti tam hman hle a ni. Starred Question 71 lut ah 69 admit a ni a, List of Business-a tel zat chu 49 a ni a House-a chhan zat 32 House-a chhan hman loh 17. Tin, Unstarred Question 57 a awm a, zawhna lut zat 57 a vai khan a lut a, zawhna admit 51, zawhna reject 6, zawhna a club a club kha pakhat a awm a. Zawhna te hi Department thenkhat chuan tha takin an chhang a, department thenkhat tun thlenga chhanna la pe lo an awm a ni. Chu chu kan minister zahawm tak te khan mahni Department theuh chu khuahkhirh (control) tum ila a tha awm e.

Tin, Vote on Account, August - November, 2014 chhunga kan hman tur kan pass bawk a. Bill hi panga a lut a, panga ah hian pali chu lungrual taka pass a ni a, tuna mi pawh kha lungrual taka pass a ni tho va, a zavaiin pass vek a ni. Chuan paper hi 28 Table of the House ah lay a ni a; tin report 2 present a ni bawk a ni.

Kan House kal dan a kristian em em a, hemi tluka kristian State kan nihna a hriat a lanna hi keima mimalah chuan ka hriat ka hre lo, buaina pakhat mah kan session chhungin a awm lo, inhnial buai na te, insual buai tumna te pakhatmah a awm lova, chumi bakah nitin a kan tih tur business hi fel takin kan ti zo zel a, hemi tluka Kristian State kan nihna hriatna hi a awmin ka hre lova, member zahawm takte a tawp thlengin in awm kim vek a ni. Damlo, chawlh rawn dil te tih loh chu a tawp thlengin kan awm kim vek a ni. Hetiang khawpa discipline nei ram leh hnam ngaihsak, mahni duty ngaipawimawh MLA kan neite hi a ropui em em a ni. Hetiang zinga Speaker nih hi nuam ka ti em em a ni. Tichuan, tun session hi tiam chin awm lovin kan lo ti tawp dawn ta a ni.

The House is adjourned sine die at 5 : 54 P.M.
